

ማቶሴ ፃፊዳ ዩሱስ ኪሪስቶስ ዋንጌላ ጋላ ቆፋ

ማቶሳ ዋንጌላይ፡ ያና ጌቴቲዲ ኡፋይሳን ናጌቲያ አሼይሲ ዩሱሳ ጌዴይሳኔ ያሳይ ጋልዓ ጫቁዋን ባ አሳስ አሚዳ ኡፋይሳ ቃላ ፖሊዳይ ኢያ ባጋራ ጌዴይሳ ኦዲያ ዋንጌላ። ሃ ዋንጌላይ ዩሱሴ ኤንታ ጌደን ዩሌቲዲ ዲጩዳ አይሁዴታ ያላላሰ ጌደናሺን ኩሜላ አላሚያ ኡባሳ።

ማቶሳ ዋንጌላይ፡ ዳሮ ናጌቴላን ፃፊቲዳ ማፃፋ። ማቶሴ ባ ማፃፋ ዩሱሳ ዩሌቴላን ደሚዲ፡ ኢያ ፃማቁቴላኔ ኢያ ፓጩቴላ ኦዲ ሲሚዲ፡ ጋሊላን ኢ ሳባኪዳባ፡ ታማርሲዳባኔ ሃርጋንቸታ ፓሊዳባ ኦዴስ። ሄሳፊ ካሊዲ፡ ዩሱሴ ጋሊላፔ ዩሩሳላሚ ቢዳይሳኔ ኢ ሃ ሳዓን ዴዲዳ ዎዴ ወርሴላ ሳሚንታን ሃኒዳባታ ቆንጩሴስ። ሄሲካ ኢያ ካቁቴላ፡ ኢያ ሃይቁዋኔ ኢያ ዴንዲዋ ኦይኬስ።

ሃ ዋንጌላይ፡ ዩሱሴ ያሳ ሃጊያ ቢርሻናው ማቲ ዴዴይሳኔ ያሳ ካዎቴላባ ታማርሲያ ጌታ አሰታማሬ ኦሊዲ ሺሼስ። ኢያ ቲሚርቲያፊ ዳሪያ ባጋይ ዲማ ዲማ ማራን ጌጌቲዳ ኢቻሹ ኪፊሌታን ሻኬቴስ።

1. ያሳ ካዎቴላን ዴዲያ አሳ ሃኖቴላ፡ ኦሱዋ፡ ማታኔ ወርሴላ ቃዳ ኦዲያ ዴሪያ ቦላ ቲሚርቲያ (ሺም 5-7)።

2. ታማኔ ናዎቡ ታማሬቲ ዋንጌላ ሳባካናው ቢዳ ዎዴ ኤንታው አሜቲዳ ካሌሱዋ (ሺም 10)።

3. ያሳ ካዎቴላባ ታማርሳናው ሺቁዳ ዲማ ዲማ ሌሚሶታ (ሺም 13)።

4. ኢያ ታማሬ ጌደባ ቢርሼላ ኦዲያ ቲሚርቲያ (ሺም 18)።

5. ሃዲ አላሚያ ወርሴላኔ ያሳ ካዎቴላ ዩሳባ ኦዲያ ቲሚርቲያ (ሺም 24-25)።

ማቶሳ ዋንጌላ አይፌ ቆፋታ

ዩሱስ ኪሪስቶስ ዩሌቴላ ሱሳኔ ኢያ ዩሌቴላ 1:1-2:23

ፃማቁያ ዮሃኒሳ ኦሱዋ 3:1-12

ዩሱሳ ዪንቃቲያኔ ፓጩቴላ 3:13-4:11

ዩሱሴ ጋሊላን ባ ኦሱዋ ኦይኪዳይሳ 4:12-18:35

ጋሊላፔ ዩሩሳላሚ ጋካናው 19:1-20:34

ወርሴላ ሳሚንታ ዩሩሳሌም ሄራን 21:1-27:66
ጎዳ ሃይቆፕ ዴንዲዋኔ ቆንጩላ 28:1-20

ዩሱሳ ዩሌቴላ ሱሳ
(ሉቃ 3:23-38)

1 ሃይሳፌ ካሊዲ ፃፊቲዳይሲ ዳዊቴ ናዓ ኣብራሃም ናዓ ጊዲዳ ዩሱስ ኪሪሰቶሳ ዩሌቴላ።

2 ኣብራሃም ዩሳቃ ዩሊስ፤

ዩሳቃ ያይቆባ ዩሊስ፤

ያይቆቢ ዩሁዳኔ ኢያ ኢሻታ ዩሊስ፤

3 ዩሁዲ ተዒማሪፕ ፋሬሴኔ ዛራ ዩሊስ፤

ፋሬሲ ኣስሮም ዩሊስ፤

ኣስሮም ያራም ዩሊስ፤

4 ራም ያሚናዳቤ ዩሊስ፤

ኣሚናዳቤ ናዓሶና ዩሊስ፤

ናዓሶኔይ ሳልሞና ዩሊስ፤

5 ሳልሞኔይ ራዓቢፕ ቦዔዛ ዩሊስ፤

ቦዔዚ ኡሩቲፕ ኢዮቤዳ ዩሊስ፤

ኢዮቤዲ ኢሴዬ ዩሊስ፤

6 ኢሴዬይ ካወዋ ዳዊቴ ዩሊስ፤

ዳዊቴይ ኦሪዮ ማቼፌ ሶሎሞን ዩሊስ፤

7 ሶሎሞንይ ርቢዓማ ዩሊስ፤

ርቢዓማይ ኣቢያ ዩሊስ፤

ኣቢዬይ ኣሳፌ ዩሊስ፤

8 ኣሳፌ ኢዮሳፌዳ ዩሊስ፤

ኢዮሳፌዳይ ኢዮራም ዩሊስ፤

ኢዮራምይ ኦዚያን ዩሊስ፤

9 ኦዚያንይ ኢዮዓታም ዩሊስ፤

ኢዮዓታምይ ኣካዛ ዩሊስ፤

ኣካዚ ሂዚቁያሳ ዩሊስ፤

10 ሂዚቁያሲ ሚናሴ ዩሊስ፤

ሚናሴይ ኣሞና ዩሊስ፤

ኣሞኒ ኢዮሲያሳ ዩሊስ፤

11 ኢሰራዔሌ ኣሳይ ዲዔቲዲ ባቢሎን ቢታ ቢዳ ዎዴ ኢዮሲያሲ

ኢኮኒያናኔ ኢያ ኢሻታ ዩሊስ።

12 ባቢሎን ቢታ ኢሰራዔሌ ኣሳይ ዲዔቲዲ ቢዳፕ ጉዬ ኢኮኒያኒ

ሳላቲያሌ ዩሊስ።

1:11 2ካዎ 24:14-15፤ 2ታሪ 36:10፤ ኤር 27:20

ሳላቲያሌይ ዜሩባቤላ ዩሊስ፤

13 ዜሩባቤላ ኣብዲዩ ዩሊስ፤

ኣብዲዩይ ኤሊያቄሜ ዩሊስ፤

ኤሊያቄሜይ ኣዛራ ዩሊስ፤

14 ኣዛሪ ሳዶቄ ዩሊስ፤

ሳዶቄይ ኣኪሜ ዩሊስ፤

ኣኪሜይ ኤሊዩዳ ዩሊስ፤

15 ኤሊዩዳ ኣላዛራ ዩሊስ፤

ኣላዛሪ ማታኔ ዩሊስ፤

ማታኔይ ያይቆባ ዩሊስ፤

16 ያይቆቢ ዮሴፋ ዩሊስ፤

ዮሴፊ ኪሪስቶሳ ገያ ዩሱሳ ዩሊዳ ማይራሚ ኣዚና።

17 ሂዛ፡ ዩሌቴላይ ኣብራሃሚፔ ዳዊቲ ጋካናው ታማኔ ኦይዳ። ዳዊቲፔ ቢዲ ባቢሎኔ ዲዑዋ ጋካናው ታማኔ ኦይዳ። ባቢሎኔ ዲዑዋፔ ቢዲ ኪሪስቶሳ ጋካናው ታማኔ ኦይዳ ዩሌቴላ ገዴስ።

**ዩሱስ ኪሪስቶሳ ዩሌቴላ
(ሉቃ 2:1-7)**

18 ዩሱስ ኪሪስቶሳ ዩሌቴላ ታሪኬይ ሃይሳፊ ካሌይሳ። ኢያ ኣያ ማይራማ ዮሴፋስ ኦይሼታ ዳዊሼ ዮሴፋራ ጋሂቶና ጌሻ ኣያናፔ ቃንላታሱ። 19 ዮሴፊ ጂሎ ኣሲ ገዲዳ ገሾ ኢዮ ኣሳን ኬሳናው ኮዩቤና። ያኒያ ገሾ ቆሳን ኢዮ ኣጋናው ቆፒስ። 20 ኢ ሄ ቆፋን ዳዊሼን ያሳ ኪታንቾይ ኣሙሆን ቆንጨዲ፡ «ዳዊቲ ናዓው፣ ዮሴፋ፣ ማይራማ ቃንላቲዳይ ጌሻ ኣያናፔ ገዲያ ገሾ ኢዮ ኤካናው ያዮፋ» ያገሰ። 21 ኢያ ኣዳ ናዓ ዩላና፣ ኢ ባ ዳሪያ ኤንታ ናጋራፔ ኣሺያ ገሾ ኢያ ሱንላ ኔ ዩሱሳ ጋዳ ጃጋና።

22 ጎዳይ ናቢያ ኢሳያሳ ዶናን፣ 23 «ሄኮ ጌላዒያ ቃንላታና፤ ኣዳ ናዓካ ዩላና፤ ኢያ ሱንላይ ኣማኑዔላ ጌቲታና» ጎይሲ ፖሌታና ማላ ሃ ኡባይ ሃኒስ። ኣማኑዔላ ጌይሳስ ቢርሼላይ «ያሳይ ኑራ ዳዔስ» ጉሱ።

24 ዮሴፊ ጲስኮፊ ባርኪዲ ጎዳ ኪታንቾይ ኪቲዳይሳ ማላ ማይራሞ ባ ሶ ኤፊስ። 25 ሺን ባ ባይራ ናዓ ዩላና ጋካናው ኢዮ ቦቺቤና፤ * ዩሌቴላ ናዓካ ዩሱሳ ገዲ ጃገስ።

1:18 ሉቃ 1:27 1:21 ሉቃ 1:31 1:23 ኢሳ 7:14 * 1:25 ኢዮ ቦቺቤና፡ ማቺራ ኣዚናራ ኣቄይሳዳ ኢሲፊ ኣቄቦኮና ጉሱ። 1:25 ሉቃ 2:21

2

ደሎሃፔ ዩዳ አሳታ

1 ካወቀ ሄሮዲሳ ዋዳን ዩሱሲ ዩሁዳ ቢታን በቴሌሜ ካታማን ዩሌቲዳይሳፌ ጉዬ ያለንቶ ታይቢያ አሳቲ ደሎሃፔ ዩሩሳላሜ ዩዲ። 2 «ዩሌቲዳ አይሁዳ ካዎይ አዉን ዳዒ? ኑኒ ደሎሃ ባጋራ ከዩዳ ኢያ ያለንቱዋ በዒዲ ኢያው ጎይናናው ዩዳ» ያገዲ ኦይቸደሶና። 3 ካዎይ ሄሮዲሲ ሄሳ ሰዒዳ ዋዳ ዳጋሚሰ። ዩሩሳላሜን ዳዒያ አሳይ ኡባይካ ዳጋሚደሶና። 4 ሄሮዲሲ ካሂኔ ሃላቃታኔ ሂጌ አሰታማሬታ ባኮ ጃገዲ። «ከሪሰቶሲ አዉን ዩሌታንዳሻ?» ያገዲ ኤንታ ኦይቸሰ።

5 ኤንቲካ፣ «ዩሁዳ በቴሌሜና፤ ናቤይ።

6 «ዩሁዳን ዳዒያ በቴሌሜ፣
ዩሁዳን ዳዒያ ጎባ ካታማታፔ፣
ኔኒ አይቢንካ ጉፃካ።

ታ ዳሪያ ኢሰራዔሌ አይሳናይሲ፣
ኔፔ ከያና) ገዲ ፃፊሰ»

ያገደሶና።

7 ሃሳፌ ጉዬ፣ ሄሮዲሲ ደሎሃፔ ዩዳ አሳታ ጌማን ጃገዲ፣ ያለንቱዋ ኤንቲ በዒዳ ዋዲያ ኤንታፌ ጌሺዲ ኤሪሰ። 8 ኢ ኤንታና በቴሌሜ ዩዲሹ፣ «ቢዲ ዩሌቲዳ ናዓ ሚንሉዲ ኮዩቲ፤ ኢያ ሂንቲ ዳሚዳ ዋዳ ታካ ባዳ ኢያው ጎይናና ማለ ሰሚዲ ዩሹ ታው ኦዲቲ» ያገሰ። 9 ኤንቲካ ካዎይ ሄሮዲሲ ገዳይሳ ሰዒዲ በደሶና። ኤንቲ ደሎሃ ባጋራ በዒዳ ያለንቶይ ኤንታና ካሌሊሹ ናዓይ ዳዒያሱዋ ጋካናው ኤፊሰ። 10 ኤንቲ ሄ ያለንቱዋ በዒዳ ዋዳ ገታ ኡፋይሲ ኡፋይቲደሶና። 11 ሶ ጌሊዲ ናዓ ባ አዩ ማይራሚራ ዳዒይሳ በዒደሶና። ኢያው ጉልባቲዲ ጎይኒደሶና። ባንታ ሳዒኒያ ደዩዲ ዋርቃ፣ ኢፃኔኔ ካርቤ ኢያው ኢሚደሶና። 12 ኤንቲ ሄሮዲሳኮ ጉዬ ሲሞና ማላ ያሳይ ኣሙሆን ኤንታው ኦዲን፣ ሃራ ኦጌራ ባንታ ቢታ ሲሚደሶና።

ጊብጃ ባቃቱዋ

13 ደሎሃ ባጋፌ ዩዳ አሳቲ ቢዳፔ ጉዬ፣ ጎዳ ኪታንቸይ ዮሴፋሰ ኣሙሆን ቆንጩዲ፣ «ሄሮዲሲ ናዓ ዋቋናው ኮያ ገሾ ዳንዳ፤ ኤሌሳዳ ናዓኔ ናዓ አዩው ኤካዳ ጊብጃ ቢታ ባ። ኔ ሲማና ዋዲያ ታ ኔው ኦዳና ጋካናው ያን ጋሞዓ» ያገሰ።

14 ሄሳ ገሹ፣ ዮሴፌ ሄ ቃማን ዳንዲዲ፣ ናዓኔ ናዓ አዩው ኤኪዲ ጊብጃ ቢሰ። 15 ናቢያ ደናን ያሳይ፣ «ታኒ፣ ታ ናዓ፣

ጊብጻ ቢታፌ ጃጋስ» ጌቲቲዳ ቃላይ ፖሌታና ማላ ሄሮዲሲ ሃይቃና ጋካናው ኢ ያን ዳዒሰ።

16 ሄሳፌ ጉዬ፣ ደሎሃ ባጋፌ ዩዳ አሳቲ ኢያ ጨሚዳይሳ ኤሪዳ ዋዴ ዳር ዩሎቲሰ። ኢ ካሴ ኤንታፌ ሲዒዳይሳዳ ቤቴሌሜኒኔ ሄ ሄራን ዳዒያ ናሞዑ ላይሉ ኩሚዳይሳታኔ ናሞዑ ላይላፌ ጋርሳን ዳዒያ እዴ ናይታ ኡባ ባ ዎታዳሬታ ዬዲዲ ዎዲሲሰ።

17-18 ናቢያ ኤርሚያሳ ዶናን፣
«ዬሆይኔ ዜሌልሲ፣

ራማ ካታማን ሲዒቲሰ።
ራሄላ ባ ናይታሰ ዩካዉሱ፤

ኤንቲ ሃይቂዳ ጊሾ
ሚኔታናው ዳንዳባቡኩ»
ጊዲ ኦዲዳይሲ ፖሌቲሰ።

ናዚሬቴ ሲሙዋ

19 ሄሮዲሲ ሃይቂዳፔ ጉዬ ጊብጻን ጎዳ ከታንቸይ ዮሴፋስ አሙሆን ቆንጨዲ፣ 20 «ናዓ ዎቆናው ኮያ አሳቲ ሃይቂዳ ጊሾ ዴንዳዳ ናዓኔ ናዓ አዩው ኤካዳ ኢሰራዔሌ ቢታ ሲማ» ያጊሰ።

21 ዮሴፌ ዴንዳዲ ናዓኔ ናዓ አዩው ኤኪዲ ኢሰራዔሌ ቢታ ሲሚሰ። 22 ሺን አርኩለዮሲ ዩሁዳን ባ አዋ ሄሮዲሳ ቤሳን ካዎቲዳይሳ ሲዒዳ ዎዴ ያ ባናው ያዩሰ። ያሳይ አሙሆን ኢያው ቆንጨሲን ጋሊላ ቢታ ቢሰ። 23 ናቤታ ዶናን፣ «ናዚሬቴ አሲ ጌቲታና» ጊዲ ኦዴቲዳይሲ ፖሌታና ማላ ናዚሬቴ ካታማ ቢዲ ያን ዳዒሰ።

3

ፃማቂያ ዮሃኒሳ ቲሚርቲያ

(ማር 1:1-8፤ ሉቃ 3:1-17፤ ዮሃ 1:19-28)

1-2 ሄ ዎዴ ፃማቂያ ዮሃኒሲ፣ «የሳ ካዎቲላይ ማታቲዳ ጊሾ ሄንቲ ናጋራፔ ሲሚቲ» ያጊዲ ሳባኪሼ ዩሁዳ ባዘ ቢታ ቢሰ።

3 ናቢያ አሳያሲ ዮሃኒሳባ ኦዲዳይሳ ማላ፣
«ባዘ ቢታን፣

ኢሰይ ባ ቃላ ዶቁ ኦሊዲ፣
ሳዳ ኦጊያ ገጊሲቲ።
ኢያ ሆርጋ ፒዲ ኦሊቴ፣ ገሰ»

2:15 ሆሴ 11:1 2:17-18 ኤር 31:15 2:23 ማር 1:24፤ ሉቃ 2:39፤
ዮሃ 1:45 3:1-2 ማቶ 4:17፤ ማር 1:15 3:3 ኢሳ 40:3

ያገቱዳይ ኢየሳ ያገሰ።

4 የሃኒሲ ገማሌ ኢኪሴፔ ኦሴቲዳ አፊላ ማዕስ። ባ ያሳን ዳፎ ዳንጨሱ። ኢ ሚያ ካላይካ ቦሌን ዴጌራ ኤሲ። 5 አሳይ ሄ ዎዴ ዩሩሳላሚ ካታማፔ፣ ዩሁዳ ቢታ ኡባፌን የርዳኖሴ ሻፋ ሄራፔ ኢያኮ የሶና። 6 ባንታ ናጋራ ፓዲዲ የርዳኖሴ ሻፋን የሃኒሳ ኩሼን ፃማቄቶሶና።

7 የሃኒሲ፣ ዳር ፋሪሳዌቲኔ ሳዲቃዌቲ ፃማቄታናው ባኮ ዩይሳታ ቤዒዲ፣ ኤንታኮ፣ «ሃ ኢታ ሸሻቶ፣ ያና ያሳ ሃንቁዋፌ ባቃታና ማላ ሂንቴና ኦኔ ዘሪዳይ? 8 ሂዛ፣ ሂንቴ፣ ሂንቴ ናጋራፔ ሲሚዳይሳ ኤሪሲያባ ኦሊቴ። 9 ሂንቴ፣ ሂንቴ ዎዛናን፣ ለላብራሃሜይ፣ ኑ አዎይ ዴዔሰን ገዲ ቆፖሬቴ። ሎይሊ ሲዒቴ! ያሳይ ሃ ሹታታፔ ኣብራሃሜሰ ናዓ ኬሳናው ዳንዳዔሰ። 10 ቤዳይ ሚላ ፃጶዎን ገገዲ ኡቲሰ፤ ሎፖ ኣይፌ ኣይፎና ሚላ ኡባይ ቃንፃቲዲ ታማን ዩጌታና።

11 «ሂንቴ፣ ሂንቴ ናጋራፔ ሲሚዳይሳ ኤሪሳናው ታኒ ሂንቴና ሃላን ፃማቃይሰ። ሺን ታፔ ጉዬራ ዩይሲ ሂንቴና ጌሻ ኣያናኒኔ ታማን ፃማቃና። ኢ ታፔ ዳር ዎልቃሜሰ፤ ታኒ ሃሪ ኣቶሺን ኢያ ጫማ ቶካናዉካ ቤሲኪ። 12 ካላ ጌሺያ ፒሌይ ኢያ ኩሼን ዴዔሰ። ካላ ሎይሊ ጌሼሰ፤ ገሰቲያ ባ ሻሊያን ቆላና፣ ሺን ፑኑዎ ቶያና ታማን ፀጋና» ያገሰ።

**ዩሱሳ ፃማቄቲላ
(ማር 1:9-11፤ ሉቃ 3:21-22)**

13 ሄ ዎዴ ዩሱሲ የሃኒሳ ኩሼን ፃማቄታናው ጋሊላፔ የርዳኖሴ ሻፋ ቢሰ። 14 ሺን የሃኒሲ ኢያ ዲጋናው ኮዩድ፣ «ታኒ ኔናን ፃማቄታናው ኮሺሺን ኔኒ ታኮ ያይ?» ያገሰ። 15 ሺን ዩሱሲ ዘሪዲ፣ «ያሳይ ኑፔ ኮያባ ኡባ ኑ ፖላናው ቤሲያ ገሾ ሃዒ ታው ኤር ጋ» ያገሰ። የሃኒሲ ኢያው ኤር ገዲ ኤኪሰ። 16 ዩሱሲ ፃማቄቲዳ ማላ ሃላፌ ኬዩሰ። ኢራካ ሳሎይ ዶዩቲን ያሳ ኣያናይ ሆሌዳ ዩሺን ቃሲ ባ ቦላ ዎልዓሚዲ ዎዲሺን ቤዒሰ። 17 ሄ ዎዴ «ታ ደሲያ፣ ኢያን ታና ኡፋይሲያ ታ ናዓይ ሃይሳ» ያገሰ ቃላይ ሳሎፔ ዩሰ።

3:4 2ካዎ 1:8 3:7 ማቶ 12:34፤ 23:33 3:9 የሃ 8:33 3:10
ማቶ 7:19 3:17 ማቶ 12:18፤ 17:5፤ ማር 1:11፤ ሉቃ 9:35

4

ዩሱሳ ፓጮቴሳ

(ማር 1:12-13፤ ሉቃ 4:1-13)

1 ሄሳፌ ጉዬ፣ ፃላሄይ ዩሱሳ ፓጮና ማላ ጌሻ አያናይ ዩሱሳ ባዘ ቢታ ኤፊስ። 2 አይታሙ ቃማኔ አይታሙ ጋለስ ጾሚዳፔ ጉዬ ኮሻቲስ። 3 ፃላሄይ ዩሱሳኩ ዪዲ «ኔኒ ጾሳ ናባ ጊዲኮ፣ አኔ ሃ ሹቻቲ ኡይሉ ጊዳና ማላ ኪታ» ያገሰ።

4 ዩሱሱ ዛሪዲ፣ « አሲ ጾሳ ዶናፔ ኬያ ቃላ ኡባን ዳናፔ አቲን ኡይሳ ፃላላን ዳዔና) ጌቲቲዲ ጾሳ ቃላን ፃፊቲስ» ያገሰ።

5 ካሊዲካ፣ ፃላሄይ ዩሱሳ ጌሻ ካታማ ኤፊዲ፣ ጾሳ ኬላ ሁዒያ ኬሲዲ፣ 6 «ኔኒ ጾሳ ናባ ጊዲኮ፣ አኔ ዲፔ ሳባን ኩንዳ። አይስ ገኮ።

ኔ ተሆይ ሹቻን ጳቤቲ ዳሹቶና ማላ፣

ባንታ ኩሺያን ኔና ዳንላና ማላ፣

ጾሳይ ባ ኪታንቸታ ኔ ገሾ ኪታና)

ጌቲቲዲ ጾሳ ቃላን ፃፊቲስ» ያገሰ።

7 ዩሱሱ ኢያኮ፣ «ቃሲካ፣ <ጾሳ ቃላን ኔ ጎዳ፣ ኔ ጾሳ ፓጮፋ) ያገቲዲ ፃፊቲስ» ጊዲ ዛሪስ።

8 ወርሴላን ፃላሄይ ዩሱሳ ኢሲ ዋልቃማ ዳሪያ ሁዒ ኬሲዲ አላሚያ ካዋቲላታ ኤንታ ቦንቹዋራ ኢሲፌ ቤሲዲ፣ 9 «ኔ ታው ኩንዳዳ ጎይኪኮ ታ ኔው ሃ ኡባ ኢማና» ያገሰ።

10 ዩሱሱ ዛሪዲ፣ «ሃ ፃላሄያው፣ ታፔ ሃካ! ኔ ጎዳ፣ ኔ ጾሳ ጎይና፣ ኢያ ፃላላ ሃጋዛ) ጌቲቲዲ ጾሳ ቃላን ፃፊቲስ» ያገሰ።

11 ሄሳፌ ጉዬ፣ ፃላሄይ አጊዲ ቢስ፤ ኪታንቸቲ ዪዲ ኢያ ሃጋዚዶሶና።

ዩሱሳ ቲሚርቲያ

(ማር 1:14-15፤ ሉቃ 4:14-15)

12 ዩሱሱ፣ ዮሃንሲ ቃሹቶይሳ ሲዒዳ ዋዴ ጋለላ ቢታ ቢስ።

13 ናዚሬቲ ካታማ አጊዲ ዛቢሎናኒኔ ኒፍታሌሜ ሄራን፣ አባ ማታን ዳዒያ ቁፊርናሆሜ ካታማ ቢዲ ያን ዳዒስ። 14 ሄሲ ሃኒዲይ ናቢያ ኢሳያሳ ዶናን፣

15 «ዛቢሎኔ ቢታን፣ ኒፍታሌሜ ቢታን፣

ዮርዳኖሴ ሻፋፔ ሄፊንላን፣

4:1 ኢብ 2:18፤ 4:15 4:4 ዛሬ 8:3 4:6 ማዝ 91:11 4:7 ዛሬ 6:16 4:10 ዛሬ 6:13 4:12 ማቶ 14:3፤ ማር 6:17፤ ሉቃ 3:19-20 4:13 ዮሃ 2:12

አባ ኦጊያ ጋፃን ዳዒያ፥
አይሁዳ ጊደና ዳሬይ ዳዒያ ጋለላን፥

16 ቋማን ዳዒያ ዳሬይ፥
ዋለቃማ ፖያ ቤዒሰ።

ሃይቆ ኩያ ቢታን፥
ዳዔይሳታሰ ፖያይ ኬዩሰ»

ያጊዲ ኦዴቲዳ ቃላይ ፖሌታና ማላሳ።

17 ሄ ዋዴፔ ደሚዲ ዩሱሲ፥ «ጾሳ ካዎቲላይ ማታቲዳ ጊሾ ሂንቲ ናጋራፔ ሲሚቲ» ያጊዲ ቃላ ሳባኬሰ።

ኮይር ታማሬታ ያጌቴላ
(ማር 1:16-20፤ ሉቃ 5:1-11)

18 ዩሱሲ ጋለላ አባ ማታራ አዲሼ ናምዑ አሻታ፥ ጳጳርሳ ጌቲቲያ ሲሞናኔ ኢያ አሻ ኢንዲሪያሳ ቤዒሰ። ኤንቲ ሞሎ ኦይኬይሳታ ጊዲዳ ጊሾ ባንታ ጌቲያ አባን ዩጎሶና። 19 ዩሱሲ ኤንታና፥ «ሃ ዩቲ፤ ታና ካሊቲ! ሞሎ ኦይሌ አቶሺን፥ ታ ሂንቲና አሴ ኦይሌ ታማርሳና» ያጊሰ። 20 ኤንቲካ፥ ኤሌሲዲ ባንታ ጌቲያ ዩጊ አጊዲ ዩሱሳ ካሊደሶና።

21 ዩሱሲ ያፔ ቡር ጌዴ ሲንሌ አዲሼ ሃራ ናምዑ አሻታ፥ ዛብዲዮሳ ናይታ፥ ያይቆባኔ ዮሃንሳ ቤዒሰ። ባንታ አዋ ዛብዲዮሳራ ኢሲፌ ዋጎሉዋ ጊደን ባንታ ጌቲያ ጊጊሴይሳታ ያጊሰ። 22 ኤንቲካ፥ ኤሌሲዲ ባንታ ዋጎሉዋኔ ባንታ አዋ አጊዲ ዩሱሳ ካሊደሶና።

ዩሱሲ ሃርጋንቾታ ፓሊሰ
(ሉቃ 6:17-19)

23 ዩሱሲ አይሁዳ ዋሳ ኬላታን ታማርሲሼ፥ ሳሎ ካዎቲላ ዋንጌላ ኦዲሼኔ ዱማ ዱማ ሃርጊያፌ አሳ ፓሊሼ ጋለላ ቢታ ኡባን ዩዩሰ።

24 ሃሳፌ ዴንደይሳን ኢያ ሱንላይ ሶሪያ ቢታ ኡባን ኬዩሰ። ዱማ ዱማ ሃርጌን ኦይኬቲዳይሳታኔ ዋዩቲይሳታ፥ ቱና አያናን ኦይኬቲዳይሳታ፥ ሾጪ ዩጊያ ሃርጌን ኦይኬቲዳይሳታኔ፥ ጉንዳታ ኢያዮ ኤሂደሶና፤ ኢካ ኤንታና ፓሊሰ።

25 አሳይ ጋለላፔ፥ ታሙ ካታማታፔ፥ ዩሩሳላሚፔ፥ ዩሁዳፔኔ ዮርዳኖሴ ሻፋ ሄፊንላን ዳዒያ ቢታፌ ዩዳ ዳር አሳይ ኢያ ካሊደሶና።

5

ዩሱሲ ዳሪያ ቦላ ታማርሲዳ ቲሚርቲያ

1 ዳር ዳሬይ ሸቂዳይሳ ዩሱሲ ቤዒዳ ዎዴ ዳሪያ ቦላ ከዩዲ ኡተሰ። ኢያ ታማሬቲ ኢያኮ ሸቂን፣ 2 ሃይሳዳ ያጊዲ ታማርሲስ፡

ቱማ ኡፋይሳ
(ሉቃ 6:2-23)

- 3 «ባንታ ኢያናን ማንቆቲ ኢንጃቲዳይሳታ፡ ሳሎ ካዎቲላይ ኤንታሳ።
- 4 ዩኬይሳቲ ኢንጃቲዳይሳታ፡ ኤንቲ ሚንሌሉ ዳማና።
- 5 ባንታ ዎዛናን ኢሸኬቲ ኢንጃቲዳይሳታ፡ ኤንቲ ሳዒ ላታና።
- 6 ዲሎባ ኦላናው ኮሻቲይሳቲኔ ሳሞቲይሳቲ ኢንጃቲዳይሳታ፡ ኤንቲ ካላና።
- 7 ማሬይሳቲ ኢንጃቲዳይሳታ፡ ኤንቲ ማርቲሌ ዳማና።
- 8 ዎዛና ጌሻቲ ኢንጃቲዳይሳታ፡ ኤንቲ ያሳ ቤዓና።
- 9 ሲጌሌይሳቲ ኢንጃቲዳይሳታ፡ ኤንቲ ያሳ ናይታ ጌቲቲ ዪጌታና።
- 10 ዲሎባ ኦሊያ ጊሾ ጊዲ፡ ሳዴቲይሳቲ ኢንጃቲዳይሳታ፡ ሳሎ ካዎቲላይ ኤንታሳ።
- 11 «ኣሳይ ሂንቴና ታ ጊሾ ጊዲ ጫያ ዎዴ ሳዲያ ዎዴኔ ሂንቴ ቦላ ኢታባ ኡባ ዎርዶን ኦዲሲያ ዎዴ ሂንቴ ኢንጃቲዳይሳታ።
- 12 ሂንቴ ዎይቶይ ሳሎን ጌታ ጊዲያ ጊሾ ኡፋይቲቴ፣ ሃሹ ጌቲ። ሂንቴሬ ካሴ ዳዒያ ናቤታ ሄሳዳ ሳዲዶሶና።

ማዒኔኔ ፖዎ

13 «ሂንቴ ቢታሰ ማዒኔ፤ ማዒኔይ ባ ማዒኔቲላ ኣጊኮ፣ ባ ማልዎቲላ ዋቲ ዛሪ ዳማኔ? ካሪ ሆሊን ኣሳን ዩዴታናፔ ኣቲን ኣይቢሰካ ማዴና።

5:4 ኢሳ 61:2 5:5 ማዘ 37:11 5:6 ኢሳ 55:1 5:8 ማዘ 24:3
 5:10 1ጴጌ 3:14 5:11 1ጴጌ 4:14 5:12 2ታሪ 36:16፤ ሃ.ኦ 7:52
 5:13 ማር 9:50፤ ሉቃ 14:34-35

14 «ሂንቴ ቢታሰ ፖ፣ ዴሬ ቦላ ዴዲያ ካታሚያ ቆሴታናው ዳንዳዑኩ። 15 ፆሞፔ ኦይሌዲ ሶን ዴዲያ ኣሳ ኡባሰ ፖዳና ሜላ ጶቃ ሶን ዋሌሲፔ ኣቲን ዳሎ ጊደን ዋሌይ ባዋ። 16 ሄሳ ሜላ ኣሳይ ሂንቴ ሎፆ ኦሱዋ ቤዲዲ፣ ሳሎን ዴዲያ ሂንቴ ኣዋ ቦንቻና ሜላ ሂንቴ ፖፆይ ኣሳ ሲንላን ፖ።

ሙሴ ሂጊያ

17 «ታኒ ሙሴ ሂጊያኔ ናቤታ ቃላ ሻራናው ዪዳ ሂንቴው ዳናፖ። ታኒ፣ ኤንቴ ኦዲዳይሲ ቱማ ጊዴይሳ ቆንጨሳናው ያሲፔ ኣቲን ሻራናው ያቢኬ። 18 ታ ሂንቴው ቱማ ኦዳይሰ፤ ሳሎይኔ ሳዓይ ኣቆና ጋካናው ሂጌ ኡባይ ፖሌታናፔ ኣቲን ሂጊያፌ ኢሲ ቃላይ ዋይኮ ፒዳሌይ ኣጶና። 19 ሄሳ ጊሾ፣ ሃ ኪታታፔ ጉዲያ ኢሲ ኪታ ሜንሱያ ኦኒካ ቃሲ ሃራታ ሄሳሉ ኦላና ሜላ ታማርሴይ ኦኒካ ሳሎ ካዋቴላን ኡባፌ ጉላ ጊዳና። ሺን ሃ ኪታ ፖሌይሲኔ ሃራታካ ፖላና ሜላ ታማርሴይ ሳሎ ካዋቴላን ጊታ ጊዳና። 20 ታ ሂንቴው ኦዳይሰ፤ ሂንቴ ዲሎቴላይ ፋሪሳዌታ ዲሎቴላፌኔ ሂጌ ኣሰታማሬታ ዲሎቴላፌ ኣጶና ኢዲኮ፣ ሳሎ ካዋቴላ ጌሌኬታ።

ዋጲባ

21 «ሂንቴ ማይዛታሰ፣ <ዋጲፒቴ፤ ሸሞፖ ዋጲዳ ኦኒካ ፒርዴታና> ጌቴቶይሳ ሲዲዴታ። 22 ሺን ታ ሂንቴው ኦዳይሰ፤ ባ ኢሻ ሃንቴታያ ኡባይ ፒርዴታና። ባ ኢሻ ጫያ ኦኒካ ዳይና ሲንሌ ፒርዳሰ ሸቃና። ባ ኢሻኮ፣ <ኤያይ> ጊያ ኦኒካ ቃሲ ጋናሜ ታማን ፒርዴታና።

23 «ሄሳ ጊሾ፣ ኔኒ ኔ ያርሹዋ ያርሺያ ዋዴ ኔ ኢሻ ቆሂዳባይ ኔው ኣኬኬቴኮ፣ 24 ኔ ያርሹዋ ሄ ቤሳን ኣጋዳ ባ፤ ኮይርታ ባዳ ኔ ኢሻራ ጊጋ፤ ያታ ሲማዳ፣ ኔ ያርሹዋ ያሳሰ ያርሻ።

25 «ኔና ሞቴይሳራ ፒርዳ ኬሌ ባሼ ኦጌ ቦላ ኢያራ ጊጋ። ሄሲ ኣቶ ጊኮ ኢ ኔና ዳይና ሲንሌ ኤፋና። ዳይናይ ኔና ቃቕይሳሰ ኣሌ ኢማና፤ ኢ ኔና ዋይኔን ዬጋና። 26 ታ ቱማ ኦዳይሰ፤ ኔ ቦላ ፒርዴታዳ ኣጩዋ ኢሲ ሳንቴሜይ ኣቶና ጨጋ ኦንጋና ጋካናው ቃሾ ኬላፌ ኬያካ።

ላይማቴላባ

5:14 የሃ 8:12፤ 9:5 5:15 ማር 4:21፤ ሉቃ 8:16፤ 11:33 5:16 1ጴ፩ 2:12 5:18 ሉቃ 16:17 5:21 ኬሳ 20:13፤ ዛሬ 5:17

27 «ሃይሳፌ ካሴ፣ <ላይማቶፒቴ> ጌቴቶይሳ ሲቢዳታ። 28 ሺን ታ ሂንቴው ኦዳይሰ፣ ማጫሰ ጸሊዲ፣ አሞቲዳ ኡባይ ባ ዎዛናን ኢራ ላይማቴሰ። 29 ኔ ኡሻቻ አይፌይ ኔው ናጋራሰ ጋሶ ጊዲኮ፣ ኬሳ ሆላ። ኔ አሳቴላይ ኩሜላ ጋናሚ ታማን ዎቆናፔ ኔ አሳቴላፌ ኢሶይ ቆዩኮ ኔው ሎዎ። 30 ኔ ኡሻቻ ኩሼይ ኔው ናጋራሰ ጋሶ ጊዲኮ፣ ኢያ ቃንፃ ሆላ። ኔ አሳቴላይ ኩሜላ ጋናሚ ታማን ዎቆናፔ ኔ አሳቴላፌ ኢሶይ ቆዩኮ፣ ኔው ሎዎ።

ማቸ አዚና ቢሌላባ
(ማቶ 19:9፤ ማር 10:11-12፤ ሉቃ 16:18)

31 « ብ ማቸው ዩዲያ ኦኒካ አንጆ ዋርቃቲያ አሞ) ጌቴቲሰ።
32 ሺን ታ ሂንቴው ኦዳይሰ፤ ባ ማቸያ ላይማቶና ዳዒሺን ቢሊያ ኦኒካ ኢያ ላይማታና ሜላ ኦፊሰ። ሄሳዳካ፣ አንጆቲዳ ማጫሲው ኤኪያ ኡባይ ላይማቴሰ።

ጫቆባ

33 «ሂንቴ ማይዛታኮ፣ <ዎርዶን ጫቆፊቴ፤ ሂንቴ ያሳ ሲንላን ጫቆዳይሳ ፖሊቴ> ጌቴቲዳይሳ ሲቢዳታ። 34 ሺን ታ ሂንቴው ኦዳይሰ፤ ኡባራካ ጫቆፊቴ። ያሳይ ኡቲያ አራታ ጊዲያ ጊሾ ሳሎን ጫቆፊቴ። 35 ኢያ ቶሆይ ዩዲያ ሶ ጊዲያ ጊሾ ሳዒንካ ጫቆፊቴ። ጌታ ካዉዋ ካታማ ጊዲያ ጊሾ ዩሩሳላሜንካ ጫቆፊቴ። 36 ሂንቴ ቢናናፔ ኢሱዋካ ቦሌ ዎይኮ ካሬሌ ኦላናው ዳንዳዎና ጊሾ ሂንቴ ሂንቴ ሁዒንካ ጫቆፊቴ። 37 ሄሳ ጊሾ፣ ሂንቴ ቃላይ፣ <ኤ> ዎይኮ <አካይ> ጊድ። ሄሳፌ ካሬ ኬዩይ ፃላሄፔ ዩሰ።

ሃሎ ኬያናው ኮሼና

38 « <አይፌ ጊሾ አይፌ፤ አቻ ጊሾ አቸ> ጌቴቲዳይሳ ሲቢዳታ። 39 ሺን ታ ሂንቴው ኦዳይሰ፤ ሂንቴ ቦላ ኢታባ ኦሊያ ኡራራ ኤቁቶፊቴ። ኦኒካ ኔ ኡሻቻ ሻካላ ባቁኮ ኔ ሃዲርሳ ሻካላካ ቢሳ። 40 ኢሲ አሲ ኔ ሻሚዚያ ኤካናው ኔና ሞቲኮ፣ ኔ ኮቲያ ጉጃዳ አማ። 41 ኢሲ አሲ ኔና ዎልቃን ባባ ቶሲዲ ኢሲ

5:27 ኬሳ 20:14፤ ዛሬ 5:18 5:29 ማቶ 18:9፤ ማር 9:47 5:30 ማቶ 18:8፤ ማር 9:43 5:31 ማቶ 19:7፤ ማር 10:4 5:32 ማቶ 19:9፤ ማር 10:11-12፤ ሉቃ 16:18፤ 1ቆር 7:10-11 5:33 ለዌ 19:12፤ ታይ 30:2፤ ዛሬ 23:21 5:34 ማቶ 23:22 5:35 ኢሳ 66:1፤ ማዝ 48:2 5:38 ኬሳ 21:24፤ ለዌ 24:20፤ ዛሬ 19:19

ሳቴ ኦጌ ባራ ባና ማላ ኔና ኡንዔሊኮ፡ ኢያራ ናሞዑ ሳቴ ኦጌ ባ። 42 ዋሲያ ኦደሰካ ኢማ፤ ኔፔ ታልዓናው ኮያ ኦናካ ዲጎፋ።

ኔ ሞርኬታ ሲቃ
(ሉቃ 6:27-28፣ 32-36)

43 « ኔና ደሴይሳ ደሳ፤ ኔና ኢጄይሳ ኢፃ፡ ጌቴቶይሳ ሲዒዳታ።
44 ሺን ታ ሂንቴው ኦዳይሰ፤ ሂንቴ ሞርኬታ ደሲቴ፤ ሂንቴና ቆሄይሳታሰ ዋሲቴ። 45 ሃሳሉ ሂንቴ ኦሊኮ፡ ሳሎን ዳዒያ ሂንቴ ኦዋሰ ሂንቴ ናይታ ገዳና። ኢ ኢታታሲኔ ሎዎታሰ ኦዋ ኬሴሰ፤ ዓሎታሲኔ ናጋራንቸታሰ ባ ኢራ ቡኪሴሰ። 46 ሂንቴና ደሲያ ኦሳ ዓላላ ሂንቴ ደሲኮ፡ ሂንቴው ኦይ ዋይቶይ ዳዒ? ሃሪ ኦቶሺን፡ ቃራፃ ቃንዒሴይሳቲካ ሃሳ ኦሎሶና። 47 ሂንቴ፡ ሂንቴ ኢሸታ ዓላላ ሳርሊኮ፡ ሃራታፔ ሃሪ ኦሊዳቲ? ሃሪ ኦቶሺን፡ ያሳ ኦማኖና ኦሳይካ ሃሳ ኦሎሶና። 48 ሂዛ፡ ሳሎን ዳዒያ ሂንቴ ኦዋይ ፖሎ ገደይሳሳ ሂንቴካ ፖሎ ገደቴ።

6

ማንቆታሰ ኢሞባ

1 «ኦሲ ቤዎ ገዲ ሂንቴ ሎዎ ኦሱዋ ኦሳ ሲንላን ኦሎናዳ ናጌቴቴ። ሃሳሉ ሃኖና ኢዒኮ ሳሎን ዳዒያ ሂንቴ ኦዋፔ ዋይቶ ዳሜኬታ።

2 «ሂንቴ ማንቆታሰ ኢሚያ ዋዴ ኦሳ ሲንላን ቦንቼታናው ገዲ ጨቦቲ ኦጊያ ደናኒኔ ኦይሁዴ ዋሳ ኬላታን ኦሌይሳዳ ኦሲ ቤዎ ገዲ ኦሎፊቴ። ታ ሂንቴው ቱማ ኦዳይሰ፤ ኤንቴ ባንታ ኩማላ ዋይቱዋ ኤኪደሶና። 3 ሺን ሂንቴ ማንቆታሰ ኢሚያ ዋዴ ሂንቴ ኡሻቻ ኩሼይ ኦሌይሳ ሂንቴ ሃዲርሳ ኩሼይ ኤርፖ፤ 4 ሂንቴ ኢሞይ ጌማን ገደ። ጌማን ኦሌይሳ ቤዒያ ሂንቴ ኦዋይ ሂንቴው ዋይቱዋ ቆንጨኙን ኢማና።

ዋሳባ
(ሉቃ 11:2-4)

5 «ዋሳ ዋሲሽ ጨቦታሉ ሃኖፕቴ። ኤንቴ፡ ባንታና ኦሲ ቤዎ ገዲ ኦይሁዴ ዋሳ ኬላኒኔ ኦጊያ ደናን ኤቂዲ ዋሴይሳ ደሶሶና። ታ ሂንቴው ቱማ ኦዳይሰ፤ ኤንቴ ባንታ ኩማላ ዋይቱዋ ኤኪደሶና። 6 ሺን ኔኒ ዋሲያ ዋዴ ኔ ሶ ጌላ፡ ዉላ ጎርዳዳ ጌማን ዳዒያ ኔ ኦዋኮ ዋሳ፤ ጌማን ኦሴቴዳይሳ ቤዒያ ኔ ኦዋይ

5:48 ሉዌ 19:2፤ ዛሬ 18:13 6:1 ማቶ 23:5 6:5 ሉቃ 18:10-14

ኔው ወይቱዋ አማና። 7 ሂንቲ ወሲያ ወዴ አማኖና አሳሉ ጮ ቃላ ዳርሲዲ ወሰፊቲ። ኤንቲ አዲሲ ወሲን ያሳይ ሲዔስ ጊዲ ቆገሶና። 8 ሂሳ ጊሾ፡ ኤንታይሳዳ ሃኖፒቲ። አይስ ጊኮ፡ ሂንቲ አዋይ ሂንቲው አይ ኮሺያኮ ሂንቲ ወሳናፒ ሲንፋቲዲ ኤሬስ።

9 «ሂዛ፡ ሂንቲ ያጊዲ ወሲቲ፡

ሳሎን ዴዲያ ኑ አዋው፡

ኔ ጌሻ ሱንፋይ አንጃቶ።

10 ኔ ካዎቲሳይ ዮ፡

ኔ ሼኔይ ሳሎን ሃኒዳይሳዳ

ሳዒንካ ሃኖ።

11 ጋላሳ ካላ ሃቺ ሃቺ ኑስ አማ።

12 ኔኒ ኑና ቆሂዳይሳታ፡ አቶ ጌይሳዳ፡

ኑስካ ኑ ቆሁዋ አቶ ጋ።

13 ኑና ኢታፔ አሻፌ አቲን

ፓጩን ጌልሶፋ።

[ካዎቲሳይ፡ ወልቃይኔ ቦንቸይ

ሜሪናው ኔሳ። አሚንዒ።]

14 «ሂንቲ ሂንቲና ቆሂዳይሳታ አቶ ጊኮ፡ ሳሎን ዴዲያ ሂንቲ አዋይ ሂንቲ ቆሁዋካ አቶ ጋና። 15 ሺን ሂንቲ ሃራ አሳ ናጋራ አቶ ጎና ኢጻኮ ሂንቲ አዋይ ሂንቲ ናጋራ አቶ ጌና።

ያማባ

16 «ሂንቲ ያሚያ ወዴ ጩቦታላ ካዮቶፊቲ። አይስ ጊኮ፡ ኤንቲ ያሚይሳ አሲ ኤራና ሜላ ባንታ ሶሞዑዋ ቂታዮሶና። ታ ቱማ ኑዳይስ፤ ኤንቲ ባንታ ወይቱዋ ኤኪደሶና።

17 «ሺን ኔኒ ያሚያ ወዴ ኔ ሶሞዑዋ ሜጫ፡ ኔ ሁዒያ ቲዬታ።

18 ሂሳዳ ኔ ኦሊኮ ኔ ያሚያ ያማይ አሳፔ ጌሚዳይሳ፡ ሺን ጌማን ዴዲያ ኔ አዋይ ኤሪያ ያማ ጊዳና። ጌማን ኦሴቲዳይሳ ቤዒያ ኔ አዋይ ኔው ወይቱዋ አማና።

ሳሎን ሻሎ ሺሾ

19 «ቢሊ ሚያሶን፡ ቢራቲ ሺዒያሶን፡ ካይሶይ ቦኪዲ ኤኪያሶን፡ ሃ ሳዒን፡ ሂንቲው ሻሎ ሺሾፒቲ። 20 ሺን ቢሊ ሞናሶን፡ ቢራቲ ሺያሶን፡ ካይሶይ ቦኪዲ ኤኮናሶን ሳሎን ሂንቲው ሻሎ ሺሺቲ። 21 ኔ ሻሎይ ዴዲያሶዋን ኔ ወዛናይ ዴዒና።

22 «አይፊይ አሳቴላሰ ጾምፔ። ሄሳ ጊሹ፣ ኔ አይፊይ ገፃ ጊዲኮ ኔ ኩሜላ አሳቴላይ ፖፖ ጊዴሰ። 23 ኔ አይፊይ ሃርጋንቸ ጊዲኮ ኔ ኩሜላ አሳቴላይ ቋማ ጊዴሰ። ሄዛ፣ ኔናን ዴዲያ ፖፖይ ቋማ ጊዲኮ፣ ቋማይ አይ ሜላ አዲዲ ቋማንዴሻ!

24 «ኢሲ አሲ ናምዑ ጎዳሰ ሃሬታናው ዳንዳዔና። ኢሱዋ ደሲኮ ሃንኩዋ ኢዳሰ፤ ዋይኮ ኢሱዋ ቦንቸኮ ሃንኩዋ ካዴሰ። ጾሳሲኔ ሚሼሰ ሃሬታናው ዳንዳዔኬታ።

**ኡንዔቶፊቴ
(ሉቃ 12:22-31)**

25 «ሂዛ፣ ሲዒቴ! ሂንቴ ዴፖን ዳናው፣ <አይ ማኔ? አይ ኡያኔ? አይ ማዓኔ?> ጊዲ ኡንዔቶፊቴ፤ ዴፖይ ካላፊ ዋይኮ ማፖፔ አዴኔ? 26 ሳሎ ካፎታ ያለቴ፤ ኤንቴ ዜሮኮና፣ ቡጮኮና፣ ሻሌን ዩጎኮና፣ ሺን ሂንቴ ሳሎ አዋይ ኤንታ ሙዜሰ። ሂንቴ ኤንታፊ ኬሂ አዴኬቲ? 27 ሂንቴ ጊዴፊ ዳሮ ኡንዔቲዲ ባ ላይላ ቦላ ኢሲ ጋላሰ ጉጃናው ዳንዳዔይ ዴዒ?

28 «ቃሲ ሂንቴ ማዲያባሰ አይሰ ኡንዔቲቴ? አኔ ጪሻታ ቤዒቴ፣ ኦሶን ዳቡሮኮና ዋይኮ ሱቆኮና። 29 ሲዒቴ! ሃሬ አቶሺን፣ ካዉዋ ሶሎሜይ ባ ቦንቸ ኡባን ሃ ጪሻታፔ ኢሱዋ ሜላካ ማዲቤና። 30 ሂንቴኖ፣ አማኖይ ፓጪዳይሳቶ፣ ጾሳይ ሃቸ ቤንቴዲ ዋንቶ ታማን ዋቆናው ዴዲያ ማታ ያቲዲ ማይዚያባ ጊዲኮ፣ ሂንቴና ኤንታፊ አሊዲ ዋቲ ማይዜኔ? 31 ሄሳ ጊሹ፣ <አይ ማኔ? አይ ኡያኔ? አይ ማዓኔ?> ጊዲ ኡንዔቶፊቴ። 32 ሄ ኡባ ጾሳ አማኖና አሳይ ዳርሲዲ ዴማናው ኡንዔቶሶና። ሂንቴ ሳሎ አዋይ ሄ ኡባይ ሂንቴው ኮሼይሳ ኤሬሰ። 33 ሺን ኡባፊ ሲንጼ ጾሳ ካዋቴላኔ ኢያ ዲሎቴላ ኮዩቴ፤ ሄ ኡባይ ሂንቴው ጉጂ ኢሜታና። 34 ሄሳ ጊሹ፣ ዋንቶሰ ቆፒሼ ኡንዔቶፊቴ። ዋንቶይሲ ዋንቶሰ አቆ፤ ኢሲ ኢሲ ጋላሳይ ባው ጊዲያ ሜቶራ ዴዒሰ።

7

**ሃራታ ቦላ ፒርዶፊቴ
(ሉቃ 6:37-42)**

1 «ሂንቴ ቦላ ፒርዶቶና ሜላ ሃራታ ቦላ ፒርዶፊቴ። 2 አይሰ ጊኮ፣ ሃራታ ቦላ ሂንቴ ፒርዶይሳዳ ሂንቴ ቦላ ፒርዶታና፤ ሂንቴ ሃራታሰ ማኪዳባን ሂንቴው ዛሬ ማኬታና። 3 ኔ አይፊን ዴዲያ

ቱሱ ዳኔይሳ በዶና ኔ ኢሻ ኣይፊን ዳዒያ ቡሪያ ኣይሰ በዓይ?
4 ኔ ኣይፊን ቱሲ ዳዒሺን ኔ ኢሻ ኣይፊን ዳዒያ ቡሪያ ኬሶ
ጋናው ዋና ዳንዳዒይ? 5 ኔኖ ጨቡዋው፣ ኮይርታዳ ኔ ኣይፊን
ዳዒያ ቱሲ ዳኔይሳ ኬሳ። ኢያፔ ጉዬ፣ ኔ ኢሻ ኣይፊን ዳዒያ
ቡሪያ ኬሳናው ኔ ጌሻ ፃላና።

6 «ጉዬ ሲሚዲ ሂንቴና ሳፆና ማላ ጌሻባ ካናታሰ ዩጎፊቴ።
ባንታ ቶሁዋን ዩጲዲ ኢሶና ማላ ሂንቴ ኣልዎ ኢንቁዋ ጉዳንፊታ
ሲንሳን ዩጎፊቴ።

ዋሲቴ፣ ኮዩቴ፣ ፃጊቴ
(ሉቃ 11:9-13)

7 «ዋሲቴ ሂንቴው ኢሜታና፣ ኮዩቴ ሂንቴ ዳማና፣ ካሬ ዩዲ
ፃጊቴ ሂንቴው ደዩታና። 8 ዋሲያ ኦዴሰካ ኢሜታና፣ ኮያ ኦዴሰካ
በንታና፣ ካሬ ዩዲ ፃጊያ ኦዴሰካ ደዩታና።

9 «ሂንቴ ጊዶፊ ባ ናዒ ኡይሉ ዋሲኮ ሹቺ ኢሜይ ኦኔ?
10 ዋይኮ ሞሎ ዋሲኮ ሹሺ ኢሜይ ዳዒ? 11 ያቲን ሂንቴ ኢታ
ጊዲሼ ሂንቴ ናይታሰ ሎዎባ ኢሞ ኤሪኮ፣ ሂንቴ ሳሎ ኣዋይ ባና
ዋሲይሳታሰ ሎዎባ ዋቲ ዳርሲዲ ኢሜኔ? 12 ሃራቴ ሂንቴው
ኦላና ማላ ሂንቴ ኮያባ ኡባ ሂንቴካ ሃራታሰ ኦሉቴ። ኣይሰ ጊኮ፣
ሙሴ ሂጌይ ናቤቲ ታማርሴይ ሃይሳ።

13 «ፀንሳ ዉላራ ጌሊቴ፤ ኣይሰ ጊኮ፣ ጳዮሰ ኤፊያ ኦጌይ ዋጋ፣
ዉላይካ ዳልጋ። ኢያራ ጌሊያ ኣሳይካ ዳር። 14 ሸን ዳዑዋኮ
ኤፊያ ኦጌይ ዉላይ ፀንሳ፤ ያ ጌሊያ ኣሳይካ ጉላ።

ሚሊ ባ ኣይፊን ኤሬቴሰ
(ሉቃ 6:43-44)

15 «ቦላ ባጋራ ደርሴ ዳኒዲ ባንታ ጋላን ሱፉሜ ጊዲዲ ሂንቴ
ጊዶ ጌሊያ ዋርዳንቸ ናቤታፔ ናጌቴቴ። 16 ሂንቴ ኤንታ፣ ኤንታ
ኣይፊያፔ ኤራና፤ ኣጉንሳፊ ዋይኔይ፣ ከንቸቴፔ ላዳይ ማፃቴና።
17 ሂሳ ሚሊ ሎዎ ሚሊ ኡባይ ሎዎ ኣይፊ ኣይፊሰ፤ ኢታ ሚሊ
ኢታ ኣይፊ ኣይፊሰ። 18 ሎዎ ሚሊ ኢታ ኣይፊ ኣይፊና፣ ቃሲ
ኢታ ሚሊ ሎዎ ኣይፊ ኣይፋናው ዳንዳዒና። 19 ሎዎ ኣይፊ
ኣይፎና ሚሊ ኡባይ ቃንፃቲዲ ታማን ፀጌታና። 20 ሂሳ ጊሹ፣
ሂንቴ ኤንታ፣ ኤንታ ኣይፊያን ኤራና።

21 «ሳሎን ዳዒያ ታ ኣዋ ሸኒያ ኦሊያ ኡራይ ሳሎ ካዋቴሊ
ጌላናቴ ኣቲን ጮ ታና ሳዳው፣ ሳዳው፣ ጊያ ኡባይ ሳሎ ካዋቴሊ

ጌሌና። 22 ፐርዳ ጋላስ ዳርቲ፣ ሳዳው፣ ሳዳው፣ ኔ ሱንጻን ቲንቢቲ ኦዲቦኮ? ኔ ሱንጻን ቲና ኣያናታ ኬሲቦኮ? ኔ ሱንጻን ማላታታ ኦሲቦኮ? ያጋና። 23 ሄ ዎዴ ታኒ፣ ታ ሂንቴና ኡባራካ ኤሪኬ፣ ሂንቴ ኢታ ኦሴይሳቲ ታፔ ሃኪቴ) ያጋና።

24 «ሂዛ፣ ሃ ታ ቃላ ሲዒዲ ኦሲያ ኦኒካ ባ ኬላ ሹቻ ቦላ ከዳዳ ዎዛናማ ኣሳ ማላ። 25 ኢራይ ቡኪሰ፣ ዲያይ ዲዒሰ፣ ጫርኮይካ ጫርኪዲ ሄ ኬላ ሱጊሰ። ሺን ኬላይ ሹቻ ባሶ ቦላ ከዳቲዳ ጊሾ ኩንዲቤና። 26 ሃ ታ ቃላ ሲዒዲ ኦላና ኦኒካ ባ ኬላ ሻፌ ቦላ ከዳዳ ኤያ ኡራ ማላ። 27 ኢራይ ቡኪዲ፣ ዲያይ ዲዒዲ፣ ጫርኮይካ ጫርኪዲ፣ ሄ ኬላ ሱጊን፣ ሄ ኬላይ ኩንዲሰ፤ ኢያ ኩንዳላይካ ዎልቃማ» ያጊሰ።

28-29 ዩሱሲ ባ ኦዳ ኦንጊዳ ዎዴ ኢያ ቲሚርቲይ ሂጌ ኣስታማሬታ ማላ ጊዶና ማታራ ጊዲያ ጊሾ ኣሳይ ኢያ ቲሚርቲያን ማላሌቲዶሶና።

8

ዩሱሲ ባር ሃርጋንቹዎ ፓሊስ (ማር 1:40-45፤ ሉቃ 5:12-16)

1 ዩሱሲ ዳሪያፔ ዎዲያ ዎዴ ዳር ኣሳይ ኢያ ካሊዶሶና። 2 ሄኮ ኢሲ ባር ሃርጋንቹይ ኢያኮ ሸቂዲ፣ ኢያ ሲንጻን ጉልባቲዲ፣ «ሳዳው፣ ኔ ሸኔ ጊዲኮ ታና ጌሻዳ ፓላናው ዳንዳዳሳ» ያጊሰ። 3 ዩሱሲ ባ ኩሺያ ዩዲዲ ኢያ ቦቲዲ፣ «ኤ፣ ታ ሸኔ፣ ፓፃ» ያጊሰ። ኡራይ ኢራካ ጌዪ ኣጊሰ። 4 ዩሱሲ ኢያኮ፣ «ኔ ፓፀዎ ኦዳሰካ ኦዶፓ። ሺን ባዳ ኔ ጌያዳ ፓይይሳ ካሂኔ ቤሳ። ኔ ፓፀዎስ ማርካ ጊዶና ማላ ባዳ ሙሴይ ከቲዳ ያርሹዎ ያርሻ» ያጊሰ።

ማቶ ሃላቃ ኣማኑዎ

5 ዩሱሲ ቂፊርናሆሚ ካታማ ጋኪዳ ዎዴ ኢሲ ማቶ ሃላቃይ ኢያኮ ሸቂዲ፣ 6 «ሳዳው፣ ታ ኣይሌይ ኣሳቲላይ ጉንዲን ዳር ሃርጌቲዲ፣ ሶን ዘንዒዲ ዳዔሰ» ያጊዲ ዎሲሰ።

7 ዩሱሲ ዛሪዲ፣ «ታኒ ባዳ ኢያ ፓላና» ያጊሰ።

8 ሺን ማቶ ሃላቃይ ዛሪዲ፣ «ሳዳው፣ ኔ ታ ሶ ጌላናው ቤሲያ ኣሲ ጊዲኬ፣ ሺን ኔ ሃን ኡታዳ ቃላ ዓላላ ኦዳ፣ ታ ኣይሌይ ፓፃና። 9 ኣይሰ ጊኮ፣ ታፔ ቦላራ ታ ኪቲቲያ ኣሳቲ ዳዎሶና፣ ቃሲ ታፔ ጋርሳራ ታው ኪቲቲይሳቲ ዳዎሶና። ኤንታፌ ኢሱዎ፣

«ባ» ጊያዴ ቤስ፤ ሃንኩዋ ቃሲ «ሃያ!» ጊያዴ ዬስ። ታ ኣይሊያ፣
«ሃይሳ ኦላ» ጊያዴ ኦላስ» ያጊስ።

10 ዬሱሲ ሄሳ ሲዒዳ ዋዴ ማላሌቲዲ፣ ባና ካሊያ ኣሳኮ።
«ታ ሂንቲው ቱማ ኦዲይስ፤ ታኒ ሃይሳ ማላ ኣማኖ ኢስራዔል
ኣሳንካ ቢባቢኮ። 11 ታ ሂንቲው ኦዲይስ፤ ዳርቲ ዶሎሃፕኔ
ወሎሃፕ ዩዲ፣ ሳሎ ካዎቲሳን ኣብራሃሜራ፣ ዩሳቃራኔ ያይቆባራ
ኢሲፌ ኣማቶ ቦላ ኡታና። 12 ሺን ሳሎ ካዎቲሳ ላታናው
ቤሲሺን ኣቲዳይሳቲ ካሬ ቆማን ሆሌታና። ያን ኤንታው ዬሆኔ
ኣቻ ጋርጨዳ ጊዳና» ያጊስ።

13 ዬሱሲ ማቶ ሃላቃኮ፣ «ኔ ሶ ባ፣ ኔ ኣማኑዋሶ ኔው ሃኖ»
ያጊስ። ኢያ ኣይሌይ ሶሁዋራ ፓዲ ኣጊስ።

ዬሱሲ ዳር ሃርጋንኛታ ፓሊስ
(ማር 1:29-34፤ ሉቃ 4:38-41)

14 ዬሱሲ ጳዲሮሳ ሶ ጌሊያ ዋዴ ጳዲሮሳ ማቼ ኢያ ቆዎ ሚሻ
ሃርጊን ሳኬታዳ ዚንዒዳር ቤዒስ። 15 ዬሱሲ ኢ ኩሺያ ቦቹዳ
ዋዴ ቆዎኔ ሚሻይ ኣጊ ኣጊስ። ፓዎ ዳንዳዳ ኢያ ሞክሱ።

16 ሄ ዋዴ ኦማርሲ ቱና ኣያናን ኦይኬቲዳ ዳር ኣሳታ፣ ኣሳይ
ዬሱሳኮ ኤሂዳሶና። ኢካ ቱና ኣያናታ ባ ቃላን ኬሲስ፣ ሃርጋንኛታ
ኡባ ፓሊስ። 17 ሄሳንካ ናቢያ ኢሳያሲ፣

«ኢ ኑ ሃርጊያ ባው ኤኪስ፣

ኢ ኑ ሃርጊያ ቶኪስ»

ጊዳ ቃላይ ፖሌቲስ።

ዬሱሳ ካሎይ ጨጊሲያ ጋቲያ
(ሉቃ 9:57-62)

18 ዬሱሲ ዳር ኣሳይ ኢያ ዩሹዋን ኤቁዳይሳ ቤዒዲ፣ ኣባፌ
ሄፊንሉ ፒናና ማላ ባ ታማሬታ ኪቲስ። 19 ሂጌ ኣስታማሬታፕ
ኢሶይ፣ «ኣስታማሬያው፣ ኔ ቢያሶ ኡባ ታ ካላና» ያጊስ።

20 ዬሱሲ ኢያኮ «ዋርካናታስ ኦሊ ዴዔስ፣ ሳሎ ካፎታስ ኬሊ
ዴዔስ። ሺን ኣሳ ናባስ ባ ሁዒያ ሺምፕሲያ ቤሲ ባዋ» ያጊስ።

21 ዬሱሳ ካሊያ ኣሳታፕ ኢሶይ፣ «ሳዳው፣ ታኒ ሲንሳታ ባዳ
ታ ኣዋ ሞጋዳ ያና» ያጊስ።

22 ሺን ዬሱሲ፣ «ሃይቁዳይሳቲ ባንታ ሃይቆታ ሞሳ፤ ኔኒ ታና
ካላ» ያጊስ።

ዬሱሲ ሆቢያ ሲሲ ኦሊስ
(ማር 4:35-41፤ ሉቃ 8:22-25)

23 ዬሱሲ ባናው ዋጎሉዋን ጌሊዳ ዋዴ ኢያ ታማሬቲካ ኢያራ ባናው ጌሊዳሶና። 24 ኤንቲ ቆፖና ዴሲሺን፣ ዋልቃማ ሆቤይ ሃላ ቦላ ዴንዲን ዋጎሎይ ሚቲታናው ጋኪስ። ሺን ዬሱሲ ጳሰኪስ። 25 ኢያ ታማሬቲ ኢያኮ ሺቁዲ ኢያ ባርኬሊዲ፣ «ጎዳው፣ ኑ ቆዮስ ኑና አሻርኪ» ያጊደሶና።

26 ዬሱሲ ኤንታኮ፣ «ሂንቴኖ፣ አማኖይ ፓጩዳይሳቶ፣ አይሰ ያዬቲ?» ያጊሰ። ዴንዲዲ፣ ሆቢያኔ ጎቲያ ኤሲስ። ኤሌሲዲ ኡባባይ ሲሲ ጊስ።

27 ኢያ ታማሬቲ ማላላቲዲ፣ «ሃይሲ፣ ሃሪ አቶሺን፣ ሆቤይኔ ጎቴይ ከቴቲይሲ ዋኒዳ አሴ?» ያጊደሶና።

ቱና አያናይ ኦይኪዳ ናምዑ አሳታ
(ማር 5:1-20፤ ሉቃ 8:26-39)

28 ዬሱሲ አባሬ ሄሬንላን ዴሲያ ጌርጌሶኔ ጊያ ቢታ ጋኪዳ ዋዴ ቱና አያናይ ኦይኪዳ ናምዑ አሳቲ ዱፎፔ ኬዪዲ ኢያራ ጋሂቲደሶና። ኤንቲ ዳሮ ኢታኔ ያሺያ አሳታ ጊዲያ ጊሾ አሲ ሄ ቤሳራ አቆናው ዳንዳዔና። 29 ኤንቲካ፣ «ጾሳ ናባው፣ ኑናኔ ኔና አይቤ ጋሴይ? ዋዴይ ጋኮና ዴሲሺን ኑና ፐርዳናው ያዲ?» ጊዲ ዋሲደሶና።

30 ኤንታፊ ዳሮ ሃኮና ጉዲንሶ ዉዴይ ሄማቴሰ። 31 ቱና አያናቲ ዬሱሳ፣ «ኔ ኑና ኬሳናባ ጊዲኮ፣ ሂኒ ጉዲንሶ ዉዲያ ጊዶ ዬዳርኪ» ያጊዲ ዋሲደሶና።

32 ዬሱሲ፣ «ቢቲ» ያጊሰ። ቱና አያናቲ አሳታፔ ኬዪዲ ጉዲንሶታን ጌሊደሶና። ጉዲንሶቲ ኡባይ አፎ ደናራ ዲርጊዲ ቢዲ አባን ሚቲቲዲ ሃይቂደሶና።

33 ጉዲንሶ ዉዲያ ሄማይሳቲ ባቃቲዲ ካታማ ቢዲ፣ ሂኒዳባኔ ቱና አያናይ ኦይኪዳ አሳታ ቦላ ኦሴቲዳባ ኡባ ኦዲደሶና።

34 ያቲን፣ ካታማን ዴሲያ አሳ ኡባይ ዬሱሳ ቤባናው ኬዪደሶና። ኤንቲ ዬሱሳ ቤባዳ ዋዴ ባንታ ቢታፊ ኬዪዲ ባና ማላ ዋሲደሶና።

9

ጉንዳ ኡራ ፓፀዋ
(ማር 2:1-12፤ ሉቃ 5:17-26)

1 ሄሳፊ ጉዬ፣ ዬሱሲ ዋጎሉዋን ጌሊዲ፣ አባ ፒኒዲ ባ ካታማ ቢስ። 2 ሃኒዳ ጉላ አሳቲ ኢሲ ጉንዳ ኡራ አልጋራ ቶኪዲ

ዩሱሳኮ ኤሂደሶና። ዩሱሲ ኤንታ አማኑዋ ቤዒዲ፣ ጉንዳ ኡራ፣ «ታ ናዓው፣ ያዮፋ! ኔ ናጋራይ አቶ ጌቴቲስ» ያገለገለ።

3 ሄ ሳቲያን፣ አይሁዳ ሂጌ አስታማሬታፕ ኢሶቲ ኢሶቲ፣ «ሃይሲ ያሳ ጫሼ ጊዳኔ» ያገላገላ ባንታ ዋዛናን ቆፒደሶና።

4 ዩሱሲ ኤንታ ቆፋ ኤሪዲ፣ «ኢታባ ሂንቴ ዋዛናን አይሰ ቆፕቲ? 5 ሃኖሺን፣ ሄ ናጋራይ አቶ ጌቴቲስ) ጌይሳፌኔ ለዳንዳ ኤቃዳ ባ) ጌይሳፌ አዉሲ ካዉዪ? 6 ሺን ሳዓ ቦላ ናጋራ አቶ ጋናው አሳ ናዓስ ማቲ ዴዔይሳ ታ ሂንቴና ኤሪሳና» ያገላገላ፣ ጉንዳ አዲያኮ፣ «ዳንዳ ኤቃ፣ ኔ አልጋ ቶካዳ፣ ኔ ሶ ባ» ያገለገለ።

7 ጉንዳ ኡራይ ዴንዲዲ ባ ሶ ቢስ። 8 ዴሬይ ሄሳ ቤዒዲ ማለሌቲደሶና። ሄሳ ማላ ማታ አሳስ ኢሚዳ ያሳ ጋለቲደሶና።

ማቶ 9 ዌጌቲሳ
(ማር 2:13-17፤ ሉቃ 5:27-32)

9 ዩሱሲ ያፔ ዴንዲዲ ቢሼ ማቶሳ ጌይሳ ቃራፃ ቃንዲሲያ ቤሳን ኡቲዳሺን ቤዒዲ፣ «ታና ካላ» ያገለገለ።

ኢካ ዴንዲዲ ካሊስ።

10 ዩሱሲ ማቶሳ ሶን ጋይታ ቦላ ኡቲዳሺን፣ ቃራፃ ቃንዲሲያ ዳር አሳቲኔ ናጋራንቸቲ ዩዲ ኢያራኔ ኢያ ታማሬታራ ኢሲፌ ማናው ኡቲደሶና። 11 ኢሲ ኢሲ ፋሪሳዌቲ ሄሳ ቤዒዲ፣ ዩሱሳ ታማሬታ፣ «ሂንቴ አስታማሬይ ቃራፃ ቃንዲሲይሳታራኔ ናጋራንቸታራ አይሰ ሚ?» ያገደሶና።

12 ዩሱሲ ሄሳ ሲዒዲ፣ «ጳሌ ኮሼይ ሃራጋንቸታሳፌ አቲን ፓፃታሳ ጊዳና። 13 ሺን ሂንቴ ቢዲ፣ ታኒ ሂንቴ ያርሹዋ ጊደናሺን ሂንቴ ሃራታ ማራና ማላ ኮያይስ) ጌቴቲዲ ፃፌቲዳይሲ ዋይ ጉሴኮ ኤሪቲ። አይሰ ጊኮ፣ ታኒ ናጋራንቸታ ዌጋናው ያሲፔ አቲን ዌሎታ ዌጋናው ያሲኬ» ያገለገለ።

ዩሱሲ ያማባ አይሸቲስ
(ማር 2:18-22፤ ሉቃ 5:33-39)

14 ሄ ዋዴ ዮሃንሳ ታማሬቲ ዩሱሳኮ ሸቂዲ፣ «ኩኔ ፋሪሳዌቲ ያሞስ፣ ሺን ኔ ታማሬቲ አይሰ ያሞኮና?» ያገላገላ አይቺደሶና።

15 ዩሱሲ ዛሪዲ ኤንታኮ፣ «ሙሹራይ ኤንታራ ዴዒሺን ዌጌቲዲ ዩዳ አሳይ ካዮታናው ዳንዳዖና? ሙሹራይ ኤንታ ማታፕ ኤኬታና ዋዴይ ያና፣ ኤንቲ ሄ ዋዴ ያማና።

16 «ኦራላ ማግኘቴ ፔዲዲ ጋልዓ ማግ ስላ ሲኬይ ኦኒካ ባዎ። ሄሳሉ ኦሊኮ ኦራላይ ጋልዓ ፔዲዲ። ፔዲላይካ ጉጂ ዳልጌሰ።
 17 ኦራላ ዋይኔ ጋልዓ ኦጎሮን ቆሊያ ኦኒካ ባዎ። ሄሳሉ ኦሊኮ ኦራላ ዋይኔይ ጋልዓ ኦጎሮዎ ቆሊኦስ ዋይኔይካ ጉኬሰ፤ ኦጎሮይካ ናምዓንሉ ማደናባ ገደሰ። ሺን ኦራላ ዋይኔይ ኦራላ ኦጎሮን ቆሊታናው ቤሴሰ። ሄሳሉ ኦሴቲኮ ናምዓይካ ኢቶና ናጌቶሶና» ያገሰ።

ሃይቂዳ ናዒዉኔ ዬሱሳ ኣፊላ ቦቺዳ ማጫሲው
 (ማር 5:21-43፤ ሉቃ 8:40-56)

18 ዬሱሲ ሄሳ ኦዶ ስላ ዳዒሺን፣ ኣይሁዳ ሃላቃታፔ ኢሶይ ኢያኮ ዩዲ፣ ኢያ ሲንሳን ጉልባቲዲ፣ «ታ ናዒያ ሃዒ ሃይቃሱ፣ ሺን ኢያ ፓፃና ማላ ኔኒ ያዳ ኔ ኩሺያ ኢ ስላ ዋላርኪ» ገዲ ዋሲሰ።
 19 ዬሱሲ ዳንዲዲ ኢያራ ቢሰ፤ ኢያ ታማሬቲካ ካሊደሶና።

20 ኢ ቢሺን ታማኔ ናምዑ ላይሌ ኩማሌ ሱሌ ጎገዲ ዋይሲያ ኢሲ ማጫሲያ ጉዬራ ሺቃዳ ዬሱሳ ኣፊላ ማጫራ ቦቻሱ።
 21 ኢያ ባ ዋዛናን፣ «ታ ኢያ ኣፊላ ማጫራ ፃላላ ቦቺያኮ ፓፃና» ያገዳ ቆፓሱ።

22 ዬሱሲ ጉዬ ሰሚ ኢዮ ጸሊዲ፣ «ታ ናቲ፣ ያዮፋ! ኔና ኔ ኣማኖይ ፓሕሰ» ያገሰ። ማጫሲያ ስሁዋራ ፓፃ ኣጋሱ።

23 ዬሱሲ ኣይሁዳ ሃላቃ ሶ ጋኪያ ዋዴ ዛዬ ፑኔይሳታኔ ዬኬይሳታ ቤዒዲ፣ 24 «ኣኔ ከቺቲ፤ ጉላ ናዒያ ቋሰካሱፔ ኣቲን ሃይቃቡኩ» ያገሰ። ሺን ኣሳይ ኢያ ስላ ሚጪደሶና። 25 ኣሳ ካሬ ኬሲዳፔ ጉዬ ሶ ጌሊዲ፣ ናዒ ኩሺያ ኦይኪሰ፣ ናዒያ ዳንዳ ኤቃሱ። 26 ሄ ዋሬይ ሄ ቢታ ኡባ ጋኪሰ።

ዬሱሲ ናምዑ ቆቂታ ጸሊሲሰ

27 ዬሱሲ ያፔ ዳንዲዲ ጌዴ ሲንሌ ቢያ ዋዴ ናምዑ ቆቂቲ ባንታ ቃላ ቆቆ ኣሌዲ፣ «ዳዊቲ ናዒው፣ ኦና ማራርኪ» ያገሺ ኢያ ካሊደሶና።

28 ዬሱሲ ሶ ጌሊዲ ዋዴ ቆቂቲ ኢያ ካሊዲ ዩደሶና። ዬሱሲ ኤንታኮ፣ «ታኒ ሄሳ ኦላናው ዳንዳዔይሳ ሂንቲ ኣማኔቲ?» ያገሰ። ኤንቲካ፣ «ኤ፣ ጎዳው» ያገዲ ዛሪደሶና።

29 ሄሳፊ ጉዬ፣ ዬሱሲ ኤንታ ኣይፊያ ቦቺዲ ኤንታኮ፣ «ሂንቲው፣ ሂንቲ ኣማኑዋላ ሃና» ያገሰ። 30 ኤንታ ኣይፊይካ ደዬቲሰ። ዬሱሲ ኤንታኮ፣ «ሃይሳ ኦዴሰካ ኦደፒቲ» ያገዲ ሚንሌ ኦዲሰ። 31 ሺን ኣሳቲ ቢዲ ዬሱሳባ ሄ ቢታ ኡባን ኦዲደሶና።

32 ኤንቴ ያፔ ኬያ ዋዴ አሳይ ቱና አያናይ ኦይኪዲ ሙሚሲዲ ኢሲ አሲ ዩሱሳኮ ኤሂደሶና። 33 ቱና አያናይ ኬዩዳፔ ጉዬ ሙሚ ኡራይ ኦዴቲሰ። ዴሬይካ ማላሌቲዲ፣ «ሃይሳ ሜላ ኦራላባይ ኢሰራዔሌ ቢታን ሃኒቤና» ያገደሶና።

34 ሺን ፋሪሳዌቲ፣ «ቱና አያናታ ሃላቃን ቱና አያናታ ኬሴሰ» ያገደሶና።

ዩሱሲ አሳሰ ቃዴቲሰ

35 ዩሱሲ አይሁዴ ዋሳ ኬላታን ታማርሲሼ፣ ሳሎ ካዋቲላ ዋንጌላ ሳባኪሼ፣ አሳ ሃርጌ ኡባፌ ፓሊሼ ካታማታኒኔ ጉታ ኡባን ዩዩሰ። 36 ዳር ዴሬይ፣ ሂሚያ አሲ ባይና ደርሳዳ ኤንታና ቤዒያ አሲ ቆዩን ኡንዔቲዲ ዴዔይሳታ ቤዒዲ ኤንታው ቃዴቲሰ። 37 ባ ታማሬታኮ፣ «ሺቃና ካላይ ዳር፣ ሺን ካላ ሺሺያ አሳይ ጉላ። 38 ሂሳ ገሹ፣ ጎዳይ ካላ ሺሺያ ኦሳንቸታ ዩዳና ሜላ ዋሲቲ» ያገሰ።

10

ዩሱሲ ኪቲዳ ታማኔ ናምዑ ሃዋሬታ
(ማር 3:13-19፤ ሉቃ 6:12-16)

1 ዩሱሲ ታማኔ ናምዑ ታማሬታ ባኮ ዪጊዲ፣ ቱና አያናታ ኬሳና ሜላኔ ሃርጌ ኡባ ፓላና ሜላ ኤንታው ማታ ኢሚሰ።

2 ዩሱሲ ኪቲዳ ታማኔ ናምዑ ሃዋሬታ ሱንላይ፣ ኮይርይ ጳዔርሳ ጊያ ሲሞናኔ ኢያ ኢሻ ኢንዲሪያሳ፣ ዛብዲዮሳ ናዓ ያይቆባኔ ኢያ ኢሻ ዮሃኒሳ፣ 3 ፊልጶሳኔ ባርቶሎሚዮሳ፣ ቶማሳኔ ቃራፃ ቃንዪሲያ ማቶሳ፣ ኢልልዮሳ ናዓ ያይቆባ፣ ታዲዮሳ፣ 4 ባ ቢታሰ ሚሼቲያ ሲሞናኔ ዩሱሳ አሊ ኢሚዳ አሰቆርታ ዩሁዳ።

5 ሄ ታማኔ ናምዓታ ዩሱሲ ኪቲዲ ዩዲሼ፣ «አይሁዴ ጊደና ዴሪያኮ ቦፒቲ፣ ቃሲ ሳማሬታ ካታማካ ጌሎፒቲ። 6 ሺን ኢሰራዔሌ ኬላፌ ጊዲዳ ሂኒ ቆዩዳ ደርሳታኮ ቢቲ። 7 ያ ቢዲ፣ ሳሎ ካዋቲላይ ማታቲሰ» ጊዲ ኦዲቲ። 8 ሃርጋንቸታ ፓሊቲ፣ ሃይቁዳይሳታ ሃይቆፔ ዴንሊቲ፣ ባር ሃርጋንቸታ ጌሺ ፓሊቲ፣ ቱና አያናታ ኬሴቲ። ሂንቲ ጮ ኤኪዳይሳ ጮ ኢሚቲ። 9 ሂንቲ ኪሴን ዋርቃ፣ ዋይኮ ቢራ ሳንቲሜ ኦይኮፊቲ። 10 ሂንቲ ኦጊያሰ ካርዒቶ።

9:34 ማቶ 10:25፤ 12:24፤ ማር 3:22፤ ሉቃ 11:15 9:35 ማቶ 4:23፤ ማር 1:39፤ ሉቃ 4:44 9:36 ታይ 27:17፤ 1ካዋ 22:17፤ 2ታሪ 18:16፤ ሂዝ 34:5፤ ማር 6:34 9:37 ሉቃ 10:2 10:7 ሉቃ 10:4-12

ናምዑ አፊላ፣ ወይኮ ጫማ ወይኮ ፃምዓ አይኮፊቲ፤ ኦሳንቹዋስ ጋላሳ ካሊ ኮሼስ።

11 «ሂንቴ ኢሲ ካታማ ወይኮ ጉታ ጌሊያ ወዳ ሂንቴና ሞኪዲ ኤካናው ኡፋይቲያ ኡራ ኮዪዲ ኢያ ሶን ሸምፕቲ፤ ሂንቴ ባና ጋካናው ያን ጋምዒቲ። 12 ቃሲ ኦዳ ሶካ ጌሊሼ ሳርሊቲ። 13 ሄ ኬላይ ሂንቴና ሞኪኮ ሂንቴ ሳርሊዳ ሳርይ ኤንታና ጋኮ፣ ሺን ኤንቲ ሞኮና ኢዳኮ ሂንቴ ሳርሊዳ ሳርይ ሂንቴው ጉዬ ሲሞ። 14 እነካ ሂንቴና ሞኮናኔ ሂንቴ ኦዲያባ ሲዖና ኢዳኮ ሄ ኬላፊ ወይኮ ሄ ካታማፔ ኬዪሼ ሂንቴ ቶሁዋን ዴዒያ ባና ፒቲዲ ኬዪቲ። 15 ታ ሂንቴው ቱማ ኦዳይስ፤ ያሳ ፒርዳ ጋላሳን ሄ ካታማፔ ሶዶሜሲኔ ጋሞራ ካታማታስ ፒርዳይ ካወያና።

16 «ታ ሂንቴና ደርሳታዳ ሱቋሜታ ገደ ዬዳና። ሄሳ ገሾ፣ ሸሻዳ ጨንጫታ፣ ሆሌዳ አዳታ ገዲቲ። 17 አሳይ ሂንቴና ፒርዳ ዳይናታስ አሊ ኢማና፣ ቃሲ አይሁዳ ዋሳ ኬላን ሂንቴና ጋራፋና። ሄሳ ገሾ፣ ኤንታፊ ናጌቲቲ። 18 ታ ገሾ ገዲ ሂንቴና ዴሪያ ሃሪይሳታ ሲንሌኔ ካዎታ ሲንሌ ኤፋና። ኤንታ ሲንላኒኔ አይሁዳ ገደና ዴሪያ ሲንላን ኤቂዲ ሂንቴ ታባ ማርካታና። 19 ሺን ሂንቴና ፒርዳስ አሊ ኢማያ ወዳ ወይገዲ ዛሪና ገዲ ኡንዔቶፊቲ፤ ሄ ሳቲያን ሂንቴ ጋናባ ያሳይ ሂንቴው ኢማና። 20 አይስ ገኮ፣ ሂንቴናን ሃሳዬይ ሂንቴ አዋ ጌሻ ኢያናፔ ኣቲን ሂንቴና ገዴኬታ።

21 «ኢሻይ ባ ኢሻ፣ አዋይ ባ ናዓ፣ ሃይቆስ አሊ ኢማና፣ ናይቲ ባንታና ዬሊዳይሳታ ቦላ ዴንዲዲ ኤንታና ዎቋሳና። 22 ታ ገሾ ገዲ አሳ ኡባይ ሂንቴና ኢፃና፣ ሺን ወርሴሊ ጋካናው ሚኒዳይ አታና። 23 ኢሲ ሄራፔ ሂንቴና ኤንቲ ጎዲኮ ሃራ ካታማ ባቃቲቲ። ታኒ ሂንቴው ቱማ ኦዳይስ፤ አሳ ናዓይ ያና ጋካናው፣ ሂንቴ ኢሰራዔሌ ካታማ ኡባ ካንሌኬታ።

24 «ታማሪይ ባ አስታማሪያ፣ አይሌይ ባ ጎዳፔ አጴና። 25 ታማሪይ ባ አስታማሪያ፣ አይሌይ ባ ጎዳ ዳኒኮ ኢያው ገዳና። ኬላዋ ቢዔልዜቡላ ገኮ ኢያ ሶ አሳ ዋኒዲ ኢሲዲ ያጌኔ?

26 «ሂዛ፣ አሳስ ያዮፊቲ። ካሜቲዳባይ ቆንጮና፣ ቆሴቲዳባይ ጌሺ ኬዮና ኣቲና። 27 ታኒ ሂንቴው ቋማን ኦዲያባ ሂንቴ

10:10 1ቆር 9:14፤ 1ፃሞ 5:18 10:14 ሃ.ኦ 13:51 10:15 ማቶ 11:24፤ ሜጴ 19:24 10:16 ሉቃ 10:3 10:17 ማር 13:9-11፤ ሉቃ 12:11-12፤ 21:12-15 10:21 ማር 13:12፤ ሉቃ 21:16 10:22 ማቶ 24:9፤ ማር 13:13፤ ሉቃ 21:17፤ ማቶ 24:13፤ ማር 13:13 10:24 ሉቃ 6:40፤ ዮሃ 13:16፤ 15:20 10:25 ማቶ 9:34፤ 12:24፤ ማር 3:22፤ ሉቃ 11:15 10:26 ማር 4:22፤ ሉቃ 8:17

ፖፖን ኦዲቲ፤ ታ ሂንቴው ሃይላን ካልካሺዳባ ዳባባን አዋጁቲ።
 28 አሾፕ ኣቲን ሽምፖ ዋቋናው ዳንዳዖናይሳታሰ ያዮፊቲ። ሺን ሽምፖዋኔ አሾ-ዋ ጋናሜን ቋይሳናው ዳንዳዲያ ያሳሰ ያዩቲ።
 29 ናምዑ ቡቤቲ ኢሲ ሳንቲሜን ባይዜቶኮናዩ? ሃኖፕ ኣቲን፡ ኤንታፊ ኢሲናካ ሂንቴ ያሳይ ጎና ዳዒሺን ሳባን ዋቋኩ። 30 ሃሪ አቶሺን፡ ሂንቴ ሁዔ ቢናናይካ ፓይዳቲዲ ዳዔስ። 31 ሂዛ፡ ዳር ቡቤታፕ ሂንቴ አቋያ ጊሾ ያዮፊቲ።

32 «አሳ ሲንላን ታው ማርካቲያ ኡባሰ ታኒካ ሳሉዋን ዳዒያ ታ አዋ ሲንላን ማርካታና። 33 ሺን አሳ ሲንላን ታና ካዴይሳ ታኒካ ሳሎን ዳዒያ ታ አዋ ሲንላን ካዳና።

34 «ታኒ ሳባን ሳር ኤሃናው ዪዳ ሂንቴው ዳኖ። ታኒ ቶራፕ ኣቲን ሳርቴሌ ኤሃናው ያቢኬ። 35 ታኒ ዪዳይ፡ ናባ አዋፕ

ማጫ ናዒው አዩፕ ናባ ማቸው አዚና አዩፕ ሻካናሳ።
 36 አሳሰ ሞርኬቲ ኢያ ሶ አሳታ ጊዳና።»

37 «ታፕ አሌዲ ባ አዋ ዋይኮ ባ አዪው ደሴይ፡ ታባ ጊዳናው ቤሴና። ባ አዳ ናባ ዋይኮ ባ ማጫ ናዒው ታፕ አሌዲ ደሴይ፡ ታባ ጊዳናው ቤሴና። 38 ባ ማሰቃሊያ ቶኪዲ ታና ካሎና ኦኒካ ታባ ጊዳናው ቤሴና። 39 ባ ሽምፖዋ አሻናው ኮዬይ ቋይሳና፡ ሺን ባ ሽምፖዋ ታ ጊሾ አሌ ኢሜይ አሻና።

40 «ሂንቴና ሞኬይ ታና ሞኬሰ፡ ታና ሞኬይ ቃሲ ታና ከቲዳይሳ ሞኬሰ። 41 ናቢያ ናቤ ሱንላን ሞኬይ፡ ናቢያሉ ዋይቲታና፤ ቃሲ ያሉዋ ያሉ ሱንላን ሞኬይ፡ ያሉዋሉ ዋይቲታና። 42 ታ ሂንቴው ቱማ ኦዳይሰ፤ ሃ ታ ታማሬታፕ ጉዲያ ኢሱዋሰ ታና ካሊያ ጊሾ ሃሪ አቶሺን ጉላ ኢርፃ ሃሌ ኢሚኮ ኢያ ዋይቶይ ቋይና» ያገሰ።

11

ፃማቂያ ዮሃንሲ ከቲዳ አሳታ (ሉቃ 7:18-35)

1 ዬሱሲ ታማኔ ናምዑ ታማሬታ ከታ ኦንጊዳፕ ጉዬ ያፕ ዴንዲዲ ታማርሳናዉኔ ሳባካናው ጋሊላ ካታማታ ቢስ።

10:33 2፻ዎ 2:12 10:35 ሚክ 7:6 10:38 ማቶ 16:24፤ ማር 8:34፤ ሉቃ 9:23 10:39 ማቶ 16:25፤ ማር 8:35፤ ሉቃ 9:24፤ 17:33፤ ዮሃ 12:25
 10:40 ሉቃ 10:16፤ ዮሃ 13:20፤ ማር 9:37፤ ሉቃ 9:48

2 የሃሊሲ ቃሾ ከላን ዳዊሼ ኪሪስቶስ አሊያባታ ሲዲዲ፣ ባ ታማሪታፕ ኢያኮ ከተዲ፣ 3 «ያና ጌቴተዳይ ኔኔዬ? ዋይኮ ኑኒ ሃራ ናጊኖ?» ያጊዲ ኦይቲስ።

4 ዬሱሲ ኢንታኮ ዛሪዲ፣ «ቢዲ ሂንቴ ሲዲያባኔ ሂንቴ ቤዲያባ የሃሊሳስ ኦዲቴ። 5 ቆቄተ ያሎሶና፣ ዋቤቲ ሃውቶሶና፣ ባር ሃርጋንቸቲ ፓዶሶና፣ ቱሌቲ ሲዶሶና፣ ሃይቄዳይሳቲ ሃይቆፕ ዴንዶሶና፤ ማንቆታስ ዋንጌላይ ሳባኬቴስ። 6 ታናን ቆቤቶናይ ኣንጆቲዳይሳ» ያጊስ።

7 የሃሊሳ ታማሪቲ ጉዬ ሰሚዲ ቢን፣ ዬሱሲ ዳሪያስ የሃሊሳባ ኦዲሼ፣ «ሃ ባዙዋ ኣይ ቤዳናው ኬዪዳቲ? ጫርኮይ ቃሊያ ማቃ ቤዳናው ዪዳቲዬ? 8 ያቲን፣ ኣይ ቤዳናው ኬዪዳቲ? ከቲ ማዶ ማዲዳ ኣሴ ቤዳናሴዬ? ከቲ ማዶ ማዲዳይሳቲ ካዎታ ከላን ዴዶሶና። 9 ያቲን፣ ኣይ ቤዳናው ኬዪዳቲ? ናቤ ቤዳናሴዬ? ሄኮ፣ ሂንቴ ናቤፕካ ኣጼይሳ ቤዴታ።

10 «ኔ ኣጊያ ኔ ሲንላን ጊሲያ ታ ከታንቸዋ ኔፕ ሲንሴ ከታና» ጌቴተዲ ያፌተዳይ ኢያሳ።

11 ታ ሂንቴው ቱማ ኦዲይስ፤ ማጫሳፕ ዬሌተዳይሳታ ጊዶፊ የሃሊሳፕ ኣጼይ ኦኒካ ባዋ፤ ሳሎ ካዎቱላን ኡባፊ ጉዳይ ኢ፣ ኢያፕ ኣቆና። 12 ፃማቂያ የሃሊሳ ዋዲያፕ ደሚዲ ሃቸ ጋካናው ሳሎ ካዎቱላይ ዳር ናቄቴስ፣ ሚኒዳ ኣሳቲ ዋልቃን ያ ጌላና።

13 ናቤቲ ኡባይኔ ሙሴ ሂጌይ የሃሊሳ ዋዴ ጋካናው ሳሎ ካዎቱላባ ቲንቤቲ ኦዲዶሶና። 14 ሂዛ፣ ሂንቴ ኤንታ ኪታ ኣማናና ጊዲኮ፣ ያና ጌቴተዳ ኤሊያሲ፣ ኢ የሃሊሳ። 15 ሂዛ፣ ሲዲያ ሃይሳ ዳዴይ ሲዶ።

16 «ሂዛ፣ ሃ ዋዲያ ዬሌቴላ ኣይቢራ ዳኒሶ? ጊያ ጊዶን ኡቲዲ ዋሊ ያጊዲ፣

17 ኩ ሂንቴው ሱሱልዔ ፑኒን፤ ሂንቴ ዬዳኬታ። ኑ ሳቢዲ ዜሌሊን፤ ሂንቴ ዬኬኬታ)

ያጊያ ናይታ ዳናሶና። 18 ፃማቂያ የሃሊሲ ዋናኔ ኡዮና ዪን፣ «ቱና ኣያኒ ዳዴስ» ያጊዳታ። 19 ኣሳ ናዳይ ሚሼኔ ኡዪሼ ዪን፣ «ያራሞባኔ ኡሻንቸ፣ ቃራፃ ቃንዲሴይሳታኔ ናጋራንቸታ ዳቦ» ያጊዳታ። ሂዛ፣ ጨንጫቴላ ቱማቴላይ ኢያ ኦሱዋን ቆንጨሰ» ያጊስ።

11:5 ኢሳ 35:5 11:10 ሚል 3:1 11:12 ሉቃ 16:16 11:14 ሚል 4:5፤ ማቶ 17:10

**አማኖና ኢዲዳ ካታማታ
(ሉቃ 10:13-15)**

20 ሄሳፌ ጉዬ፥ ዩሱሲ ዳሮ ማላታታ ኦሲዳ ካታማታን ዳዒያ አሳቲ ባንታ ናጋራፔ ሲሚዲ ማርታን ጌሎና ኢዲዳ ጊሾ ኤንታና፥
21 «አዬ ኮራዚኔ ካታማው፥ አዬ ቤቴሳይዳ ካታማው፥ አይስ ጊኮ፥ ሂንቴ ጊደን ኦሴቲዳ ማላታቲ ዲሮሳኒኔ ሲደናን ኦሴቲዳ ጊዲያኮ፥ ኤንቲ ቤኒ ቢደ ቲዬቲዲ፥ ካሌ ማዒዲ ባንታ ናጋራፔ ሲሚ አጋና። 22 ሺን ታ ሂንቴው ኦዳይስ፤ ፐርዳ ጋላስ ሂንቴፌ አሲዲ ዲሮሳሲኔ ሲደናስ ፐርዳይ ካዉያና። 23 ቃሲ፥ ቁፊርናሆሜ፥ ኔኒ ፑዴ ሳሎ ኬያናው ኮያይ? ሃኔና! ኔኒ ሲያሌን ዩጌታና። አይስ ጊኮ፥ ኔ ጊደን ኦሴቲዳ ማላታቲ ሶዶሜን ኦሴቲዳ ባንታ ጊዲያኮ፥ ሶዶሜይ ሃቺ ጋካናው ዳዒናሺን። 24 ሺን ታ ኔው ኦዳይስ፤ ፐርዳ ጋላስ ኔፔ አሲዲ ሶዶሜስ ፐርዳይ ካዉያና» ያጊዲ ሃንቁቲስ።

**ኪሪሰቶሳን ዳዒያ ሸምፖ
(ሉቃ 10:21-22)**

25 ሄ ዎዴ ዩሱሲ፥ «አዎው፥ ሳሎፍ ናሳ ጎዳው፥ ኔኒ ሃይሳ ኤራንቸታፔፔ ጩንጫታፔ ጌንፋዳ ናይታስ ቆንጨሲዳ ጊሾ ኔና ጋላታይስ። 26 ኤ፥ ታ አዎው፥ ሃይሲ ኔ ሎፖ ሸኒያዳ ሃኒስ።
27 «ኡባይ ታው ታ አዎፔ ኢሜቲስ። አዎፔ ሃሪ ናሳ ኤሬይ ባዎ፥ ናሳፔኔ ኢ ኤንታው ቆንጨሳናው ኮዬይሳታፔ ሃሪ አዎ ኤራናው ዳንዳዔይ ባዎ።
28 «ሂንቴኖ፥ ዳቡራንቸቶ፥ ቶሆይ ዳዒዳ ኡባይ ታኮ ሃ ዪቴ፤ ታኒ ሂንቴና ሸምፐሳና። 29 ታኒ ታ ዎዳናን አሸኬኔ አዳ ጊዲያ ጊሾ ታ ቃምባራን ጌሊቴ፥ ታፔ ታማሪቴ፤ ሂንቴ፥ ሂንቴ ሸምፐዋስ ሸምፖ ዳማና። 30 ታ ቃምባራይ ሊቆ፥ ቃሲ ታ ቶሆይካ ካዉሼ» ያጊስ።

12

**ሳምባታ ቦንቻናው ቤሲ?
(ማር 2:23-28፤ ሉቃ 6:1-5)**

11:21 እሳ 23:1-18፤ ሂዝ 26:1-28:26፤ ኢዩ 3:4-8፤ አዎ 1:9-10፤ ዛካ 9:2-4
11:23 እሳ 14:13 11:24 ማቶ 10:15፤ ሉቃ 10:12 11:27 ዮሃ 3:35፤
ዮሃ 1:18፤ 10:15 11:29 ኤር 6:16

1 ሃሳፌ ጉዬ፣ ሳምባታ ጋላስ፣ ዩሱሲ ጋዴ ጊደራ አዴሰ። ዩሱሳ ታማሬቲ ኮሻቲዳ ጊሾ ቲያ ባንጋ ሺሪኪዲ ሞሶና። 2 ሺን ፋሪሳዌቲ ሄሳ ቤዲዲ ዩሱሳኮ፣ «ሄኮ፣ ኔ ታማሬቲ ሳምባታ ጋላስ አላናው ቤሶናባ አላሶና» ያጊደሶና።

3 ዩሱሲ ኤንታኮ ዛሪዲ፣ «ዳዊቲይ ኮሻቲዳ ዋዴ ኢያራ ዴዔይሳታራ አይ አሊዳኮ ናባቢቤኬቲ? 4 ዳዊቲይ ያሳ ኬሊ ጌሊዲ ካሂኔታ ያላላፔ አቲን ኢኔ ኢያራ ዴዔይሳታሰ ቤሶና ጌሻ ዳቡዋ ሚሰ። 5 ዋይኮ ካሂኔቲ ሳምባታ ዋጋ ሻሪዲ ያሳ ኬላን ሳምባታ ጋላስ ኦሶ አሊኮ ኤንታው ባላ ጊደናይሳ ሙሴ ሂጊያን ናባቢቤኬቲ? 6 ሺን ሲዒቲ! ያሳ ኬላፌ አዴይ ሃይሳን ዴዔሰ። 7 ታኒ ሂንቴ ያርቩዋ ጊደናሺን ሂንቴ ሃራታ ማራና ሜላ ኮያይሰን ጊያ ቃላይ ዋይ ጉሱኮ ሂንቴ ኤሪዳኮ ያሎ አሳ ቦላ ፐርዴኬታ።

8 አሳ ናዓይ ሳምባታ ጎዳ» ያጊሰ። 9 ዩሱሲ ያፔ ቢዲ አይሁዳ ዋሳ ኬሊ ጌሊሰ። 10 ያን ኩሺይ ጉንዲዳ ኢሲ ኡራይ ዴዔሰ። ዩሱሳ ሞታናው ጋሶ ኮያ አሳቲ፣ «ሳምባታ ጋላስ ፓላናው ቤሲ ቤሴኔ?» ያጊዲ አይቺደሶና።

11 ኢ ኤንታኮ፣ «ሂንቴ ጊደፌ ኢሱዋሰ ደርሲ ሳምባታ ጋላስ አፎን ዉሊኮ፣ ጎቺዲ ኬሶናይ ኦኔ? 12 ያቲን አሲ ደርሳፌ ዋኒዲ ዳር አዴኔ? ሄሳ ጊሾ፣ ሳምባታ ጋላስ ሎዋባ ኦሶይ ቤሰሰ» ያጊሰ።

13 ሃሳፌ ጉዬ፣ ዩሱሲ አዲያኮ፣ «ኔ ኩሺያ ፒዲ ኦላ» ያጊን፣ ኡራይ ፒዲ ኦሊሰ። ኢያ ኩሺይ ፓዲዲ ሃንኮ ኩሺያዳ ሃኒሰ። 14 ሺን ፋሪሳዌቲ ያፔ ካሬ ኬዩዲ፣ ዩሱሳ ዋቲ ዋዳኔኮ ማቄቲደሶና።

ያሳይ ደሪዳ አይሊያ

15 ዩሱሲ ኤንታ ቆፋ ኤሪዲ ሄ ቤሳ አጊዲ ሃራ ሶ ቢሰ። ዳር አሳይ ኢያ ካሊዲ ቢደሶና፣ ሃርጋንቾታ ኡባ ፓሊሰ። 16 ዩሱሲ፣ «ታባ ሃራ ኦዴሰካ ኦደፐቲ» ያጊዲ ሚንላ ኦዲሰ። 17 ሄሲካ ናቢያ ኢሳያሲ፣

18 «ሄኮ ታ ደሪዳ አይሌይ፣
ታ ደሴይሲ፣ ታና ኡፋይሴይሲ፣
ታኒ ታ አያና፣ ኢያ ቦላ ሺምፕሳና፤
ኢ፣ አይሁዳ ጊደና ዴሪያሰ ሱሬ ፐርዳባ አዋጃና።

19 ኢ ፓላሜና ዋይኮ ካጬኖና፤

12:1 ዛሬ 23:25 12:3 1ሳው 21:1-6 12:4 ለዌ 24:9 12:5 ታይ 28:9-10 12:7 ማቶ 9:13፤ ሆሴ 6:6 12:11 ሉቃ 14:5 12:18 ኢሳ 42:1-4

- ባ ቃላት ዳንባን ጮ ሲሰና።
- 20 ሱሬ ፐርዳን ያኖ ዳማና ጋካናው፥ ዲንጩተዳ ማቃ ማንሴና፥ ጩዪያ ሙቃዳ ቶይሴና።
- 21 አይሁዳ ጊደና ዳሬይ ኡባይ ኢያን ኡፋይሲ ዋላና። ያጊዲ ዓፊዲይሲ ፖሌታና ማላሳ።

ዩሱሳኔ ቢዔልዜቡላ
(ማር 3:20-30፤ ሉቃ 11:14-23)

22 ሃሳፌ ጉዬ፥ ቱና አያናን ኦይኬተዳ ቆቄኔ ሙሜ አሴ ዳዔይሳ ኢያኮ ኤሂደሶና። ዩሱሲ ኡራ ፓሊን፥ ኡራይ ቤዒሲኔ ኦዴተሰ። 23 አሳ ኡባይ ማላላተዲ፥ «ሃይሲ ዳቂቴ ናዓ ጊዳንዴሻ?» ያጊደሶና።

24 ሺን ፋሪሳዊቴ ሃሳ ሲዒዲ፥ «ሃ ኡራይ ቱና አያናታ ከሴይ ቱና አያናታ ሃላቃ ቢዔልዜቡላ ዋልቃና» ያጊደሶና።

25 ዩሱሲ እንታ ቆፋ ኤሪዲ፥ «ዋሊ ጊደን ሻኬቲያ ካዎቲላ ኡባይ ከንዳና፤ ቃሲ ዋሊ ጊደን ሻኬቲያ ካታማይ ዎይኮ ከላይ ማኒዲ ኤቄና። 26 ዓላሂይ ዓላሂ ከሲያባ ጊዲኮ ባ ጊደን ሻኬቲሰ ጉሱ። ሃሳላ ሃኒያባ ጊዲኮ ኢያ ካዎቲላይ ዋኒዲ ማኒዲ ኤቃናው ዳንዳዒ? 27 ታኒ ቱና አያና ከሴይ ቢዔልዜቡላ ዋልቃን ጊዲኮ ሂንቴና ካሊያ አሳቲ ኦዴ ዋልቃን ከሳኔ? ሃሳ ጊሹ፥ ሂንቴና ካሊያ አሳቲ ሂንቴና ፐርዳና። 28 ሺን ታኒ ቱና አያናታ ከሴይ ያሳ አያናን ጊዲኮ፥ ያሳ ካዎቲላይ ሂንቴኮ ዩሰ።

29 «ዎይኮ ኢሲ አሲ ዋልቃማ አሳ ሶ ጌሊዲ ኢያ ሻሉዋ ቦንቃናው ኮይኮ ኮይርቲዲ ሄ ኡራ ቃሾና ኢዲኮ ዋቲዲ ዳንዳዒ? ያቲኮ ኢያ ሻሉዋ ቦንቃናው ዳንዳዒ።

30 «ታራ ጊደናይ ኦኒካ ታራ ኤቄቴሰ፤ ቃሲ ታራ ኢሲፌ ሺሾና ኡባይ ላሌሰ። 31 ሃሳ ጊሹ፥ ሲዒቴ፤ አሳይ ኦሊያ አይ ናጋሪኔ ጫሻ ቃሊ ኡባይ አቶ ጌቲታና፥ ሺን ጌሻ አያና ጫያ ኦዴሰካ ኢያ ናጋራይ አቶ ጌቲቴና። 32 ኦኒካ አሳ ናዓ ቦላ ኢታባ ኦዴቲኮ ኢያው አቶ ጌቲታና፥ ሺን ጌሻ አያና ቦላ ኢታባ ኦዴቲያ ኦዴሰካ ሃ ሳዓን ጊዲን ያና አላሚያን ኢያ ናጋራይ አቶ ጌቲቴና።

33 «ሎዎ ሚላይ ሎዎ አይፌ አይፌሰ፤ ቃሲ ኢታ ሚላይ ኢታ አይፌሰ። ሂዛ፥ ሚላይ ኤሬቴይ ባ አይፊያና። 34 ሂንቴና፥ ሾሻ ናይቶ፥ ሂንቴ ኢታ ጊዲሼ ዋኒዲ ሎዎባ ኦዴታናው ዳንዳዒ?»

12:24 ማቶ 9:34፤ 10:25 12:30 ማር 9:40 12:31 ሉቃ 12:10
12:32 ሉቃ 12:10

አሲ ባ ዋዛናን ኩሚዳባፔ ዶናን ኦዴቲስ። 35 ሎዎ አሲ ባ ዋዛናን ዋሊዳ ሎዎባፔ፣ ሎዎባ ኬሴስ፤ ኢታ አሲ ባ ዋዛናን ዋሊዳ ኢታባፔ፣ ኢታባ ኬሴስ። 36 ሺን ሲዒቴ፣ ኣሳይ ኦዴቲያ ጮ ኦዳ ኡባስ ፐርዳ ጋላስ ዛሮ ኢማና። 37 ኣይስ ጊኮ፣ ኔ ኦዴቲያ ኔ ቃላን ዓላና፤ ኔ ኦዴቲያ ኔ ቃላይ ኔ ቦላ ፐርዳና» ያጊሰ።

ማላታ ቤዓናው ሸቂዳ ኦይሻ
(ማር 8:11-12፤ ሉቃ 11:29-32)

38 ሄሳፌ ጉዬ፣ ኢሲ ኢሲ ፋሪሳዊቲኔ ሂጌ ኣስታማሬቲ ዬሱሳኮ፣ «ኣስታማሪያው፣ ኔጊ ማላታ ኦላዳ ኦና ቤሳ» ያጊዶሶና።

39 ሺን ዬሱሲ ዛሪዲ፣ «ኣማኔቶናኔ ኢታ ዬሌቴላይ ማላታ ኮዬስ። ሺን ናቢያ ዮናሳ ማላታፔ ሃራ ማላቲ ኢያው ኢማቴና።

40 ዮናሲ ጊታ ሞሎ ኡሎን ሄሹ ጋላሲኔ ሄሹ ቃማ ጋምዒዳይሳ ማላ ኣሳ ናዓይ ሄሹ ጋላሲኔ ሄሹ ቃማ ቢታ ጋርሳን ጋምዓና።

41 ናናዌ ኣሳይ ፐርዳ ጋላስ ዳንዲዲ ሃ ዬሌቴላ ቦላ ፐርዳና፤ ኣይስ ጊኮ፣ ኤንቲ ዮናሳ ሲብካቲያ ሲዒዲ ባንታ ናጋራፔ ሲሚዶሶና። ሄኮ፣ ዮናሳፔ ኣጼይሲ ሃይሳን ዳዔስ። 42 ፐርዳ ጋላስ ዲጌሃ ካዊያ ዳንዲዳ ሃ ዬሌቴላ ቦላ ፐርዳና፤ ኣይስ ጊኮ፣ ኢያ ሶሎሞኔ ጨንጫቴላ ሲዓናው ቢታ ጋፃፔ ያሱ። ሄኮ፣ ሶሎሞኔፔ ኣጼይ ሃይሳን ዳዔስ።

43 «ቱና ኣያናይ ኣሳፔ ኬዬዳፔ ጉዬ ባው ሹምፒያሶ ኮዬዲ ሃላ ባይና ማላ ቤሳን ዳቡሬስ፣ ሺን ባ ኮያ ሹምፑዋ ዳማና።

44 ያኒን፣ «ታ ኣጋ ኬዬዳ ኬላ ሲማዳ ባና» ያጌስ። ኢ ሲሚያ ዋዳ ኬላይ ካይሲ ጊዳይሳኔ ፐቲቲዲ ጊጊ ኡቲዳይሳ ዳማስ።

45 ሃዛ፣ ሲሚ ቢዲ፣ ባፔ ኢቲያ ሃራ ላፑን ኢታ ኣያናታ ኤኪዲ ዬሰ፤ ኤንቲካ ኡራ ጊዶ ጌሊዲ ዳዎሶና። ሃ ኡራሰ ካሴይሳፌ ጉዬይሲ ዳር ኢቲስ። ሃ ኢታ ዬሌቴላ ቦላ ሄሳ ማላ ሃናና» ያጊሰ።

ዬሱሳ ኣዪዉኔ ኢያ ኢሻታ
(ማር 3:31-35፤ ሉቃ 8:19-21)

46 ዬሱሲ ዳሪያሰ ኦዳ ቦላ ዳዒሺን ኢያ ኣያኔ ኢያ ኢሻቲ ኢያ ኦዲሳናው ኮዬዲ ካሬን ኤቂዶሶና። 47 ኢሲ ኣሲ ኢያኮ፣ «ኔ ኣያኔ ኔ ኢሻቲ ኔና ኦዲሳናው ኮዬዲ ካሬን ኤቂዶሶና» ያጊሰ።

12:34 ማቶ 3:7፤ 23:33፤ ሉቃ 3:7፤ ማቶ 15:18፤ ሉቃ 6:45 12:38 ማቶ 16:1፤ ማር 8:11፤ ሉቃ 11:16 12:39 ማቶ 16:4፤ ማር 8:12 12:40 ዮሃ 1:17 12:41 ዮሃ 3:5 12:42 1ካዎ 10:1-10፤ 2ታሪ 9:1-12

48 ዬሱሲ ዛሪዲ፡ «ታ ኣያ ኦኔ? ታ ኢሻቲካ ኦናንቴ?» ያጊሰ።
 49 ባ ኩሺያራ ታማሪታ ማሊሽ፡ «ቤዒቴ፡ ታ ኣያኔ ታ ኢሻቲ
 ሃይሳታ። 50 ሳሎን ዴዒያ ታ ኣዋ ሽኒያ ኦሊያ ኡባይ ታ ኢሻ፡ ታ
 ማሻኔ ታ ኣዮ» ያጊሰ።

13

ዜሬሊ ዜሪያ ኡራ ለሚሶ
 (ማር 4:1-9፤ ሉቃ 8:4-8)

1 ሄ ጋላስ ዬሱሲ ሶፔ ከዩዲ ኣባ ጋፃን ኡቲስ። 2 ዳር ዴሬይ
 ኢያ ዩሹዋን ሺቁን ኣሳ ኣባ ጋፃን ኣጋጊዲ ዋሳሎን ጌሊዲ
 ኡቲስ። 3 ኣሳስ ዳርባ ለሚሶን ያጊዲ ኦዲስ።

«ኢሲ ጎሻንቾይ ዜሬሊ ዜራናው ከዩስ። 4 ኢ ዜሪያ ዋዴ
 ኢሲ ኢሲ ዜሬላቲ ኦጌ ጋፃን ዋዲዶሶና፤ ኤንታካ ካፎቲ ዩዲ
 ማዲ ማዲዶሶና። 5 ኢሲ ኢሲ ዜሬላቲ ጋርሳን ሻሎይ ዴዒያ ቢታ
 ቦላ ዋዲዶሶና። ዳር ቢቲ ባይና ጊሾ ኤሌሲዲ ዶሊስ። 6 ሺን
 ኣዋይ ከዩን ሹሊስ፤ ፃጶይ ባይና ጊሾ ማሊስ። 7 ኢሲ ኢሲ
 ዜሬላይ ኣጉንጎላ ጊዶን ዋዲስ፤ ኣጉንጎላይ ዲጪዲ ሄ ዶላ ጩሊስ።
 8 ሃራቲ ቃሲ ኣራዲ ቢታ ቦላ ዋዲስ፤ ዶሊዲ ኣይፌ ኣይፊስ።
 ኢሶይ ያታ፡ ኢሶይ ኡሶፑን ታማ፡ ኢሶይ ቃሲ ሃስታማ ኣይፊስ።
 9 ሲዒያ ሃይሊ ዴዒያ ኡራይ ሲያ» ያጊሰ።

10 ዬሱሳ ታማሪቲ ኢያኮ ሸቁዲ፡ «ኣይስ ኔኒ ዴሪያስ ለሚሶን
 ኦዳይ?» ያጊዲ ኦይቲዶሶና።

11 ኢ ዛሪዲ፡ «ሂንቴው ሳሎ ካዋቴፋ ፀራ ኤራይ ኢማቲስ፡
 ሺን ኤንታው ኢማቲቤና። 12 ዴዒያ ኡባስ ጉዜታና፡ ኢያው ዳራና፡
 ሺን ባይናይሳፌ ሃሪ ኣቶሺን ኢያው ዴዒያራካ ኤኬታና። 13 ሄሳ
 ጊሾ፡ ታኒ ኤንቲ፡ ያሊሽ ዴጋና ማላ፡ ሲዒሽ ሲያና ማላ ዋይኮ
 ኣኬኮና ማላ ኤንታው ለሚሶን ኦዳይስ።

14 «ኢሳያሲ ባ ማፃፋን ኦዲዳይሲ ኤንታ ቦላ ፖሌቲስ። ኢ
 ኦዲሽ፡

«ሂንቴ ሲሳ ሲዒታ፡ ሺን ኣኬኬኬታ፤

ሂንቴ ያሌታ፡ ሺን ቤዒኬታ።

15 ኣይስ ጊኮ፡ ሃ ኣሳ ዋዛናይ ዜልዑሚስ፤

ባንታ ሃይላ ኤሪሽ ቱሊሲዶሶና፡

ባንታ ኣይፊያ ጎዚዶሶና።

ሄሲ ባይኔኮ ኤንቲ ባንታ ኣይፊያን ቤዒዲ፥
 ባንታ ሃይላን ሲዒዲ፥
 ባንታ ዋዛናን ኣኬኪዲ፥
 ታኮ ሲማና፥
 ታካ ኤንታ ፓላናሺን) ያጊሰ።

16 «ሺን ሂንቲ ኣይፊቲ ቤዒያ ጊሾኔ ሂንቲ ሃይላቲ ሲዒያ ጊሾ ሂንቲ ኣንጃቲዳይሳታ። 17 ታ ሂንቲው ቱማ ኦዳይሰ፤ ዳር ናቤቲኔ ጃሎ ኣሳቲ ሂንቲ ቤዒይሳ ቤዒናውኔ ሂንቲ ሲዒይሳ ሲዒናው ኣዋቲዳሶና፥ ሺን ኤንታው ሂኒቤና።

18 «ሂዛ፥ ሃ ዜሬላ ዜሬያ ኡራ ለሚሱዋ ሲዒቲ። 19 ኦጌ ጋፃን ዋዲዳ ዜሬላ ለሚሶይ ሃይሳ፥ ሳሎ ካዎቲላ ቃላ ሲዒዲ ኣኬኮና ኡራ ዋዛናፕ ፃላሃይ ዪዲ ኢያ ዋዛናን ዳዒያ ዜሬላ ማፂ ዲጌሰ።

20 ሻሎይ ጋርሳን ዳዒያ ቢታ ቦላ ዜሬቲዳይሲ ቃላ ሲዒዲ ኤሌሲዲ ኡፋይሳን ኤኬይሳታ። 21 ሺን ፃጰ ዬዳናው ዳንዳያና ጊሾ ዳር ጋዎያኮና። ቃላ ጋሶን ሜቶይ ዋይኮ ጎዴቲሌ ያ ዎዴ ኤሌሲ ዱቤቶሶና። 22 ኣጉንላ ጋላን ዜሬቲዳይሲ ቃላ ሲዒሰ፥ ሺን ሃ ኣላሚያ ዲሳ ሂርጋይኔ ዲሬቲላ ቆፋይ ቃላ ጩሊያ ጊሾ ኣይፊ ኣይፎና ኣቲሰ። 23 ሺን ኣራዳ ቢታን ዜሬቲዳ ዜሬላይ ኣኬካን ቃላ ሲዒያ ኡራ። ኢ ኣይፊ ኣይፊሰ፤ ኢሶይ ፃታ፥ ኢሶይ ኡሱፕን ታማ ኢሶይ ቃሲ ሃሰታማ ኣይፊሰ» ያጊሰ።

ሌሹዋ ለሚሶ

24 ዬሱሲ ኤንታው ሃራ ለሚሶ ኦዲሰ፥ «ፆሳ ካዎቲላይ ባ ጎሻን ሎዎ ዜሬላ ዜሬዳ ኡራ ዳኔሰ። 25 ሺን ኣሲ ኡባይ ዲሰኪን ኢያ ሞርኬይ ዪዲ ጊሰቲያ ጊዶን ሌሾ ዜሬዲ ቢሰ። 26 ጊሰቲይ ዲጩዲ ኣይፊያ ዎዴ ሌሾይ ኢያ ጊዶን ቤንቲሰ።

27 «ጋዲያ ጎዳ ኣይሌቲ ጎዳኮ ቢዲ፥ ሳዳው፥ ኔ ጎሻን ኔ ሎዎ ዜሬላ ዜሬቢኪሾ? ያቲን፥ ሌሾይ ኣዉፕ ዪዳ?» ያጊደሶና።

28 «ኢ ኤንታኮ፥ ሳሳ ሞርኬይ ኣሊሰ) ያጊሰ።
 «ኣይሌቲ ጎዳኮ፥ ሓ ቢዲ ሌሹዋ ሾዳና ሜላ ኮያይ?» ያጊደሶና።

29 «ሺን ኢ፥ ሳቶ ቦቾፊቲ፤ ሂንቲ ሌሹዋ ሾዳይሰ ጊሺን ጊሰቲይ ሾዳታና። 30 ቦቾፊቲ፤ ጫካ ዎዴይ ጋካናው ኢሲፊ ዲጮ። ሄ ዎዴ ጫኪያ ኣሳታ ሌሹዋ ሲንላቲዲ ማፂዲ ታማን ፀጋናው ሚርቄን ሚርቄን ቃቸቲ። ሺን ጊሰቲያ ሺሺዲ ታ ሻሊያን ቆሊቲ) ያጋና» ያጊሰ።

ጉላ ሚሴ ሌሚሶ

(ማር 4:30-32፤ ሉቃ 13:18-19)

31 ቃሲ ሃራ ሌሚሶ ያገደ ኦዲስ፤ «ሳሎ ካዎቴላይ ኢሲ ኣሲ ባ ጎሻን ባኪዳ ጉላ ሚሴ ኣይፌ ዳኔስ። 32 ህ ሚሴ ኣይፌይ ሃራ ሚላ ኣይፌታፔ ጉላ፣ ሺን ኢያ ዶላ ዲጨዳ ሃራ ሚላታ ኡባፌ ኣቋ ገታታዉሱ። ኢ ታሺያን ካፎቲ ኬዲዲ ኡታና ጋካናው ዎልቃማ ሚሴ ገዳዉሱ» ያገሰ።

ኢርሾ ሌሚሶ

(ሉቃ 13:20-21)

33 ካሊዲካ፣ ዩሱሲ ሃራ ሌሚሶ ኦዲስ፤ «ሳሎ ካዎቴላይ ኢሲ ማጨሲ ሄዙ ጋባቲ ጳሌ ኤካ ሙኑቃዳ፣ ሙኑቃይ ዳንዳና ሚላ ኢያን ጉጂዳ ኢርሾ ዳኔስ» ያገሰ።

34 ዩሱሲ ዳሪያሰ ህ ሌሚሱዎ ኡባ ኦዲስ። ሌሚሶይ ባይና ኢሲባካ ኦዲቤና። 35 ናቤይ ባ ማፃፋን፣

«ታኒ ታ ዶና፣ ሌሚሶን ዶያና፤

ሳሎይኔ ሳዓይ ሜጴቶሳፔ፣

ገሚዳይሳ ኦዲይስ»

ያገደ ኦዲዳይሲ ሄሳን ፖሌቲስ።

ሌሾ ሌሚሱዎ ቢርሼላ

36 ዩሱሲ ዳሪያ ዎይዚዲ ሶ ጌሊስ። ኢያ ታማሬቲ ኢያኮ ሺቂዲ፣ «ጎሻን ዳዒያ ሌሾዎ ቢርሼላ ኦስ ኦዲ» ያገደሶና።

37 ኢ ዛሪዲ፣ «ሎፖ ዜሬላ ዜሪዳይ ኣሳ ናዓ። 38 ጎሻይ ሃ ኣላሚያ። ሎፖ ዜሬላይ ሳሎ ካዎቴላ ናይታ። ሌሾይ ፃላሄ ናይታ።

39 ሌሾዎ ዜሪዳይ ዎርኪያ ፃላሄ። ጫካ ዎዳይ፣ ዎዲያ ዉርሴላ። ጫኬይሳቲ ኪታንቸታ።

40 «ሌሾይ ማፃቲዲ ታማን ፀጌቲይሳ ሚላ ዎዲያ ዉርሴላን ሄሳዳ ሃናና። 41 ኣሳ ናዓይ ባ ኪታንቸታ ኪታና። ኤንቲ ናጋራስ ጋሶ ገዳይሳታኔ ኢታ ኦሊያ ኡባ ማፃዲ ኢያ ካዎቴላፌ ኬሳና።

42 ማፃ ሺሺዲ ዩሆይኔ ኣቻ ጋርጨሴ ዳዒያ ቶፖና ታማን ዩጋና።

43 ህ ዎዳ ጂሎቲ ባንታ ኣዎ ካዎቴላን ኣዎዳ ፖዓና። ሲዒያ ሃይሴ ዳዔይ ሲያ!

44 «ፖሳ ካዎቴላይ ጎሻን ዎጌቲዳ ሚሼ ዳኔስ። ኢሲ ኣሲ ህ ሚሺያ ዳሚዲ ዛሪ ዎገሰ። ዳሮ ኡፋይቲዲ ቢዲ ባው ዳዒያባ ኡባ ባይዚዲ ህ ጎሻ ጋዲያ ሻሚስ።

45 «ሃሳዳካ፣ ቃሲ ሳሎ ካዎቴላይ አንቆ ጊያ ኣልዎ ሹቻታ ኮያ ዘልዓንኹ ዳኔስ። 46 ዳር ኣልዎ አንቁዋ ዳሚዲ ቢዲ ባው ዳዒያባ ኡባ ባይዚዲ ኢያ ሻሚስ።

ሞሎ ኦይኪያ ጊቴ ለሚሶ

47 «ቃሲ ያሳ ካዎቴላይ አባን ዩጌቲዳ ዲማ ዲማ ቆሞ ሞሎ ኦይኪያ ጊቴያ ዳኔስ። 48 ሞሎ ኦይኪያ አሳቲ ሞሎይ ጊቴያን ኩሚን አባሬ ጋፃ ኬሲደሶና። ያን ኡቲዲ ሎዑዋ ቆሪ ቆሪ ዳቸን ዩጊደሶና፣ ሺን ኢታ ሞሎታ ዎራ ሆሊደሶና። 49 ዎዲያ ወርሴላን ሃሳሶ ሃናና። ኪታንቸቲ ዩዲ ናጋራንቸታ ዓሎታፕ ሻኪዲ። 50 ዩሆይኔ ኣቻ ጋርጩላ ዳዒያ ቶያና ታማን ዩጋና።

51 «ሃ ኡባይ ሂንቴው ጌሊዴ?» ያጊዲ ኤንታ ኦይቹስ።

ኤንቲ ዛሪዲ፣ «ኤ» ያጊደሶና።

52 ዩሱሲ፣ «ሂዛ፣ ሳሎ ካዎቴላ ኤራ ኤኪዲ ሂጊያ ታማርሲያ ኡባይ፣ ባ ሚንጂዳ ሻሉዋፔ ኦራላኔ ጋልዓ ኬሲያ ኣሴ ዳኔስ» ያጊስ።

**ዩሱሲ ናዚሬቴን ኢዲቲስ
(ማር 6:1-6፤ ሉቃ 4:16-30)**

53 ዩሱሲ ሃ ለሚሱዋ ኦዲ ወርሲዳፔ ጉዬ ያፔ ዳንዲዲ ቢስ። 54 ባ ዩሌቲዳ ቢታ ቢዲ ኣይሁዴ ዎሳ ኬላን ዴሪያ ታማርሲስ። ኤንቲ ማላሌቲዲ፣ «ሃ ኡራይ ሃ ጩንጫቴላኔ ሃ ማላታታ ኦሊያ ዎልቃ ኣዉፔ ኤኪዴ?» 55 ሃይሲ ኣናዲያ ናዓ ጊዴኔዬ? ኢያ ኣዬ ሱንሳይ ማይራሞ ጊዴኔ? ኢያ ኣሻቲ ያይቆባ፣ ዮሴፋ፣ ሲሞናኔ ዩሁዳ ጊደኮናዬ? 56 ኢያ ሚቹቲ ኦራ ዳዖሶና ጊደኮና? ያቲን፣ ሃ ኡራይ ሃ ኡባ ኣዉፔ ኤኪዴ?» ያጊደሶና።

57 ሃሳ ጊሾ፣ ኢ ጊያባ ኤኮና ኢዲደሶና።

ሺን ዩሱሲ፣ «ናቤይ ባ ዩሌቲዳ ቢታኒኔ ባ ሶ ኣሳ ማታን ቦንቹቴና» ያጊስ። 58 ኤንቲ ኣማኖና ኢዲዳ ጊሾ ዳር ማላታታ ሄ ቤሳን ኦሊቤና።

14

**ፃማቂያ ዮሃኒሳ ሃይቁዋ
(ማር 6:14-29፤ ሉቃ 9:7-9)**

1 ሄ ዋዴ ጋለላ ኣይሲያ ሄሮዲሲ * ዩሱሳባ ሲዒሲ። 2 ባ ኣይሌታኮ፡ «ሃይሲ ፃማቂያ ዮሃንሳ፤ ኢ ሃይቆፔ ዴንዲሲ። ያኒዳ ጊሾ ሃ ኡባ ማላታታ ኢ ኦሌስ» ያጊሲ።

3 ኢ ሄሳ ጊዳይ ሄሮዲሲ ባ ኢሻ ፊልጶሳ ማቼ ሄሮዲያዲ ጋሶን ዮሃንሳ ቃሾ ኮሌ ጌልሲዳ ጊሾሳ። 4 ዮሃንሲ ሄሮዲሳ፡ «ኔ ኢዮ ኤካናው ዋጋ ጊዳና» ያጊሲ። 5 ሄሮዲሲ ዮሃንሳ ዋጳናው ኮዩሲ፡ ሺን ዴሬይ ዮሃንሳ ናቤ ኦሌዲ ቤዒያ ጊሾ ያሹቲሰ።

6 ሄሮዲሲ ባ ዩሌቲዳ ጋላሳ ቦንቹያ ዋዴ ሄሮዲያዳ ናዒያ ኣሳ ሲንሳን ዩላን ዲራዳ ኢያ ኡፋይሳሱ። 7 ያቲን፡ ኢ፡ «ኢያ ኮያባ ኡባ ኢማና ጊዲ» ጫቂሰ። 8 ናዒያ ባ ኣዩ ዘሪያ ሲዒዳ ሄሮዲሳኮ፡ «ፃማቂያ ዮሃንሳ ሁዒያ ኬሬን ዋላዳ ታው ኢማ» ያጋሱ። 9 ኢያ ያጊን ካዋይ ቂርቲሰ፡ ሺን ባ ጫቂዋ ጊሾኔ ባራ ዴዒያ ኢማላታ ጊሾ ጊዲ ኢ ኦይሻይ ፖሌታና ማላ ከቲሰ። 10 ካዋይ ኣሴ ከቲዲ ዮሃንሲ ቃሾ ኮላን ዴዒሺን ኢያ ቆጲያ ጎይሪሲሰ። 11 ሁዒያ ኬሬን ዋላ ኤሂዲ ናዔሰ ኢሚዶሶና፤ ናዒያካ ኤካዳ ባ ኣዩሰ ኤፋሱ። 12 ዮሃንሳ ታማሬቲ ዩዲ ኢያ ኣሃ ኤፊዲ ሞጊዶሶና። ኢያፔ ጉዬ ሃኒዳባ ኡባ ቢዲ ዩሱሳሰ ኦዲዶሶና።

ዩሱሲ ኢቻሹ ሙኩሉ ኣሳ ሙዚሰ
(ማር 6:30-44፤ ሉቃ 9:10-17፤ ዮሃ 6:1-14)

13 ዩሱሲ ሃኒዳባ ሲዒዳ ዋዴ ዋጎሉዋን ጌሊዲ ሄ ቤሳፊ ኢሲ ጌሚያ ሶ ባርካ ቢሰ። ኣሳይ ሄሳ ሲዒዲ ካታማታፔ ዴንዲዲ ቶሆን ኢያ ካሊዶሶና። 14 ዩሱሲ ዋጎሉዋፔ ዋጲዲ ዳር ኣሳ ቤዒዲ ኤንታው ቃጴቲሰ። ኤንታ ጊዶን ዴዒያ ሃርጋንቸታ ፓላሰ።

15 ሳዒይ ኦማርሲሼ ቢያ ዋዴ ዩሱሳ ታማሬቲ ኢያኮ ሺቂዲ፡ «ሃ ቤሳይ ኣሲ ባይና ቤሲ፡ ሳዒይካ ቃሚሰ። ያኒያ ጊሾ፡ ሄራን ዴዒያ ጉታታ ቢዲ ባንታው ሻሚዲ ማና ማላ ዴሪያ ዩዳ» ያጊዶሶና።

16 ሺን ዩሱሲ ኤንታኮ፡ «ዴሬይ ሞና ባናው ኮሹና፤ ኤንቲ ማናባ ሂንቲ ኢሚቲ» ያጊሲ።

17 ኤንቲ ዘሪዲ፡ «ኦሰ ሃይሳን ኢቻሹ ኡይላፊኔ ናሞዑ ሞሎፔ ሃሪ ባዋ» ያጊዶሶና።

* 14:1 ሄሮዲሲ፡ ሃይሲ ካዋዋ ሄሮዲሰ ኣንቲጳሳ። ኢ ዪሁዳኔ ፔሪያ ከሪሰቶሲ ዩሌታናፔ ሲንጼ 4-39 ሞ.ል. ጋካናው ሃሪሰ። ኢ ካዋዋ ሄሮዲሳሰ ናዒ። 14:4 ሉቃ 3:19-20፤ ሉዌ 18:16፤ 20:21

18 ኢካ፡ «አኔ ኤንታ ሃ ኤሂቴ» ያገለገለ። 19 ካሊዲካ፡ ዳሬይ ማታን ኡታና ማላ ኦዲስ። ኢቻሹ ኡይላኔ ናሞው ሞሎታ ኤኪዲ፡ ሳሎ ጻሊዲ ጋላቲ ሰሚዲ፡ ኡይላ ማንሊዲ ባ ታማሬታስ ኢሚስ፤ ኤንቲ ቃሲ ዳሪያስ ኢሚደሶና። 20 ኡባይ ሚዲ ካሊደሶና። ዩሱሳ ታማሬቲ ሚሺን ኣቲዳይሳ ታማኔ ናሞው ጋይታ ዳንሊደሶና። 21 ካላ ሚዳ ኣሳይ ማጫሳይኔ ናይቲ ኣቲን ኢቻሹ ሙኩሉ ገዴስ።

ዩሱሲ ኣባ ቦላራ ሃሙቲስ
(ማር 6:45-52፤ ዮሃ 6:15-21)

22 ዩሱሲ ባ ታማሬቲ ዋጎሉዋን ጌሊዲ ባፔ ሲንላቲዲ ኣባፊ ሄ ፊንሊ ፒናና ማላ ኪቲዲ ባው ዳሪያ ሞይዛናው ጉዩ ኣቲስ። 23 ዳሪያ ሞይዚ ሰሚዲ ባርካ ዋሳናው ኢሲ ዳሪያ ቦላ ከዩስ። ሳባይ ቃሚንካ ኢ ባርካ ያን ጋሞዲስ። 24 ሄ ዋዴ ዋጎሎይ ኣባ ቦላ ቢሺን ሲንላ ባጋራ ጫርኮይ ዳንዲን ሆቤይ ዋጎሉዋ ኡንዔሊስ።

25 ዋንቲማላ ቦላ ዩሱሲ ኣባ ቦላ ሃሙቲሽ ባ ታማሬታኮ ዩስ። 26 ኢያ ታማሬቲ፡ ኢ ኣባ ቦላ ሃሙቲሽ ባንታኮ ዩይሳ ቤዒዲ ያዩደሶና። ኤንቲካ፡ «ሃይሲ ሞይቲሌ» ገዲ ያዩዲ ዋሲደሶና።

27 ሺን ዩሱሲ ኤሌሲዲ፡ «ኣይኮይ ባዋ! ያዮፊቴ! ታናባይ» ያገለገለ።

28 ጳዳርሲ ኢያኮ፡ «ጎዳው፡ ኔና ገዲኮ፡ ታኒ ሃላ ቦላራ ሃሙታዳ ኔኮ ባና ማላ ታና ኪታ» ያገለገለ።

29 ዩሱሲ ጳዳርሳኮ፡ «ሃያ» ያገለገለ። ጳዳርሲ ዋጎሉዋፔ ዋዲዲ ሃላ ቦላራ ሃሙቲሽ ዩሱሳኮ ቡሱ ኦይኪስ። 30 ሺን ዋልቃማ ጫርኩዋ ቤዒዲ ያዩስ። ሃላን ሚቲቴላ ኦይኪዳ ዋዴ «ጎዳው፡ ታና ኣሻርኪ» ያገለገለ ዋሲስ።

31 ዩሱሲ ኤሌሲዲ ባ ኩሺያ ዩዲ ኢያ ኦይኪዲ፡ «ኔና፡ ኣማናይ ፓጪደይሶ ኣይስ ሲዳይ» ያገለገለ።

32 ዩሱሳራኔ ጳዳርሳራ ዋጎሉዋን ጌሊዲ ዋዴ ጫርኮይ ሲዒ ገሰ። 33 ዋጎሉዋ ገደን ዳዒያ ኢያ ታማሬቲ፡ «ኔኒ ቱማካ ያሳ ናባ» ገዲ ጎይኒደሶና።

34 ኤንቲ ኣባ ፒኒዲ ጌንሳሬጻ ቢታ ጋኪደሶና። 35 ሄ ቢታን ዳዒያ ኣሳይ ዩሱሳ ኤሪዳ ዋዴ ባንታ ሄራን ዳዒያ ጉታ ኡባ ኪታ ዩዲደሶና። ኣሳይ ሃርጋንቸታ ኡባ ኢያኮ ኤሂደሶና። 36 ሃርጋንቸቲ ኢያ ኣፊላ ማጫራ ፃላላ ቦቻና ማላ ዋሲደሶና። ቦቸዳ ኡባይካ ፓዲደሶና።

15

አዋታ ዎጋባ (ማር 7:1-13)

1 ሄሳፌ ጉዬ፣ ኢሲ ኢሲ ፋሪሳዊቲኔ ሂጌ አስታማሪቲ ዩሩሳሌም፣ ዩሱሳኮ ዩዲ፣ 2 «ኔ ታማሪቲ አይሰ ኑ አዋታ ዎጋ ማንሉና? ኤንቲ ካሊ ማናፔ ሲንሌ ባንታ ኩሺያ ሜጩቶኮና» ያገዱ ኦይቹደሶና።

3 ዩሱሲ ዛሪዲ፣ «ሂንቴ፣ ሂንቴ ዎጋ ጊሾ ያሳ ከታ ፖሌይሳ አይሰ ኢጃቲ? 4 አይሰ ጊኮ፣ ያሳይ፣ ህ አዋኔ ኔ አዩው ቦንቻ። ኢ ባ አዋ ዎይኮ ባ አዩው ጩዬይሰ ሃይቆ ጊቤኔ?» ያገሰ።

5 ሺን ሂንቴ፣ ኢሲ አሲ ባ አዋ ዎይኮ ባ አዩው ማዳናባይ ዳዒሺን፣ ህይሳ ታ ያሳሰ ያርሻሰ ጊኮ፣ 6 ባ አዋ ዎይኮ ባ አዩው ቦንቻናው ቤሴና) ያገታ። ያቲዲ ሂንቴ፣ ሂንቴ ዎጋ ፖላናው ያሳ ቃላ ማንሉታ። 7 ሂንቴኖ፣ ጩቦቶ፣ ኢሳያሲ ሂንቴባ ሊኬ ኦዲሰ፣

8 « ህ አሳይ ታና ባንታ ዶናን ቦንቹሰ፣ ሺን ኤንታ ዎዛናይ ታፔ ሃሆን ዳዔሰ።

9 አሳይ ታና ጮ ጎይኖሶና፤ ኤንቲ አሲ ሜዲዳ ከታ ያሳ ሂጌ ዳኒሲዲ ታማርሶና) ገሰ» ያገሰ።

አሴ ቱኒሲያባታ (ማር 7:14-23)

10 ዩሱሲ ዳር አሳ ባኮ ጭገዲ፣ «ሲዒቲ! አኮኪቲ! 11 አሴ ቱኒሲያባይ ዶናራ ጌሊያባ ጊዶናሺን ዶናፔ ኬያባ» ያገሰ።

12 ሄሳፌ ጉዬ፣ ዩሱሳ ታማሪቲ ኢያኮ ዩዲ፣ «ፋሪሳዊቲ ኔኒ ጊዳይሳ ሲዒዲ ቆቤቲዳይሳ አኮካይ?» ያገደሶና።

13 ሺን ዩሱሲ ኤንታው ዛሪዲ፣ «ሳሎዎን ዳዒያ ታ አዋይ ቶኪቦና ሚላይ ኡባይ ሾዳታና። 14 ኤንታባ ሂርጎፊቲ፤ ኤንቲ ቆቄ ካሌሊያ ቆቄታ። ቆቄይ ቆቄ ካሌሊኮ፣ ናምዳይካ ኦላን ኩንዳና» ያገሰ።

15 ጳዒርሲ ዛሪዲ፣ «ሃ ለሚሱዋ ቢርሼላ ኑሰ ኦዳርኪ» ያገሰ።

16 ዩሱሲ ኤንታኮ፣ «ሂንቴዉካ ሃዒ ጋካናው ጌሊቤኔ?

17 ዶናራ ጌሊያባ ኡባይ ኡሎ ጌሊዲ ካሬ ኬዬይሳ ኤሬኬቲ?

18 ሺን ዶናራ ኬያባይ ዎዛናፔ ኬዬሰ። አሴ ቱኒሲያባቲ ሄሳታ።

15:4 ኬሳ 20:12፤ ዛሬ 5:16፤ ኬሳ 21:17፤ ሉዌ 20:9 15:14 ሉቃ 6:39

19 ኤንቲካ አሳ ዋዛና ጊደፌ ኬያ ኢታ ቆፋ፣ ዋቋ፣ ላይማቴል፣ ኢታ ኦሶ፣ ካይሶ፣ ዋርዶ ማርካቴል፣ ጫሼ። 20 ሄሳ ዲኒያባቴ ኣሴ ቱኒሴሲፔ ኣቲን ሜጩቶና ኩሼራ ሜይሲ ቱኒሴና» ያገሰ።

ኢሲ ማጫሴ ኣማኑዋ
(ማር 7:24-30)

21 ሄሳፌ ጉዬ፣ ዩሱሲ ያፔ ኬዩዲ ዲሮሳኔ ሲደና ካታማቲ ዴዲያ ቢታ ቢሰ። 22 ኢሲ ካናኔ ቢታ ማጫሰ ዩሱሳኮ ያዳ፣ ባ ቃላ ቋቋ ኦሳዳ፣ «ጎዳው፣ ደዊቴ ናዓው፣ ታው ቃቋታርኪ፤ ታ ናዓው ቱና ኣያናይ ኦይኪዲ ኢታ ዋይሴሰ» ያገሰ።

23 ሺን ዩሱሲ ኢሲ ቃላካ ዛሮና ሲዒ ገሰ። ዩሱሳ ታማሬቲ ኢያኮ ዩዲ፣ «ሃ ማጫሲያ ኦ ጌዶ ካላ ካላዳ፣ ዋሳወሱ። ሄሳ ገሰ፣ ኔኒ ኢዮ ሞይዛርኪ» ያገዲ ዋሲደሶና።

24 ዩሱሲ ዛሪዲ፣ «ታኒ ዉዴፔ ቋዩዳ ደርሳዳ ኢሰራዔሌ ኬላፌ ቋዩዳ ኣሳታ ፃላላሰ ኪቴታሰ» ያገሰ።

25 ሺን ኢያ፣ ኢያ ሲንላን ኩንዳዳ፣ «ጎዳው፣ ታና ማደርኪ?» ያገሰ።

26 ኢ ዛሪዲ፣ «ናይታ ካሊ ኤኪዲ ካናታሰ ዩጌይሲ ሎዖ ገዴና» ያገሰ።

27 ማጫሲያካ፣ «ጎዳው፣ ሄሲ ቱማ፣ ሺን ሃሪ ኣቶሺን ካናቲ ባንታ ጎዳቲ ሚሺን፣ ጋይታፔ ዋቋያ ቲፊያ ሞሶና» ያገሰ።

28 ዩሱሲ ዛሪዲ፣ «ሃ ማጫሴቲ፣ ኔ ኣማኖይ ገታ፤ ኔ ኮዩዲይሳዳ ኔው ሃና» ያገሰ። ኢ ናዒያ ኢራካ ፓፃ ኣገሰ።

ዩሱሲ ዳሮ ሃርጋንቾታ ፓሊሰ

29 ዩሱሲ ያፔ ዴንዲዲ ጋለላ ኣባ ማቲ ቢሰ። ኢሲ ዴሬ ቦላ ኬዩዲ፣ ያን ኡቲሰ። 30 ዳሮ ኣሳይ ባንታራ፣ ዋቤታ፣ ቆቁታ፣ ኩናታ፣ ደና ሙሜታኔ፣ ሃራ ዳሮ ሃርጋንቾታ ኤኪዲ፣ ኢያኮ ኤሂዲ ኢያ ሲንላን ዋሊደሶና። ዩሱሲ ኤንታና ፓሊሰ። 31 ሄሳ ገሰ፣ ሙሜቲ ኦዴቲሺን፣ ኩናቲ ፒዲ ገሺን፣ ዋቤቲ ሃሙቲሺን፣ ቆቁቲ ያሊሺን ኣሳይ ቤዒዲ ማላሌቲዲ፣ ኢሰራዔሌ ያሳ ጋላቲደሶና።

ዩሱሲ ኦይዲ ሙኩሉ ኣሳ ሙዚሰ
(ማር 8:1-10)

32 ዩሱሲ ባ ታማሬታ ባኮ ፃገዲ፣ «ሃ ዳሮ ኣሳይ ታራ ሄቩ ጋላሰ ጋምዒዳ ገሸኔ ኤንታው ሃዒ ሚያባይ ባይና ገሸ ታኒ ኤንታው ቃቋታይሰ። ኤንቲ ኦጌን ዳቡሪዲ ኩንደና ሜላ ኣይኮ ሙዝና ኤንታ ሜላ ዩዳናው ኮዩኬ» ያገሰ።

15:18 ማቶ 12:34

33 ኢየ ታማራቲ ዛሪዲ፥ «ኩሂ ሃ ባዙዋን ሃይሳ ከና አሳሰ ጊዲያ ካሏ አዉፔ ዴማኔ?» ያጊደሶና።

34 ዩሱሲ ኤንታኮ፥ «ሂንቴው አፑን ኡይሌ ዴዒ?» ያጊዲ ኦይቺሰ።

ኤንቲ ዛሪዲ፥ «ላፑን ኡይሌኔ ላፋ ሞሎታፔ ጉሌ ዴዔስ» ያጊደሶና።

35 ዩሱሲ ዴሪያ ሳዓን ኡቲቲ ያጊዲ ከቲሰ። 36 ሄሳፌ ጉዬ፥ ሄ ላፑን ኡይላኔ ሞሉዋ ኤኪዲ ያሳ ጋላቲሰ። ሜንሌዲ ባ ታማራታሰ ኤሚሰ። ኢየ ታማራቲ አሳሰ ጊሺደሶና።

37 አሳይ ኡባይ ሚዲ ካሊደሶና። ኢየ ታማራቲ፥ ሚሺን አቲዳ ቲፊያ ላፑን ጌታ ጋይታ ኩሜሌ ዴንሌደሶና። 38 ሚዳ አሳይ ማጫሲኔ ናዓ ፓይደና ኣዴ ዓላሊ ኦይዲ ሙኩሉ። 39 ዩሱሲ ዴሪያ ዩዲዳፔ ጉዬ ዋሳሉዋን ጌሊዲ ማጌደና ጊያ ቢታ ቢሰ።

16

ሳሎፔ ማላ ቤዓናው ኦይቺዳ ኦይሻ

(ማር 8:11-13፤ ሉቃ 12:54-56)

1 ፋሪሳዌቲኔ ሳዲቃዌቲ ዩሱሳኮ ዪደሶና። ኢየ ፓጫናው ኮዪዲ፥ ባንታና ሳሎፔ ማላታ ቤሶ ጊዲ ኦይቺደሶና። 2 ሺን ኢ ኤንታኮ፥ «ሳዒ ኦማርሲያ ዋዴ ሳሎይ ዘዒዳ ጊሾ ዋንቶ ቦቃላና) ያጌታ። 3 ዋንቲያ ዋዴ፥ ሳሎይ ዘዒዲ ሻራቲዳ ጊሾ ኢራይ ቡካና) ያጌታ። ያቲን ሂንቲ ሳሎ ማላ ቤዒዲ ኤሬታ፥ ሺን ዋዲያ ማላ ኤራናው ዳንዳዒቤኬታ። 4 ኢታኔ አማኖና ዩሌቴላይ ማላታ ኮዬስ። ሺን ኢያው ዮናሳ ማላታፔ ሃራ ማላቲ ኢሜቴና» ያጊሰ። ሄሳፌ ጉዬ፥ ኤንታና ያን ኣጊዲ ሃራ ሶ ቢሰ።

ፋሪሳዌታኔ ሳዲቃዌታ ኢርሹዋ

(ማር 8:14-21)

5 ኤንቲ አባፌ ሄፊንሌ ፒኒዳ ዋዴ ዳቦ ኤኪዲ ያናይሳ ደጊደሶና። 6 ዩሱሲ ኤንታኮ፥ «ፋሪሳዌታፔኔ ሳዲቃዌታ ኢርሹዋፊ ናጌቲቲ» ያጊሰ። 7 ኤንቲካ ባንታ ጋርሳን፥ «ኢ ሄሳ ጊዳይ ኑ ዳቦ ኤኪዲ ዮና ጊሾሳ ጊዳና» ያጊደሶና። 8 ዩሱሰ ኤንታ ቆፋ ኤሪዲ፥ «ሂንቴኖ፥ አማኖይ ፓጫዳይሳቶ! ዳቦ ኤኮና ዪዳ ጊሾ ዋሊ ጊደን ኣይሰ ኦዴቲቲ? 9 ሃዒካ ሂንቲ ኣከኬቲ? ኢቻሹ ሙኩሉ አሳሰ ኢቻሹ ኡይላ ጊሺዳይሳኔ ኤንቲ

16:1 ማቶ 12:38፤ ሉቃ 11:16 16:4 ማቶ 12:39፤ ሉቃ 11:29 16:6 ሉቃ 12:1

ሚዲ ካለን ሂንቲ አቸን ጋይታ ኩሚሊ ዴንሊዳኮ ደገዴቲ?
 10 ሃሳዳካ፡ ላቸን ኡይላ ኦይዲ ሙኩሉ አሳሰ ገሺዲይሳኔ ኤንቲ ሚዲ ካለን፡ ሂንቲ አቸን ገታ ጋይታ ኩሚሊ ዴንሊዳኮ አክኬኬቲ? 11 ሂዛ፡ ታኒ ፋሪሳዌታኔ ሳዲቃዌታ ኢርሹዋፊ ናጌቲቲ ጋዳ ኦይይሲ ዳቦባ ገደናይሳ አክኬኬቲ?» ያገሰ።
 12 ያቲን፡ ኢያ ታማሬቲ ዬሱሲ ኦይይ ሙኦቃ ዴንላናው ዬጌቲያ ኢርሹባ ገደናሺን ፋሪሳዌታኔ ሳዲቃዌታ ቲሚርቲያፊ ናጌታናይሳ ገደይሳ አክኪደሶና።

ጳውሎስ ዮሐንስ ጉዲሰ
 (ማር 8:27-30፤ ሉቃ 9:18-21)

13 ዮሐንስ ቁሳሪያ ፊልጶሳ ቢታ ጋኪዳ ዋዴ ባ ታማሬታኮ፡ «አሳይ፡ አሳ ናዓ ኦና ጎና?» ያገዲ ኦይቸሰ።

14 ኤንቲካ፡ «ኢሶቲ ኢሶቲ ፃማቂያ ዮሃንሳ፡ ሃራቲ ኤሊያሳ ቃሲ ሃንኮቲ ኤርሚያሳ ዋይኮ ናቤታፔ ኢሱዋ ጎሶና» ያገደሶና።

15 ዮሐንስ ዛሪዲ፡ «ያቲን፡ ሂንቲ ታና ኦና ጌቲ» ገዲ ኤንታ ኦይቸሰ።

16 ሲሞና ጳውሎስ ዛሪዲ፡ «ኔኒ ኪሪሰቶሳ፡ ዴዎ ያሳ ናዓ» ያገሰ።

17 ዮሐንስ ጳውሎስ፡ «ዮና ናዓ ሲሞና፡ ኔኒ አንጃቲዳይሳ! ሃይሳ ኔው ቆንጨሲዳይ ሳሉዋን ዴዒያ ታ አዋፔ አቲን አሴ ገዴና። 18 ታ ኔው ኦይይሰ ጳውሎስ፡ ኔኒ ዛላ! ታኒ ሃ ዛላ ቦላ ታ ዋሳ ኬላ ከፃና። ሃይቆ ዋልቃቲካ ኢዮ ያኖኮና። 19 ሳሎ ካዋቲላ ቁልፔታ ታ ኔው ኢማና፡ ሳዓን ኔኒ ዲገያባይ ኡባይ ሳሎን ያሳ ማታን ዲጌቲዳባ ገዴና። ሳዓን ኔኒ ሃኖ ገያባይ ኡባይ ሳሎን ያሳ ማታን ሃኒዳባ ገዴና» ያገሰ።

20 ሃሳፊ ጉዬ፡ ኢ፡ ኪሪሰቶሳ ገዴይሳ ኦይሰካ ኦደና ሜላ ባ ታማሬታ ሚንሊዲ ከቲሰ።

ዮሐንስ ባና ጋካና ዋያ ጉዲሰ

21 ሄ ዋዲያፔ ደሚዲ ዮሐንስ ባ ታማሬታሰ፡ «ታኒ ዬሩሳላሚ ባናው ቤሴሰ። ያን ዴሪያ ጨማታን፡ ካሂኔ ሃላቃታኔ ሂጌ አሰታማሬታ ኩሼን ዋዬ ኤካናው ቤሴሰ። ኤንቲ ታና ዋዳና፡ ሺን ታኒ ሄቫንሶ ጋላሰ ሃይቆፔ ዴንዳና» ያገዲ ቆንጨሲሰ።

16:9 ማቶ 14:17 16:10 ማቶ 15:34 16:14 ማቶ 14:1 16:16 ዮሃ 6:68 16:19 ማቶ 18:18፤ ዮሃ 20:23

22 ጳጳሮሲ ዩሱሳ ጋፃ ከሲዲ፡ «ጎዳው፡ ሄሲ ሃኔና! ሄሳ ማላባይ ኔና ኡባራካ ጋኮፎ!» ያጊዲ ሃንቁቲስ።

23 ዩሱሲ ጳጳሮሳኮ ጉዬ ሲሚዲ፡ «ሃ ፃላሂያው፡ ታፔ ሃካ! ኔኒ አሳ ቆፋ ቆፓሳፔ አቲን ፆሳ ቆፋ ቆፖና ጊሾ ታው ጳቤ ጊዳሳ» ያጊስ።

24 ሄሳፌ ጉዬ፡ ዩሱሲ ባ ታማሬታኮ፡ «ኦኒካ ታና ካላናው ኮያባ ጊዲኮ ባና ካዶ፡ ባ ማስቃሊያ ቶኪዲ ታና ካሎ። 25 ባ ዴዑቀ አሻናው ኮያ ኡባይ ቆይሴስ። ሺን ባ ዴዑቀ ታ ጊሾ ጊዲ አሊ ኢሜይሲ አሼስ። 26 አሲ አላሜ ኩሜላ ባባ ኦሊዲ፡ ጊዶሺን ባ ሼምፑቀ ቆይሲኮ ኢያ አይ ማዲ? ዎይኮ አሲ ባ ሼምፑቀ ላሜ አይ ኢማናው ዳንዳዲ? 27 አሳ ናዓይ ባ አቀ ቦንቹቀን ባ ኪታንቸታራ ያና። ሄ ዎዴ ኢሲ ኢሲ ኡራስ ኢያ ኦሱቀዳ ኢማና።

28 ታ ቱማ ኦዳይስ፤ አሳ ናዓይ ካቀ ጊዲዲ ሲሜይሳ ቤዓና ጋካናው ሃይሳን ኤቁዳ አሳፔ ሃይቆናይሳቲ ዴፆሶና» ያጊስ።

17

ዩሱሳ ማላይ ላሜቲስ (ማር 9:2-13፤ ሉቃ 9:28-36)

1 ኡሱፑን ጋላሳፔ ጉዬ ዩሱሲ፡ ጳጳሮሳ፡ ያይቆባኔ ኢያ አሻ ዮሃኒሳ ባራ ኤኪዲ ባንታርካ ጊዳናው ዴሪያ ቦላ ከዩስ። 2 ያን ኤንታ ሲንላን ዩሱሳ ማላይ ኩሜሊ ላሜቲስ፤ ኢያ ሶምፆይካ አቀዳ ያልቁስ። ኢያ ማፆይካ ዳሮ ቦዲስ። 3 ሄኮ፡ ሙሴይኔ ኤሊያሲ ኢያራ ኦዴቲሺን ቤዒዶሶና። 4 ጳጳሮሲ ዩሱሳኮ፡ «ኦኒ ሃይሳ ሃሹ ዩዳ፡ ኔ ኮይኮ ኢሲኖ ኔው፡ ኢሲኖ ሙሴስ፡ ኢሲኖ ኤሊያሳስ ሃይሳን ሄቹ ሻቃራ ሻቃራና» ያጊስ። 5 ጳጳሮሲ ሄሳ ቡሮ ኦዲሺን ቦላ ሻራይ ኤንታና ካሚስ። ሻራ ጊዶራ፡ «ታና ኡፋይሲያ፡ ታ ዶሲያ ናዓይ ሃይሳ፡ ኢያ ሲዒቲ!» ያጊያ ቃላይ ዩስ። 6 ዩሱሳ ታማሬቲ ሄሳ ሲዒዳ ዎዴ ዳጋሚዲ ባንታ ሶምዑቀራ ሳዓን ኩንዲዶሶና። 7 ሺን ዩሱሲ ኤንታኮ ሸቁዲ ኤንታ ቦቹዲ፡ «ዴንዲቲ፡ ያዮፊቲ!» ያጊስ። 8 ኤንቲ ጶቁ ጊዲ ቤዒያ ዎዴ ዩሱሳፔ ሃራ ኦናካ ቤዒቦኮና።

16:24 ማቶ 10:38፤ ሉቃ 14:27 16:25 ማቶ 10:39፤ ሉቃ 17:33፤ ዮሃ 12:25 16:27 ማቶ 25:31፤ ማዝ 62:12፤ ሮሜ 2:6 17:1 2ጴጌ 1:17-18
17:5 ሜጴ 22:2፤ ማዝ 2:7፤ ኢሳ 42:1፤ ማቶ 3:17፤ 12:18፤ ማር 1:11፤ ሉቃ 3:22፤ ዛሬ 18:15

9 ከንቲ ደሪያፔ ዋዲሽን ዩሱሲ ከንታኮ፡ «አሳ ናዓይ ሃይቆፔ ደንዳና ጋካናው ሃ ሂንቲ ቤዒዳባ ኦዲስካ ኦደፒቲ» ጊዲ ከቲሰ። 10 ዩሱሳ ታማሬቲ፡ «ያቲን፡ ሂጌ ኣስታማሬቲ ኤሊያሲ ከሪሰቶሳፕ ካሴቲዲ ያና ጊዳይ ኣይቢሴ?» ያጊዲ ኦይቺዶሶና።

11 ዩሱሲ ዛሪዲ፡ «ኤ! ኤሊያሲ ካሴቲ ዩዲ ኡባባ ጊጊሳና። 12 ሸን ታ ሂንቲው ቱማ ኦዲይሰ፤ ኤሊያሲ ካሴቲዲ ዩሰ። ከንቲካ ኢያ ቦላ ኮዩዳባ ኦሊዶሶናፕ ኣቲን ኢያ ሻኪ ኤሪሶኮና። ሄሳዳ አሳ ናዓይ ከንታ ኩሽን ዋዬታና» ያጊሰ።

13 ሄ ዋዬ ዩሱሲ ጊዳይ ፃማቂያ ዮሃንሳባ ጊዳይሳ ኣኬኪዶሶና።

ዩሱሲ ቱና ኣያናይ ኦይኪዳ ናዓ ፓላሰ
(ማር 9:14-29፤ ሉቃ 9:37-43)

14 ከንቲ ደሪያፔ ኣሳኮ ሲሚያ ዋዬ ኢሲ ኣሲ ዩሱሳ ሲንጻን ጉልባቲዲ፡ 15 «ጎዳው፡ ሃያና ታ ናዓሰ ቃዴታርኪ፤ ኢያ ሾጪዲ ዩጊያ ሃርጌይ ዳር ኡንዔሲዲ ታማኒኔ ሃላን ዩጌሰ። 16 ኔ ታማሬታኮ ኤሃሰ፡ ሸን ከንቲ ፓላናው ዳንዳዒቦኮና» ያጊሰ።

17 ዩሱሲ ዛሪዲ፡ «ሂንቲኖ፡ ኣማኖና ጌላ ዩሌቴላው ኣዉዴ ጋካናው ታ ሂንቲራ ዳኔ? ኣዉዴ ጋካናው ታ ሂንቲና ዳንዳዓኔ? ኣኔ ናዓ ሃ ኤኪ ዩቲ» ያጊሰ። 18 ዩሱሲ ቱና ኣያና ሃንቁን፡ ቱና ኣያናይ ናዓፔ ኬዩሰ፤ ሄ ሳቲንካ ናዓይ ፓዒሰ። 19 ሄሳፌ ጉዩ፡ ዩሱሳ ታማሬቲ ባንታርካ ኢያኮ ሸቂዲ፡ «ኦኒ ቱና ኣያና ኬሳናው ዳንዳዒቦናይ ኣይቢሴ?» ያጊዲ ኦይቺዶሶና። 20 ኢ ከንታኮ፡ «ሂንቲው ኣማኖይ ላፊዳ ጊሾሳ። ታ ሂንቲው ቱማ ኦዲይሰ፤ ጋሼ ኣይፌ ሜላ ኣማኖይ ሂንቲው ዳዒኮ <ሃ ደሪያ ሃይሳፌ ደንዳዳ ጌዴ ኣቆ> ጊኮ ሂንቲው ከቲታና። ሂንቲው ዳንዳዔቶናባይ ዳና። 21 [ሸን ሄሳ ሜላይ ዋሳፔኔ ያማፔ ኣቲን ሃራን ኬዩና]» ያጊሰ። *

ዩሱሲ ባ ሃይቁዋባ ዛሪ ኦዲሰ
(ማር 9:30-32፤ ሉቃ 9:43-45)

22 ዩሱሳ ታማሬቲ ጋሊላን ሸቂዲ ዳዒሸን ዩሱሲ ከንታኮ፡ «አሳ ናዓይ ኣሳ ኩሽን ኣዲዲ ኣሜታና። 23 ከንቲ ኢያ ዋዳና፡ ሸን ኢ ሄቫንላ ጋላሰ ሃይቆፔ ደንዳና» ያጊሰ።

17:10 ሚሊ 4:5 17:12 ማቶ 11:14 17:21 ማቶ 21:21፤ ማር 11:23፤ 1ቆር 13:2 * 17:21 ኢሲ ኢሲ ቤኒ ማፃፋታን ፓይዶ 21 ዳና።

ኢያ ታማራቲካ ዳር ቂርቲዶሶና።

ጾሳ ከላ ገራ

24 ዬሱሳራኔ ኢያ ታማራታራ ቂፊርናሆሜ ካታማ ጋኪዳ ዎዴ ጾሳ ከላ ገራ ቃንጻሴይሳቲ ጳዲርሳኮ ዪዲ፥ «ሂንቴ ኣስታማራይ ጾሳ ከላ ገራ ገሪ?» ያገዲ ኦይቺዶሶና።

25 ጳዲርሲ ዛሪዲ፥ «ገሪስ» ያገሰ። ጳዲርሲ ሶ ጌሊያ ዎዴ ዬሱሲ ካሴቲዲ፥ «ጳዲርሳ፥ ኔው ኣይ ዳኒ? ሃ ሳዓ ካዎቴላቲ ቃራጻኔ ገራ ኦፔ ኤኮና? ጋዴ ኣሳፔዬ ዎይኮ ኣሳ ጋዴ ኣሳፔ?» † ያገዲ ኦይቺሰ።

26 ጳዲርሲ «ኣሳ ጋዴ ኣሳፔ» ገዲ ዛሪስ።

ዬሱሲ ዛሪዲ፥ «ጋዴ ኣሳይ ገራ ገርኮና ጉሱ። 27 ሺን ኤንቲ ቋቤቶና ማላ ኣባ ባዳ ሞሉዎ ኣይኪያ ማንጻቆ ይጋ። ኮይር ኔ ኦይኪያ ሞሉዎ ዶና ዶያዳ ገራስ ገዲያ ሚሺያ ኔ ገሺኔ ታ ገሺ ኤፋዳ ገራ» ያገሰ።

18

ኡባፌ ኣጼይ ኦኔ?

(ማር 9:33-37፤ ሉቃ 9:46-48)

1 ሄ ዎዴ ዬሱሳ ታማራቲ ዪዲ፥ «ሳሎ ካዎቴላን ኡባፌ ኣጼይ ኦኔ?» ያገዲ ኦይቺዶሶና። 2 ዬሱሲ ኢሲ ጉላ ናዓ ጻገዲ ኤንታ ገደን ኤሲዲ ሃይሳዳ ያገሰ። 3 «ታኒ ሂንቴው ቱማ ኦዳይሰ፤ ሂንቴ ላሚቶናኔ ጉላ ናይታዳ ሃኖና ኢጻኮ ሳሎ ካዎቴላ ኡባራካ ጌላናው ዳንዳዔኬታ። 4 ሂዛ፥ ሃ ጉላ ናዓዳ ባና ካዉሺያ ኦኒካ ሳሎ ካዎቴላን ኡባፌ ኣጼይሳ ገዳና። 5 ሃይሳ ማላ ናዓ ታ ሱንላን ሞኪያ ኦኒካ ታና ሞኬሰ።

6 «ሺን ታናን ኣማኒያ ሃ ጉላታፔ ኢሱዎ ናጋራ ኦላና ማላ ቋቤ ገዲያ ኦኒካ ገታ ጋቻ ዎፃ ባ ቆጼን ቃቺዲ ጨሞ ኣባን ሚቴቲኮ ኢያው ሎዎ። 7 ኣላሚን ኣሳይ ናጋራ ኦላና ማላ ኦሊያባቲ ዳዒያ ገሺ ኣላሚያ ኣዬ። ሄሳ ማላባቲ ዮና ኣቲና፥ ሺን ቋቤይ ኢያ ጋሰን ያ ኡራ ኣዬ።

8 «ኔ ኩሺይ ዎይኮ ኔ ቶሆይ ኔና ባሌሊኮ ኔፔ ቃንጻ ይጋ። ኔኒ ናሞው ኩሺራ ዎይኮ ናሞው ቶሆራ ሜሪና ታማን ዬጌታናይሳፌ

17:24 ከላ 30:13 † 17:25 ጋዴ ኣሳፔዬ ዎይኮ ኣሳ ጋዴ ኣሳፔ? ሄ ዎዴ ካዎቴላቲ ባንታ ጋዴ ኣሳፔ ገራ ኤኮኮና። 18:1 ሉቃ 22:24 18:3 ማር 10:15፤ ሉቃ 18:17

ኩሼ ዋይኮ ቶሆ ዲፃ ጊዳዳ ሜሪና ዴፖ ዳሜይሲ ኔው ሎፖ።
9 ቃሲ ኔ አይፌይ ኔና ባሌሊኮ ኢዮ ዋጫ ኬሳዳ ዋራ ሆላ። ኔኒ ናምቡ አይፌራ ጋናሜ ታማን ዩጌቴይሳፌ ኢሲ አይፌራ ሜሪና ዴቦዋ ጌሌይሲ ኔው ሎፖ።

10 «ታ ሂንቴው ኦዳይሰ፤ ሳሎን ዳዒያ ኤንታ ናጊያ ኪታንኛቲ ኡባ ዋዴ ሳሎን ዳዒያ ታ ኣዋ ሲንፋን ዳዒያ ጊሾ ሂንቴ ሃ ጉላታፔ ኢሱዋካ ካዶና ሜላ ናጌቲቴ። 11 ኣሳ ናዓይ ዳይዳይሳታ ኣሻናው ዩሰ» * ያጊሰ።

ዳዩዳ ደርሳ ለሚሶ
(ሉቃ 15:3-7)

12 ቃሲ ዩሱሲ፣ «ሂንቴው ኣይ ዳኒ? ኢሲ ኡራሰ ፃቴ ደርሳቲ ዴዔይሳታፔ ኢሶይ ዳዩኮ ኡዱፋን ታማኔ ኡዱፋናታ ዳሪያ ቦላ ዩጌ ኣጊዲ ህ ዳዩዳይሳ ኮያናው ቤኔ? 13 ታ ቱማ ኦዳይሰ፤ ኢ ዳሚዳ ዋዴ ኡዱፋን ታማኔ ኡዱፋናታፔ ኣሊዲ ዳዩዲ ቤንቲዳ ኢሲ ደርሳን ኡፋይቴሰ። 14 ሄሳዳካ፣ ሳሎን ዳዒያ ሂንቴ ኣዋይ ሃ ጉላታፔ ኢሶይ ዳያና ሜላ ኮዬና።

ቆሂዳ ኣሲ ዋታኔ?

15 «ኔ ኢሻይ ኔና ቆሂኮ ኔርካ ኢያኮ ባዳ ኢያ ባላ ኢያው ኦዳ። ኢ ኔና ሲዒኮ ኔ ኢሻ ኔው ኢሻ ኦላ። 16 ሺን ኢ ኔና ሲዖና ኢዒኮ፣ ናምቡ ዋይኮ ሄቹ ኣሳ ማርካን ሞቶይ ላሴቲያ ጊሾ ኢሲ ዋይኮ ናምቡ ኣሲ ኤካዳ ኢያኮ ባ። 17 ኢ ኤንታና ሲዖና ኢዒኮ፣ ዋሳ ኬላሰ ኦዳ። ዋሳ ኬሊ ጊያባ ሲዖና ኢዒኮ ኣማኖና ኣሳዳ ዋይኮ ቃራፃ ቃንዒሲያ ኣሳዳ ኢያ ፓይዳ።

18 «ታ ሂንቴው ቱማ ኦዳይሰ፤ ሳዓን ሂንቴ ዲጊያባቲ ኡባይ ሳሎን ያሳ ማታን ዲጌቲዳባ ጊዳና። ሳዓን ሂንቴ ሃኖ ጊያባቲ ኡባይ ሳሎን ያሳ ማታን ሃኒዳባ ጊዳና።

19 «ቃሲካ ታ ሂንቴው ኦዳይሰ፤ ሳዓን ሂንቴፌ ናምዓይ ባንታ ዋሲያባሰ ኢሲ ዋዛናን ጊዲዲ ያሳ ዋሲያባ ጊዲኮ ሳሎን ዳዒያ ታ ኣዋይ ሂንቴው ኦላና። 20 ታና ካሌይሳታፔ ናምዓ ዋይኮ ሄቫ ጊዲዲ ሸቁያ ቤሳን ታኒ ኤንታ ጊደን ቤንታና» ያጊሰ።

ኣቶ ጉሳባ

18:8 ማቶ 5:30 18:9 ማቶ 5:29 18:10 ሉቃ 19:10 * 18:11 ኣሳ ናዓይ ዳይዳይሳታ ኣሻናው ዩሰ፡ ኢሲ ኢሲ ቤኒ ማፃፋቲ ፓይዶ 11 ጉጆሶና።
18:15 ሉቃ 17:3 18:16 ዛሬ 19:15 18:18 ማቶ 16:19፤ ዮሃ 20:23

21 ሄ ዎዴ ጳጳሮሲ ዩሱሳኮ ዩዲ፥ «ጎዳው፥ ታ ኢሻይ ታና ቆሂኮ ኣፑን ቶሆ ታኒ ኣቶ ጋናው ቤሲ? ላፑን ቶሆ ጋካናሴዬ?» ጊዲ ኦይቺሰ።

22 ዩሱሲ ዛሪዲ፥ «ጊዴና፥ ላፑን ታሙ ቶሆ ላፑናፔ ኣቲን ላፑን ቶሆ ጊዴና።

23 «ሄሳ ጊሾ፥ ፆሳ ካዎቴላይ ባ ኦሳንቸታራ ባ ሚሼይ ፓጩዳኮኔ ፓላሂዳኮ ቤዓናው ቆፒዳ ካወዎ ዳኔሰ። 24 ሄ ካዎይ ሚሼይ ፓጩዳኮኔ ፓላሂዳኮ ቤዒያ ዎዴ ዳሮ ጊንዲጊንዳ ኣጮይ ዳዒያ ኢሲ ኡራ ኢያኮ ኤሂዳሶና። 25 ሺን ሄ ኣይሌይ ኣጩዎ ቃንፃናው ፆኔቲን ኢያራ፥ ኢያ ማቺራ፥ ኢያ ናይቲኔ ኢያው ዳዒያባይ ኡባይ ባይዜቲዲ ኣጮይ ጩጌታና ሚላ ኢያ ጎዳይ ከቲሰ። 26 ፆቲን ኣይሌይ ባ ጎዳ ቶሁዎ ቦላ ጉልባቲዲ፥ ታ ጎዳው፥ ሃያና ጉላ ዎዴ ታካርኪ፥ ታ ኣጩዎ ኡባ ታ ጩጋና ያጊዲ ዎሲሰ። 27 ካዎይ ኢያው ቃጴቲዲ፥ ዩዲ ኣጊሰ፤ ኢያ ኣጩዎ ማሪሰ።

28 «ሺን ሄ ኣይሌይ ከዩ ቢዲ ባ ላጌ ኦሳንቸታፔ ኢሶይ ባፔ ዳሮ ጉላ ሚሼ ታልዒዳይሳ፥ ኔ ቦላ ዳዒያ ታ ሚሺያ ታው ጩጋ) ጊዲ ቆጴ ኦይኪሰ።

29 «ሄ ኢያ ላጌ ኣይሌይ ኢያ ሲንላን ጉልባቲዲ፥ ሃያና ጉላ ዎዴ ታካርኪ ታኒ ታ ኣጩዎ ኡባ ጩጋና) ያጊዲ ዎሲሰ።

30 «ሺን ኢዲዲ ኤኪ ኤፊዲ ባ ላጌይ ኣጩዎ ቃንፃና ጋካናው ቃሾ ከላ ጌልሲሰ። 31 ሄሳ ጊሾ፥ ሃራ ላጌ ኦሳንቸቲ ሄሳ ቤዒዳ ዎዴ ዳሮ ዩሎቲዲ፥ ቢዲ ባንታ ጎዳሰ ኢ ኦላዳባ ኡባ ኦዲደሶና።

32 «ያቲን ካዎይ ሄ ኣይሊያ ፃጊሲዲ፥ ሃ ኢታ ኣይሊያው፥ ኔኒ ታና ዎሲዳ ጊሾ ታ ኔ ኣጩዎ ኡባ ኔው ማራሰ። 33 ፆቲን፥ ታኒ ኔ ኣጩዎ ማሪዳይሳዳ ኔኒ ኔ ላጌ ኣይሊያ ኣጩዎ ማራናው ኔው ቤሴኔ?) ያጊሰ። 34 ሄሳ ጊሾ፥ ካዎይ ዳሮ ዩሎቲዲ፥ ኢ ባ ኣጩዎ ኡባ ጩጋና ጋካናው ፓፃ ካዔታና ሚላ ቃሾ ከላን ዩጊሰ።

35 «ሄሳዳካ፥ ሂንቴ ኢሶይ ኢሶይ ሂንቴ ኢሻ ዎዛናፔ ማሮና ኢዲኮ ሳሎን ዳዒያ ታ ኣዎይ ሂንቴና ሄሳዳ ኦላና» ያጊሰ።

19

ኤኮ ጌሎባ (ማር 10:1-12)

1 ዩሱሲ ሃሳ ኦዲ ኦንጊዳፔ ጉዬ ጋለላፔ ዳንዲዲ ዮርዳኖሴ ሻፋፔ ሄሬንላን ዳዒያ ዩሁዳ ቢታ ቢሰ። 2 ዳር ኣሳይ ኢያ ካሊዲ ቢን ኤንታ ጊዶሬ ሃርጋንቸታ ፓሊሰ።

3 ፋሪሳዊቲ ኢያ ፓጫናው ኮዪዲ ኢያኮ ዩዲ፣ «ኢሲ ኣሲ ኣይ ጋሶንካ ባ ማቸው ዩዳናው ቤሲ?» ያጊዲ ኦይቸዶሶና።

4 ዩሱሲ ዛሪዲ፣ «ዖሳይ ኮይር ኣዴኔ ማጫሰ ኦሊ ሜጲዳይሳ ሂንቴ ናባቢኬቲ? 5 «ሃሳ ጊሾ፣ ኢሲ ኣሲ ባ ኣዋኔ ባ ኣዪው ኣጊዲ ባ ማቸራ ኢሲኖ ጊዴሰ፣ ናምዓይካ ኢሲ ኣሾ ጊዶሶና።»

6 ሃሳ ጊሾ፣ ኤንቴ ኢሲ ኣሾ ጊዶሶናፔ ኣቲን ናምዓ ጊዶኮና። ሂዛ፣ ዖሲ ቃቸዳይሳ ኣሲ ሻኮፎ» ያጊሰ።

7 ፋሪሳዊቲ፣ «ያቲን፣ ሙሴይ ኢሲ ኣሲ ኣንጆ ዋርቃቴ ኢሚዲ ዩዳና ማላ ኣይሰ ከቲዳ?» ያጊዲ ኦይቸዶሶና።

8 ዩሱሲ ዛሪዲ፣ «ሂንቴ፣ ሂንቴ ማቸታ ዩዳና ማላ ሙሴይ ሂንቴና ከቲዳይ፣ ሂንቴ ዋዛና ሚኖቴላ ጊሾፔ ኣቲን ኮይርፔ ሃሳ ማላ ጊዴና። 9 ታ ሂንቴው ኦዳይሰ፤ ባ ማቸያ ላይማቶና ዳዒሺን ዩዲዲ ሃራ ኤኪያ ኣኒካ ሳሜሰ» ያጊሰ።

10 ኢያ ታማሬቲ ኢያኮ፣ «ኣዚናባይኔ ማቸባይ ሃሳ ማላ ጊዲኮ ኤኮ ጌሎይ ኣቲኮ ሎዖ» ያጊዶሶና።

11 ዩሱሲ ዛሪዲ፣ «ሃሳ ማላ ቲሚርቴይ ዖሳይ ዳንዳዓ ኢሚዳይሳታሳሬ ኣቲን ኣሳ ኡባሳ ጊዴና። 12 ሂዛ፣ ዩሌቲሼ ሹፋ ጊዲዲ ዩሌቲዳይሳቲ ዳዖሶና፣ ቃሲ ኣሲ ቃራቲዳይሳቲ ዳዖሶና፣ ቃሲ ሳሎ ካዋቴላ ጊሾ ጊዲ ባንታና ሹፋይዳይሳቲ ዳዖሶና። ሃሳ ጊሾ፣ ሃይሳ ኤካናው ዳንዳዒያ ኦኒካ ኤኮ» ያጊሰ።

ዩሱሲ ጉላ ናይታ ኣንጂሰ (ማር 10:13-16፤ ሉቃ 18:15-17)

13 ዩሱሲ ባ ኩሺያ ጉላ ናይታ ቦላ ዋሊዲ ኤንታው ዋሳና ማላ ኢሲ ኢሲ ኣሳይ ናይታ ኢያኮ ኤሂዶሶና። ሺን ኢያ ታማሬቲ ኣሳ ሃንቄቲዶሶና። 14 ሺን ዩሱሲ፣ «ዖሳ ካዋቴላይ ሃይሳታ ማላሳ ጊዲያ ጊሾ ጉላ ናይቲ ታኮ ዩይሳ ዲጎሬቲ፤ ዮ ጊቲ» ያጊሰ።

15 ባ ኩሺያ ኤንታ ቦላ ዋሊዳፔ ጉዬ ሄ ቤሳሬ ኣጊዲ ቢሰ።

19:4 ሜዴ 1:27፤ 5:1 19:5 ሜዴ 2:24 19:7 ሜዴ 24:1 19:9 ማቶ 5:32፤ 1፳ሮ 7:10

ናዓቴላ ዱሬ ኡራ
(ማር 10:17-31፤ ሉቃ 18:18-30)

16 ኢሲ ጋላስ ኢሲ ኡራይ ዩሱሳኮ ዩዲ፡ «አስታማሪያው፡ ታኒ ሜሪና ዴያ ዴማናው አይ ሎዖባ ኦቶ?» ያጊሰ። 17 ዩሱሲ ኢያኮ፡ «ሎዖባ ኔ ታና አይሰ ኦይቻይ? ኢሲ ያሳፌ አቲን ሃሪ ሎዖይ ባዋ። ሺን ኔኒ ሜሪና ዴዑዋ ኤካናው ኮይኮ ኪታታ ናጋ» ያጊሰ።

18 ኡራይ ዛሪዲ፡ «አዉሳ ኪታታ» ያጊዲ ኦይቸሰ። ዩሱሲ ዛሪዲ፡ «ዎጵፓ፡ ላይማቶፓ፡ ካይሶቶፓ፡ ዎርዶ ማርካቶፋ፡ 19 ኔ አዋኔ ኔ አዪው ቦንቻ፡ ኔ ሸሩዋ ኔ ሁዲያላ ደሳ» ያጊሰ።

20 ሄ ናዓቴላይ፡ «ታኒ ሃይሳታ ኡባ ናዓቴላፌ ደማዳ ናጋሰ። ያቲን፡ ሃሪ ታው ፓጩያባይ አይቤ?» ያጊዲ ኦይቸሰ።

21 ዩሱሲ ዛሪዲ፡ «ኔኒ ፖሎ ጊዳናው ኮይኮ ባዳ ኔው ዴዲያባ ባይዛዳ ማንቆታሰ አማ፤ ኔኒ ሳሎን ዱሬታና። ያታ ሲማ ያዳ ታና ካላ» ያጊሰ።

22 ሺን ሄ ናቴላ ኡራይ ዳሮ ዱሬ ጊዲያ ጊሾ ሄሳ ሲዲዳ ዎዴ አዛኒሼ አጊዲ ቢሰ። 23 ሄሳፌ ጉዬ፡ ዩሱሲ ባ ታማሬታ፡ «ታኒ ሂንቲው ቱማ ኦዳይሰ፤ ዱሬይ ሳሎ ካዎቲሌ ጌላናይሲ ዳሮ ሜቶ። 24 ዱሬ አሲ ያሳ ካዎቲላ ጌላናይሳፌ ጊማሌይ ማርፔ ለሆሮ አጴይሲ ካዉዬሰ» ያጊሰ።

25 ዩሱሳ ታማሬቲ ሄሳ ሲዲዲ ማላሌቲዲ፡ «ያቲን፡ ኦኒ አታናው ዳንዳዲ?» ያጊዲ ኦይቸዶሶና።

26 ዩሱሲ ኤንታ ጫዲ ፃሊዲ፡ «ሃይሲ አሳሰ ዳንዳዔቴና፡ ሺን ያሳሰ ኡባይ ዳንዳዔቴሰ» ያጊሰ።

27 ጳዖርሲ ዛሪዲ፡ «ኦኒ ኡባባ አጊዲ ኔና ካሊዳ። ያቲን፡ ኦኒ አይ ዴማኔ?» ያጊሰ። 28 ዩሱሲ ኤንታኮ ሃይሳዳ ያጊሰ፡ «ታኒ ሂንቲው ቱማ ኦዳይሰ፤ አሳ ናዓይ ያና አላሚያን ባ ቦንቻ አራታን ኡቲያ ዎዴ ሂንቲ ታማኔ ናምዓቲ፡ ታና ካሊዳይሳቲ፡ ታማኔ ናምዑ አራታን ኡቲዲ ታማኔ ናምዑ ኢሰራዔሌ ዜሬላታ ቦላ ፒርዳና። 29 ታ ሱንላ ጊሾ ከሌ ዎይኮ አሻታ ዎይኮ ሚቹታ ዎይኮ አዋ ዎይኮ አዪው ዎይኮ ናይታ ዎይኮ ኃዲያ አጊዳይ ኦኒካ ፃቱ ኩሼ ኤካና። ቃሲ ሜሪና ዴዑዋካ ኤካና። 30 ሺን

19:18 ኬሳ 20:13-16፤ ዛሬ 5:17-20 19:19 ኬሳ 20:12፤ ዛሬ 5:16፤ ሉዌ 19:18 19:28 ማቶ 25:31፤ ሉቃ 22:30

ደርቲ ሃዲ ዳላን ሲንሐ ገዲዳይሳቲ ጉዬ ገደና፣ ቃሲ ጉዬ ገዲዳይሳቲ ሲንሐ ገደና» ያገሰ።

20

ዎይኒያ ገደን ኦሊያ ኦሳንቸታ ለሚሶ

1 «ጾሳ ካዎቲላይ ባ ዎይኒያ ገደን ኦሳንቸታ ከራ ኦሲሳናው ዎንታ ጉራ ከዩዳ ከላዎ ዳኔሰ። 2 ኢ ሄ ኦሳንቸታሰ ሃቺ ሃቺ ኢሲ ዲናሬ * ቃንፃናው ኤንታራ ገገዲ፣ ኤንታ ባ ዎይኒያ ገደ ዩዲሰ።

3 «ቃሲ ዎንታሬ ሄሹ ሳቲ ገዲሺን ከዩዲ ኦሶ ጳዩዲ ገያ ቦላ ኤቁዳ ሃራ ኦሳታ ዳሚሰ። 4 ኢ ኤንታታ፣ <ሂንቲካ ታ ዎይኒያ ገደ ቢዲ ኦሊቴ፣ ታኒ ሂንቲው ቤሲያ ጋቲያ ቃንፃና) ያገሰ። 5 ኤንቲካ ቢደሶና። ቃሲካ ኢ ኡሱቸን ሳቲኒኔ ኡዱፋን ሳቲን ከዩዲ ሃሳዳ ኦሊሰ። 6 ታማኔ ኢሲ ሳቲ ገዲሺን ኢ ከያ ዎዴ ሃራቲ ያን ኤቁዳይሳታ ዳሚዲ፣ <ሂንቲ ኦሶ ኦሶና ጋላሰ ኩሜላ ሃይሳን ኣይሰ ኤቁዲ ፔዒዳቲ?> ያገሰ።

7 «ኤንቲ ዛሪዲ፣ <ኑና ከራ ኦሲሲያ ኣሲ ጳዩዳ ገሾሳ) ያገደሶና።

«ኢካ፣ <ሂንቲካ ታ ዎይኒያ ገደ ቢዲ ኦሊቴ> ያገሰ።

8 «ሳዒ ኦማርሲን፣ ዎይኒያ ጎዳይ ኦሳንቸታ ሃላቃቱ፣ <ኦሳንቸታ ግጋዳ ወርሴላን ኦሶ ጌሊዳይሳታፔ ደማዳ ኮይሮ ጌሊዳይሳታ ጋካናው ኤንታ ጋቲያ ቃንፃ) ያገሰ። 9 ታማኔ ኢሲ ሳቲን ኦሶ ኦይኪዳይሳቲ ዩዲ፣ ሁዒን ሁዒን ኢሲ ኢሲ ዲናሬ ኤኪደሶና።

10 ኮይሮ ኦሶ ኦይኪዳይሳቲ ዩዲ፣ ባንታው ዳሮ ኢሜታና ገዲ ቆፒደሶና። ሺን ኤንቲካ ሁዒን ሁዒን ኢሲ ኢሲ ዲናሬ ኤኪደሶና።

11 ባንታ ሚሺያ ኤኪ ሰሚዲ ከላዎ ቦላ ዙዙሚደሶና።

12 <ሃይሳቲ ጉዬፔ ዩዲ ኢሲ ሳቲ ፃላላ ኦሊደሶና። ሺን ጋላሰ ኩሜላ ኣዎ ሱላን ደቡሪዲ ፔዒዳ ኑራ ኤንቲ ዋኒዲ ኢሲና ገደና) ያገደሶና።

13 «ዎይኒያ ከላዎይ ኦሳንቸታፔ ኢሱዋቱ፣ <ታ ኢሻው፣ ታኒ ኔና ቆሃቢኬ፤ ኔ ታራ ገገዳይ ኢሲ ዲናሬሳ ገዴኔ? 14 ኔ ሚሺያ ኤካዳ ኔ ሶ ባ። ታ ኦማርሲ ዩዳይሳሰካ ኔይሳ ሜላ ኢማናው ኮያይሰ። 15 ታኒ ታ ሚሺያን ኮዩዳባ ኦላናው ታው ማቲ ባዌ? ዎይኮ ታኒ ከሃ ገዲዳ ገሾ ኔኒ ቃናታይ?> ያገሰ።

19:30 ማቶ 20:16፤ ሉቃ 13:30 * 20:2 ኢሲ ዲናሬ፣ ኢሲ ኣሲ ኢሲ ጋላሰ ኦሊ ፔዒዲ ኤኪያ ሚሺ። 20:8 ለዌ 19:13፤ ዛሬ 24:15

16 «ሄሳዳ ሃዒ ዳላን ጉዬ ገዲዲይሳቲ ሲንላታና፥ ሲንላቲዲይሳቲ ቃሲ ጉዬታና» ያገለገሉ።

ዩሱሲ ባ ሃይቁዋባ ሄሻንሶ ኦዲሰ
(ማር 10:32-34፤ ሉቃ 18:31-34)

17 ዩሱሲ ዩሩሳሌም ቢሼ፥ ታማኔ ናምዑ ታማሪታ ዲማ ጋፃ ከሲዲ ኤንታኮ ያገለገሉ። 18 «ሄኮ፥ ኑኒ ሃዒ ዩሩሳሌም ቡሳ ቦላ ዳዖስ። ያን ኣሳ ናዓይ ካሂኔ ሃላቃታሲኔ ሂጌ ኣስታማሪታሰ ኣጲ ኢማታና። ኤንቲካ ኢያ ቦላ ሃይቆ ፐርዳ ፐርዳና። 19 ኢያ ኣይሁዴ ገደና ዴሪያሰ ኣሉ ኢማና። ኤንቲ ኢያ ካዉሻና፥ ጋራፋና፥ ያቲዲ ኢያ ማሰቃሊያ ቦላ ካቃና። ሺን ኢ ሄሻንሶ ጋላሰ ሃይቆፔ ዴንዳና» ያገለገሉ።

ዛብዲዮሳ ናይታ ኣዬ ዋሳ
(ማር 10:35-45)

20 ሄ ዋዴ ዛብዲዮሳ ማቺያ ባ ናምዑ ኣዴ ናይታራ ዩሱሳኮ ያዳ፥ ኢያ ሲንላን ጉልባታዳ ኢሲባ ኢያ ዋሳሱ።

21 ዩሱሲ ኢኮ፥ «ኔ ኣይ ኮያይ?» ያገለገሉ።

ኢያ ዛራዳ፥ «ኔ ካዋቲላን ሃ ታ ናምዑ ናይቲ ኢሶይ ኔ ኡሻቻን ኢሶይ ኔ ሃዲርሳን ኡቶ ጋርኪ!» ያጋሱ።

22 ሺን ዩሱሲ ናይታኮ ዛሪዲ፥ «ሂንቲ ኣይ ዋሲያኮ ኤሬኬታ፤ ታኒ ኡያናው ዴዒያ ዋዬ ፀዓ ኡያናው ዳንዳዔቲ?» ያገለገሉ።

ኤንቲካ፥ «ኤ ዳንዳዖሰ» ያገለገሉ።

23 ዩሱሲ፥ «ቱማካ ታኒ ኡያናው ዴዒያ ፀዓፔ ሂንቲ ኡያና። ሺን ታ ኡሻቻኒኔ ሃዲርሳን ኡታናይሳታ ዶሬይ ታና ገዲኬ። ሄ ቤሳይ ኢማቲይ፥ ታ ኣዋይ ኢማናው ገሊሲዳ ኣሳታሳ» ያገለገሉ።

24 ኣቲዳ ታሙ ኢያ ታማሪቲ ሄሳ ሲዒዳ ዋዴ ናምዑ ኢሻታ ቦላ ሃንቁቲደሶና። 25 ሺን ዩሱሲ ኤንታ ኡባ ፃገዲ ሃይሳዳ ያገለገሉ። «ኣይሁዴ ገደና ኣሳ ሃሪይሳቲ ባንታ ኣሳ ቦላ ጎዳቲይሳኔ ኤንታ ካሌጱይሳቲ ዋልቃን ሃሪይሳ ሂንቲ ኤሬታ። 26 ሺን ሂንቲ ገደን ሄሳዳ ገደፖ። ሂንቲፌ ገታታናው ኮያ ኦኒካ ሂንቲው ኣይሌ ገደ። 27 ሂንቲ ገደን ኡባፌ ቦላ ገደናው ኮያ ኦኒካ ሂንቲው ኣይሌ ገደናው ቤሴሰ። 28 ሄሳዳካ፥ ኣሳ ናዓይ ኣሴ ሃጋዛናው ዳር ኣሳ ዋዛናው ባ ሼምፑዋ ኢማናው ዩሲፔ ኣቲን ኣሳን ሃጋዜታናው ዩቤና» ያገለገሉ።

20:16 ማቶ 19:30፤ ማር 10:31፤ ሉቃ 13:30 20:26 ማቶ 23:11፤ ማር 9:35፤ ሉቃ 22:26

ዩሱሲ ናምዑ ቆቄታ ፓሊስ
(ማር 10:46-52፤ ሉቃ 18:35-43)

29 ሄሳፌ ጉዩ፣ ዩሱሲ ባ ታማሬታራ ኢያርኮፌ ከዩዲ ቢሺን፣ ዳር አሳይ ኤንታና ካሊደሶና። 30 ኦጌ ጋፃን ኡቲዳ ናምዑ ቆቄቲ ዩሱሲ ያራ አደይሳ ሰዒዲ፣ «ጎዳው፣ ዳዊቲ ናዓው፣ ኑስ ቃዴታርኪ» ያገዲ ዋሲደሶና። 31 ዳር አሳይ ኤንታና፣ «ሃይዚቲ» ያገዲ ካጪደሶና። ሺን ኤንቲ፣ «ጎዳው፣ ዳዊቲ ናዓው፣ ኑስ ቃዴታርኪ» ገዲ ጉጂ ዋሲደሶና።

32 ዩሱሲ ኤቁዲ፣ ኤንታ ፃገዲ፣ «ታ ሂንቲው አይ ኦላና ማላ ኮዩቲ?» ያገዲ ኦይቸሰ።

33 ኤንቲካ፣ «ጎዳው፣ ኑ አይፌይ ፃላና ማላ ኮዮስ» ያገደሶና። 34 ዩሱሲ ኤንታው ቃዴቲዲ፣ ኤንታ አይፌይ ቦቸሰ። ኤሌሲዲ ኤንታ አይፌይ ፃሊስ፤ ኤንቲ ኢያ ካሊዲ ቢደሶና።

21

ዩሱሲ ገታ ቦንቾን ዩሩሳላሜ ጌሊስ
(ማር 11:1-11፤ ሉቃ 19:28-40፤ ዮሃ 12:12-19)

1 ዩሱሳራኔ ኢያ ታማሬታራ ዩሩሳላሜ ማቲዲ፣ ሻማሆ ዳሪያ ቦላ ዳዒያ ቤቴፋን ገያ ጉታ ጋኪሹ፣ ዩሱሲ ባ ታማሬታፔ ናምዓታ ባፔ ሲንጤ ያገዲ ኪቲስ። 2 «ሂንቲፌ ሲንፋን ዳዒያ ጉታ ቢቲ። ያን ኢሲ ሃሬይ ቃሾን ዳዒያሮ ኢ ማራራ ሂንቲ ሶሁዋራ ዳማና። ኤንታ ቢሊዲ ሃ ኤኪ ዩቲ። 3 ኦኒካ ሂንቲና ኦይቸኮ፣ ጎዳይ ኤንታና ኮዩስ» ያገቲ። ኢ ኤንታና ኢራካ ዩዲ አጋና» ያገሰ።

4 ሄሰካ ናቤይ፣

5 «ፂዮኔ ካታማስ፣

ሄኮ፣ ኔ ካዋይ አሽኬ ገዲዲ፣ ሃሬ ቦላኔ

ሃሬ ማራ ቦላ ኡቲዲ፣ ኔኮ ዩስ» ያገቲ።

ያገዲ ፃፊደይሲ ፖሌታና ማላ ሄሲ ሃኒስ።

6 ኢያ ታማሬቲ ቢዲ ዩሱሲ ኤንታ ኪቲዳይሳዳ ኦሊደሶና።

7 ሃሪጫኔ ሃሬ ማራ ኤሂዲ ቦላራ ማዒዳ ባንታ ማዑዋ ኤንታ ዞኮን ዩገደሶና። ዩሱሲ ማፆታ ቦላ ኡቲስ። 8 ዳር አሳይ ባንታ ማዑዋ ኦጊያን ሂዲደሶና። ሃራቲ ቦንጮ ታሺዲ ኦጊያ ቦላ ዩገደሶና።

9 ዩሱሳላፔ ሲንፋራ ሃሙቴይሳቲኔ ኢያፔ ጉዩራ ካሊያ ዳር አሳይ።

«ሆሳና! * ዳዊቴ ናዓይ ጋላቴቶ!
 ጎዳ ሱንጻን ዩይሲ ኣንጃቴዳይሳ!
 ቦንቾይ ኡባፌ ጶቃ ሳሉዋን ያሳሰ ጊዶ!»
 ያጊዲ ዋሲዶሶና።

10 ዩሱሲ ዩሩሳሌም ካታማ ጌሊዳ ዎዴ ሄ ካታማን ዳዒያ ኣሳ ኡባይ፡ «ሃይሲ ኦኔ?» ያጊዲ ያርኪዶሶና።

11 ኣሳይ፡ «ሃይሲ ጋሊላን ዳዒያ ናዚሬቴ ካታማፔ ዩዳ ናቢያ ዩሱሳ» ያጊዶሶና።

ዩሱሲ ያሳ ኬሌ ጌሊሰ
 (ማር 11:15-19፤ ሉቃ 19:45-48፤ ዮሃ 2:13-22)

12 ዩሱሲ ያሳ ኬሌ ጌሊዲ፡ ያን ባይዜይሳታኔ ሻሜይሳታ ኡባ ካሬ ጎዲሰ። ሚሼ ላሜይሳታ ፃርጴዛታኔ ሆሌታ ባይዚያ ኦይዴታ ሺሪ ዩጊሰ። 13 ኢካ ኤንታኮ፡ «ያሳ ቃላን፡ ታ ኬላይ ያሳ ዋሲያ ኬሌ ጌቴታና፡ ጌቴቴ ፃፊቴሰ። ሺን ሂንቴ ፓንጋቴ ቆሴቴያ ጎንጎሎ ኦሊዴታ» ያጊሰ።

14 ዩሱሲ ያሳ ኬላን ዳዒሺን ቆቄቴኔ ጉንዳቴ ኢያኮ ዩን ኤንታ ፓሊሰ። 15 ሺን ካሂኔ ሃላቃቴኔ ሂጌ ኣሰታማሬቴ ዩሱሲ ኦሊዲ ማላሊሲያባታ ቤዒዳይሳሲኔ ጉላ ናይቴ ያሳ ኬላን፡ «ዳዊቴ ናዓይ፡ ጋላቴቶ» ያጊዲ ዋሲይሳ ሲዒዲ ሃንቄቴዶሶና። 16 ኤንቴ ዩሱሳኮ፡ «ሃይሳቴ ጌይሳ ኔ ሰዓይ?» ያጊዶሶና።

ዩሱሲ፡ «ኤ ሰዓይሰ፡ ያሳ ቃላን፡ ጉላ ናይታ ደናኒኔ ቆሚያ ናይታ ደናን ጋላታ ዎላዳሳ፡ ጌቴቴዲ ፃፊቴዳይሳ ሂንቴ ናባቢቤኬቴ?» ያጊሰ። 17 ኤንታና ያን ኣጊዲ ቢታኒያ ካታማ ቢዲ ኣቁሰ።

ጎዳይ ባዲዳ ባላሴ ሚሊው
 (ማር 11:12-14፤ 20-24)

18 ዩሱሲ ዎንታ ጉራ ካታማ ሲሚዲ ዩሼ ኮሻቴሰ። 19 ኦጌ ጋፃን ኢሲ ባላሴ ሚሊ ቤዒዲ ኢኮ ቢሰ። ሺን ሃይላፌ ኣቴን ሃራ ኣይኮካ ዳሚቤና። ሄሳ ጊሾ፡ ኢዮ፡ «ሂዛፔ ናምዓንጾ ኣይፊ ኣይፎፓ!» ያጊሰ። ሄ ባላሴ ሚሊያ ኤሌሳዳ ማላ ኣጋሰ።

20 ኢያ ታማሬቴ ሄሳ ቤዒዲ፡ «ሃ ባላሲያ ዎናዳ ኤሌሳ ማላዴ?» ያጊዲ ማላሌቴዶሶና።

* 21:9 ሆሳና፡ ኢብራይስጥ ደናን ሆሳና ጉሳይ «ኦና ኣሻ ጉሱ። ቃሲ ኣሳይ ያሳ ጋላታናው ጎዳቴያ ቃላ። 21:9 ማዝ 118:25 21:13 ኣሳ 56:7፤ ኤር 7:11

21 ዬሱሲ ዛሪዲ፡ «ታኒ ሂንቴው ቱማ ኦዲይሰ፤ ሂንቴው አማኖይ ዳዒኮ፡ ቃሲ ሂንቴ ሲጾና ኢዲኮ ባላሴ ቦላ ታኒ ኦሊዲይሳ ሜላ ፃላላ ኦሌኬታ፡ ሺን <ሃ ዳሪያ ሾዴታዳ አባን ዋቆ> ያገኑ ሃናና። 22 አማኒዲ ሂንቴ ዋሲያባ አይቢባ ገዲኮካ ሂንቴ ኤካና» ያገሰ።

ዬሱሳ ማታይ ኦይሼቲሰ
(ማር 11:27-33፤ ሉቃ 20:1-8)

23 ዬሱሲ ያሳ ኬላ ጌሊዲ ታማርሲሺን፡ ካሂኔ ሃላቃቲኔ አይሁዳ ጨማቲ ኢያኮ ዩዲ፡ «ኔኒ ሃይሳ ኦላና ሜላ ኔው አይ ማቲ ዳዒ? ኔው ሃ ማታ አሚዳይ ኦኔ?» ያገዲ ኦይቺዶሶና።

24 ዬሱሲ ኤንታኮ፡ «ታኒካ ሂንቴና ኢሲባ አይቻይሰ፤ ሂንቴ ታው ሄሳ ዛሪኮ፡ ታኒ አይ ማታን ኦሊያኮ ሂንቴው ኦዳና።

25 ዮሃኒሲ ፃማቃና ሜላ ማታይ አጩ ኢሜቲዳ? ያሳፊዬ ኦሳፔ?» ያገሰ።

ኤንቲ ባንታ ገደን ዛሬቲዲ፡ «ኦኒ፡ <ያሳፊ> ገኮ፡ ኢ ኦና፡ <ያቲን አይሰ አማኒቤኬቲ?» ያገና። 26 ኦኒ፡ <ኦሳፔ> ገኮ፡ ኦሳ ኡባይ ዮሃኒሳ ናቤ ኦሊ ያሊያ ገሾ ኦሳ ያዮሰ» ያገደሶና። 27 ሄሳ ገሾ፡ «ኦኒ ኤርኮ» ያገዲ ዛሪዶሶና።

ኦካ፡ «ሂዛ፡ ታኒካ ሃይሳ አይ ማታን ኦሊያኮ ሂንቴው ኦዲኬ» ያገሰ።

ናምዑ ናይታ ለሚሶ

28 «ዬሱሲ ካሊዲካ ሃይሳዳ ያገሰ፡ ናምዑ አዳ ናይቲ ዳዒያ ኢሲ ኡሪይ ዳዒሰ። ሄ ኡሪይ ባይራ ናዓኮ ቢዲ፡ ታ ናዓው፡ ሃቺ ዋይኒያ ገደ ባዳ ኦላ» ያገሰ። 29 ናዓይ ዛሪዲ፡ <ኦቶ ቢኬ> ያገሰ። ሺን ጉዬፔ ባ ዋዛናን ቆፒ ኤኪዲ ኦላናው ቢሰ። 30 አዋይ ባ ካሎ ናዓኮ ቢዲ፡ ባ ባይራ ናዓኮ ገዲይሳዳ ከቲሰ። ኦካ፡ <ኤር፡ ታ ኦዋው> ያገሰ። ሺን ቢቤንና። 31 ሃ ናምዑ ናይታፔ ባ አዋሰ ከቲቲዳይሲ አጩ?» ያገሰ።

ኤንቲካ፡ «ባይራ» ያገደሶና።
ዬሱሲ ኤንታኮ፡ «ታ ሂንቴው ቱማ ኦዲይሰ፤ ቃራፃ ቃንዲሴይሳቲኔ ላይማቴይሳቲ ሂንቴፊ ሲንላቲዲ ያሳ ካዋቲላ ጌላና። 32 ፃማቁያ ዮሃኒሲ ሱሬ ኦጊያ ታማርሲሺ ዩን ኢ ጌይሳ አማኒቤኬታ። ሺን ቃራፃ ቃንዲሴይሳቲኔ ላይማቴይሳቲ አማኒደሶና። ሂንቴ ሃሪ ኦቶሺን፡ ኤንታ ቤዒዲካ ሂንቴ ናጋራፔ ሲሚዲ አማኒቤኬታ» ያገሰ።

ዎይኒያ ጊደን ኦሊያ ጎሻንቸታ ሌሚሶ
(ማር 12:1-12፤ ሉቃ 20:9-19)

33 ቃሲካ ዩሱሲ ሃይሳዳ ያገሰ፤ «ሃራ ሌሚሶ ሲባይ፡ ዎይኒያ ቶኪዳ ኢሲ ኡራይ ዳዔሰ፡ ሄ ዎይኒያ ዩሹዋ ዲሪሰ፡ ዎይኒያ ጉምዒያ ኦላካ ቦኪሰ፡ ዎይኒያ ናጋናው ሻኮካ ሻኪሰ፡ ሄሳፌ ጉዬ፡ ጋዲያ ኮሌ ኢሚዲ ሃራ ቢታ ቢሰ፡ 34 ዎይኒያ ኣይፊያ ማዒያ ዎዴይ ጋኪን ባና ጋኪያ ባጋ ኤኪዲ ያና ማላ ባ ኣይሌታ ኤንታኮ ዩዲሰ፡ 35 ኮሌ ኣዋቲ ኢያ ኣይሌታ ኦይኪዲ ኢሱዋ ዎዲደሶና፡ ሃንኩዋ ዎዲደሶና ቃሲ ኣቲዳይሳ ሹቻን ጫዲደሶና፡ 36 ዎይኒያ ኣታኪልቲያ ጎዳይ ካሴይሳታፔ ዳሪያ ሃራ ኣይሌታ ከቲሰ፡ ኮሌ ኣዋቲ ኤንታ ቦላካ ሃንኮይሳታ ቦላ ኦሊዳይሳዳ ኦሊደሶና፡ 37 ወርሴላን ኢ፡ <ታ ናዓ ኤንቲ ቦንቻና!> ያገዲ ባ ናዓ ኤንታኮ ከቲሰ፡

38 «ሺን ኮሌ ኣዋቲ ናዓ ቤዒዲ ባንታ ጊደን <ጋዲያ ላታናይሲ ሃይሳ፡ ኢያ ዎዲዲ ጋዲያ ኮኒ ላቶሰ!> ያገደሶና፡ 39 ናዓ ኦይኪዲ ዎይኒያ ጊደፌ ጋፃ ኪሲዲ ዎዲደሶና፡

40 «ሃዛ፡ ዎይኒያ ኣታኪልቲያ ጎዳይ ያ ዎዴ ሄ ኮሌ ኣዋታ ዎታኔ?» ያገዲ ኦይቸሰ፡

41 ኤንቲ ዛሪዲ፡ «ኢ ሄ ኢታ ኣሳታ ኢታ ዎዲ ዎዲዲ፡ ዎይኒይ ኣይፊያ ዎዴ ኢያ ጋኪያ ባጋ ዎዴን ዎዴን ኢሚያ ሃራ ኮሌ ኣዋታሰ ኢማና» ያገደሶና፡

42 ዩሱሲ ዛሪዲ ኤንታኮ፡ ያሳ ቃላን፡
« ገምቤይሳቲ ቦሪዲ ኢዲዳ ሹቻይ፡
ጎዳ ፃጶዋ ሚንሉያ፡ ኡባፌ ኣዲያ ሹቻ ጊዲሰ፡
ሃይሲ ጎዳይ ኦሊዳባ፤
ኮ ኣይፊያሰ ማላሊሲያባ)
ጌቲቲዲ ፃፊቲዳይሳ ናባቢቤኬቲ?

43 «ሃሳ ገሾ፡ ታኒ ሂንቴው ኦዳይሰ፤ ያሳ ካዎቲላይ ሂንቴፌ ኤኬቲዲ ሎዎ ኣይፌ ኣይፊያ ኣሳታሰ ኢሚታና፡ 44 [ሃ ሹቻ ቦላ ኩንዲያ ኡባይ ማቁሬታና፡ ቃሲ ሄ ሹቻይ ኢያ ቦላ ዎዲያ ኡራይካ ጋጩታና] † ያገሰ፡

45 ካሂኔ ሃላቃቲኔ ፋሪሳዊቲ ዩሱሲ ኦዲዳ ሌሚሱዋን ባንታና ኦዲዳይሳ ኤሪደሶና፡ 46 ኤንቲ ዩሱሳ ኦይካናው ኮዩደሶና፡ ሺን ኣሳይ ዩሱሳ ናቤ ኦሊዲ ያሊያ ገሾ ኣሳሰ ያዩደሶና፡

21:33 ኢሳ 5:1-2 21:42 ማዘ 118:22 † 21:44 ኢሲ ኢሲ ቤኒ ማፃፋቲ ፓይዶ 44 ጉጆሶና (ሉቃ 20:18 ያለቲ)።

22

ያጋኖ ዌሳ ሌሚሶ
(ሉቃ 14:15-24)

1 ዬሱሲ አሳስ ዛሪዲ ሃይሳዳ ያጊዲ ሌሚሶ ኦዲስ። 2 «የሳ ካዎቱላይ ባ ናዓስ ያጋኖ ገገሲዳ ካወዋ ዳኔስ። 3 ሄ ካዎይ ያጋኖ ያና ሜላ ኦዲ ዋሊዳ አሳታ ዌጋናው ባ አይሌታ ከቲስ። ሺን አሳቲ ያናው ኮዩቦኮና። 4 ቃሲ ሃራ አይሌታ ዌጊዲ፣ ዌጌቲዳ አሳታኮ ቢዲ፣ <ታኒ ታ ሳንጋታኔ ዋዲዳ ጋታርሚንሶታ ሹካስ፤ ኡባባይ ገገሰ። ታ ያጋኑዋ ሃ ዩቲ ያጊቲ» ያጊዲ ከቲስ። 5 ሺን ዌጌቲዳይሳቲ ዌሳ ኢዌዲ፣ ባንታ ኦሶስ ኦሶስ ቢደሶና። ኢሶይ ባ ጎሻስ፣ ሃንኮይ ባ ዛልዒያስ ቢስ። 6 ሃራቲ ቃሲ ካወዋ አይሌታ ኦይኪዲ፣ ካወሺ ዋዲዲ ዋዲደሶና።

7 «ካዎይ ዳር ዩሎቲዲ፣ ባ ዎታዳሬታ ዬዲዲ ሸዎግ ዎዲዳይሳታ ዎዲሲስ፣ ኤንታ ካታማካ ፀጊስ። 8 ሄሳፌ ጉዬ፣ ባ አይሌታኮ፣ <ያጋኖይ ገገሰ፣ ሺን ዌጌቲዳይሳቲ ያጋኑዋስ ቤሲያ አሲ ጊደኮና። 9 ሄሳ ጊሸ፣ ዎጋ ኦጌታ ቢዲ፣ ዳሚዳ አሲ ኡባ ያጋኑዋ ያና ሜላ ዌጌቲ» ያጊስ። 10 አይሌቲ ኦጊያ ቦላ ቢዲ ባንታ ዳሚዳ አሲ ኡባ ሎዎታኔ ኢታታ ኤሂዲ ያጋኖ ሻቃራ ጌልሲዲ ኩንሳደሶና።

11 «ሺን ካዎይ ካላ ማናው ኡቲዳ አሳ ቤዓናው ጌሊዳ ዎዴ ያጋኖ ማዎ ማዒቦና ኢሲ አሲ ዳሚስ። 12 ኢያኮ፣ <ላ፣ ኔ ያጋኖ ማዎ ማዎና ዋናዳ ሃይሳ ጌላዲ?» ያጊስ። ሺን ኡራይ ሲዒ ገሰ።

13 «ካዎይ ባ አይሌታኮ፣ <ሃ ኡራ ኩሺያኔ ቶሁዋ ቃቺዲ፣ ካሬ ቋማ ኬሲ ዩጌቲ። ያን ኢያው ዩሆኔ አቻ ጋርጩላ ጊዳና» ያጊስ።

14 «ሄሳዳካ፣ ያሳ ካዎቱላስ ዌጌቲዳይሳቲ ዳር ሺን ደሬቲዳይሳቲ ጉላ» ያጊስ።

ጊራባ
(ማር 12:13-17፤ ሉቃ 20:20-26)

15 ሄሳፌ ጉዬ፣ ፋሪሳዌቲ ቢዲ፣ ዬሱሳ ዋቲ ኦዳን አይካኔኮ ዘሬቲደሶና። 16 ባንታ ታማሬታኔ ሄርዲሳ ባጋታፔ ኢሶታ ኢሶታ ከቲደሶና። ኤንቲካ፣ «አስታማሪያው፣ ኔ ቱማ ኦዳይሳ ኑ ኤርስ። ኔኒ አሳፔ አሴ ሻካካ፣ አሳ ዎይጋንዴስ ጋዳ አይኮካ ኦላካ፣ ያሳ ኦጊያ ቱማቱላን ታማርሳሳ። 17 አኔ ኑስ ኦዳ፣ ኔኒ ርሜ ካወዋስ ጊራ ጊራናው ቤሲ ቤሴኔ?» ያጊደሶና።

18 ሺን ዩሱሲ ከንታ ኢታ ቆፋ ኤሪዲ፣ «ሃ ጨቦቶ፣ ታና አይሰ ፓጩት? 19 ገራ ገሪያ ሚሺያ ታና ቤሲቴ» ያገለገለ። ከንቲካ ኢያው ሳንቲሜ ኤሂደሶና። 20 ኢ፣ «ሃ ሱንሳይኔ ማላይ ኦዴባዬ?» ያገለገለ።

21 ከንቲ፣ «ሮሜ ካወቀይሳ» ያገለገለ።

ያቲን ዩሱሲ ከንታኮ፣ «ሂዛ፣ ካወቀሰ ቤሴይሳ ካወቀሰ፣ ያሳሰ ቤሴይሳ ያሳሰ ኢሚቴ» ያገለገለ።

22 ከንቲ ሄሳ ሲዲዳ ዋዴ ማላሌቲዲ ኢያ ማታፔ አገዲ ቢደሶና።

ሃይቆፔ ዴንደባ

(ማር 12:18-27፤ ሉቃ 20:27-40)

23 ሄ ጋላሰ ሃይቆፔ ዴንደይ ባዋ ያገሪያ ሳዲቃዌቲ ዩሱሳኮ ዩዲ፣ ያገሪዲ ኢያ ኦይቺደሶና። 24 «አሰታማሪያው፣ ሙሴይ፣ ኢሲ አሲ ናዓ ዩሎና ሃይቁኮ፣ ሄ ሃይቁዳይሳ አሻይ ኢያ ማቺው ኤኪዲ፣ ባ አሻሰ ናዓ ዩሎ» ያገሪዲ ከቲሰ። 25 ኦ ኤሪያ ላፑን አሻቲ ዴዎሶና። ባይራይ ማቺ ኤኪዲ ናዓ ዩሎና ሃይቁሰ። ኢያ ማቺው ኢያ ካሎ አሻይ ኤኪሰ። 26 ሄሳዳካ፣ ሄ ማጫሲው ኤኪዲ ናምዓንሳይካ፣ ሄቫንሳይካ፣ ቢዲ ላፑናቲ ዉራና ጋካናው ኡባይ ሃይቁደሶና። 27 ኡባፌ ጉዬ ሄ ማጫሲያ ሃይቃሱ። 28 ያቲን፣ ላፑናቲ ኡባይ ኢዮ ኤኪዲ ገሾ ሃይቆፔ ዴንዲያ ጋላሰ፣ ሄ ማጫሲያ ላፑናታፔ አዉሳሰ ማቺ ገዳኔ?» ያገሪደሶና።

29 ዩሱሲ ዛሪዲ፣ «ሂንቲ ያሳ ቃላይ ታማርሲያባ ዋይኮ ኢያ ዋልቃ ኤሮና ገሾ ባሌታ። 30 አሳይ ሃይቆፔ ዴንዲያ ዋዴ ሳሎን ዴዲያ ከታንቸታ ሜላ ገዳናፔ አቲን ኤኮኮና ጌሎኮና። 31 ቃሲ ሃይቁዳ አሳቲ ሃይቆፔ ዴንዳናባ ያሳይ ሂንቲው ኦዲዳይሳ ናባቢቤኬት? 32 ያሳይ፣ ስታኒ አብራሃሜ ያሳ፣ ዩሳቃ ያሳ፣ ያይቆባ ያሳ» ያገለገለ። ሄሳ ገሾ፣ ያሳይ ፓዓ ዴዴይሳታ ያሳፌ አቲን ሃይቁዳይሳታ ያሳ ገዳና» * ያገለገለ።

33 ዳሮ አሳይ ሄሳ ሲዲዲ፣ ኢያ ቲሚርቲያን ማላሌቲደሶና።

ኡባፌ ባይራቲያ ከታ

(ማር 12:28-34፤ ሉቃ 10:25-28)

22:23 ሃ.ኦ 23:8 22:24 ዛሬ 25:5 * 22:32 ያሳይ ፓዓ ዴዴይሳታ ያሳፌ አቲን ሃይቁዳይሳታ ያሳ ገዳና፣ ዩሱሲ ሃ ቤሳን ኦዴይ ያሳይ ሃ ሃይቁዳ ሄቫታሰ ያሴ ገዲኮ ከንቲ ዴዎን ዴዎሶና ያጌይሳ። 22:32 ከሳ 3:6

34 ዩሱሲ ሳዲቃዊታስ ጋናባ ቋይሲዳይሳ ፋሪሳዊቲ ሲዲዳ ዎዴ ኢሲፌ ሸቁዶሶና። 35 ኤንታ ጊዶፌ ኢሲ ሂጌ አስታማሪይ ዩሱሳ ፓጩ ኦይሾ ኦይቺሰ። 36 «አስታማሪያው፣ ሂጌ ኡባፌ አዲይሲ አውሴ?» ያጊዲ ኦይቺሰ።

37 ዩሱሲ ዛሪዲ፣ « ሪኔ ጎዳ፣ ኔ ያሳ፣ ኔ ኩሜላ ዎዛናፔ፣ ኔ ኩሜላ ሸምፑዎፌ፣ ኔ ኩሜላ ቆፋፔ ዶሳ። 38 ኡባፌ አዲይሲኔ ባይራ ኪታይ ሃይሳ። 39 ናምዓንሎ ኡባፌ አዲያ ኪታይ፣ አሴ ኡባ ኔ ሁዲያ ኔ ዶሴይሳዳ ዶሳ ያጌይሳ። 40 ሙሴ ሂጌይኔ ናቤታ ቲሚርቴይ ኡባይ ሃ ኪታታ ቦላ ካቶሶና» ያጊሰ።

ኪሪሰቶሳባ ኦይቺዳ ኦይሻ
(ማር 12:35-37፤ ሉቃ 20:41-44)

41 ፋሪሳዊቲ ኢሲ ቦላ ሸቁዲ ዴዲሺን፣ ዩሱሲ ኤንታና፣
42 «ኪሪሰቶሳባ ሂንቴ ዎይጌቲ? ኢ ኦዴ ናዔ?» ያጊዲ ኦይቺሰ።

ኤንቲ፣ «ኢ ካወዎ ዳዊቲ ናዔ» ያጊዲ ዛሪዶሶና።

43 ዩሱሲ ኤንታኮ፣ «ያቲን፣ ዳዊቲይ ጌሻ አያናን ጊዲዲ ዎቲዲ ኪሪሰቶሳ፣ ሳዳን ጊዲ ያጊ? ዳዊቲይ ጊሹ፣

44 ሳዳ ያሳይ፣ ታ ጎዳኮ፣ †
ኔ ዎርኬታ ኔ ቶሆይ ዩዲያሶ ኦላና ጋካናው፣

ሃይሳን ታፔ ኡሻቻ ባጋን † ኡታን ጊሰ።

45 ሂዛ፣ ዳዊቲይ ኪሪሰቶሳ ጎዳ ጊዲ ያጊኮ፣ ዎኒዲ ኪሪሰቶሲ ዳዊቲ ናዔ ጊዲ?»

ያጊሰ።

46 ዩሱሳሰ ኢሲ ቃላ ዛራናው ዳንዳዲዳ አሲ ኦኒካ ባዎ። ቃሲ ሄ ጋላላፔ ዶሚዲ ሃራ ኦይሻ ኦይቻናው ኦኒካ ዳንዳዲቤና።

23

ሂጌ አስታማሪታኔ ፋሪሳዊታ ኢታቴላ
(ማር 12:38-39፤ ሉቃ 11:43-46፤ 20:45-46)

1 ሄሳፌ ጉዬ፣ ዩሱሲ ሸቁዳ አሳሰኔ ባ ታማሪታስ ሃይሳዳ ያጊሰ። 2 «ሂጌ አስታማሪቲኔ ፋሪሳዊቲ ሙሴ ሂጊያ ቢላናው ማታራ ዴዎሶና። 3 ሄሳ ጊሾ፣ ኤንቲ ሂንቴና ኪቲያ ኡባ ኦላቴኔ

22:37 ዛሬ 6:5 22:39 ሉዊ 19:18 22:40 ሉቃ 10:25-28 † 22:44 ታ ጎዳኮ፣ ሃ ቤሳን ዳዊቲይ ታ ጎዳ ጊዲ ያጊይ ኪሪሰቶሳ። 22:44 ማዝ 110:1 † 22:44 ኡሻቻ ባጋን፣ ማታኔ ቦንቾ ቤሲ። 22:44 ማዝ 110:1

ናገሩ። ሺን ኤንቲ ኦሴይሳዳ አሰፊ። አይስ ገኩ፣ ኤንቲ ኦሴይሳዳ አሰኮና። 4 ኤንቲ ቶካናው ዳንዳዔቶና ቶሆ ቃቸዲ አሳ ቶሶሶና። ሺን ባንታው ሃሪ አቶሺን፣ ሄ ቶሆ አሳይ ቶኪያ ዋዴ ቢራጴ ዴራን ቦቻናው ኮኮኮና።

5 «ሺን ኤንቲ ባንታ ኦሶ ኡባ አሲ ቤባና ማላ አሶሶና። ባንታ ሶምዖኒኔ ቄሴን ቃቸያ ማፃፋ ዲቄሴይ ዴዲያ ኪታፊ ዳልጊሶሶና፣ ባንታ ማዑዋ ማጫራካ አዲሶሶና። * 6 ሞኬቲያ ቤሳን ቦንቸ ቤሴኔ አይሁዴ ዋሳ ኬላታን ዳር ሎዲያ ኦይዴ ደሶሶና። 7 አሳይ ጊያን ኤንታና ቦንቸን ሳርላናይሳኔ «አስታማሪያው» ጊዲ ዪጋናይሳ ኮኮሶና።

8 «ሺን ሂንቲ አስታማሪይ ኢሱዋ ፃላላ ጊዲዳ ጊሾኔ ሂንቲ ኡባይ አሻታ ጊዲዳ ጊሾ «አስታማሪያው» ጌቲቲዲ ያጌቶፊቴ። 9 ሂንቲው ሳሎን ኢሲ አዋ ፃላላ ዴዲያ ጊሾ ሃ ሳባን ኦናካ «አዋው» ጊዲ ያጎፒቴ። 10 ሂንቲው ኢሲ ጎዳይ ኪሪስቶሳ ፃላላ ዴዲያ ጊሾ ሳዳው» ጌቲቲ ያጌቶፊቴ። 11 ሂንቲ ጊደን ባይራቲይ ሂንቲ አይሌ ጊደ። 12 ባና ጊታያ ኦኒካ ካወያና፣ ባና ካወሺያ ኦኒካ ጊታታና።

ሂን አስታማሪቲኔ ፋሪሳዊቲ ቦሬቲደሶና
(ማር 12:40፣ ሉቃ 11:39-42፣ 44፣ 52፣ 20:47)

13 «ሂንቲና፣ ጨቦቶ፣ ሂን አስታማሪቶኔ ፋሪሳዊቶ፣ አሳ ሲንላን ሳሎ ካዋቲላ ጎርዴይሳቶ ሂንቲና አይ። ሂንቲ፣ ሂንቲ ሁዔን ጌሌኬታ ቃሲ ሃራታካ ጌልሴኬታ።

14 [«ሂንቲና ጨቦቶ፣ ሂን አስታማሪቶኔ፣ ፋሪሳዊቶ፣ አምዔታ ኬላ ሂንቲ ቦንቄሹ፣ አሲ ቤያ ጊዲ ዋሳ አዲሴታ። ሄሳ ጊሾ፣ ሂንቲና አይ። ኡባፊ አጲያ ፒርዳይ ሂንቲና ናጌሰ።] †

15 «ሂንቲና፣ ጨቦቶ፣ ሂን አስታማሪቶኔ ፋሪሳዊቶ፣ ሂንቲ ኢሲ ኡራ አማንላናው አባራኔ ሳባራ ዩዬታ። ሺን ሂንቲ ኢያ አማንላዳ ዋዴ ሄ ኡራ ሂንቲፊ አሊዲ ጋናሜስ ጊጌቲዳይሳ ኦሊያ ጊሾ ሂንቲና አይ።

16 «ኦኒካ ያሳ ኬላን ጫቂኮ አይኮይካ ባዋ። ሺን ያሳ ኬላን ዴዲያ ዋርቃን ጫቂኮ፣ ሄ ጫቆይ ኢያ ጎማና ጊያ ቆቄቶ፣ ሂንቲው

* 23:5 ሶምዖኒኔ ቄሴን ቃቸያ ማፃፋ... ማዑዋ ማጫራ አዲሶሶና፣ ሄሳ ኤንቲ ኦሴይ ያሳስ ታ አሜታስ ጊያ ማላ ቤሳናሳ (ዛሬ 15:37-41)። 23:5 ማቶ 6:1፣ ዛሬ 6:8፣ ታይ 15:38 23:11 ማቶ 20:26 23:12 ሉቃ 14:11፣ 18:14 † 23:14 ኢሲ ኢሲ ቤኒ ማፃፋቲ ፓይደ 14 ጌጆሶና።

ቆቁዲ ሃራታ ካሌሌይሳቶ፣ ሂንቴና አዬ። 17 ሂንቴኖ፣ ኤያቶ፣ ቆቁቶ፣ ዋርቃይ አዲዬ? ዋርቁያ ያሳሰ ዲማያ ያሳ ከላይ አዲ? 18 ቃሲ ሐኒካ ያርሾ ያርሺያ ቤሳን ጫቁኮ፣ አይኮይካ ባዋ። ሺን ኦኒካ ኢያ ቦላ ዳዒያ ያርሹዋን ጫቁኮ፣ ሄ ጫቆይ ኢያ ሳማና) ያገዲ ታማርሴታ። 19 ሂንቴኖ፣ ቆቁቶ፣ ያርሾይ አዲዬ? ያርሹዋ ያሳሰ ዲማያ ቤሳይ አዲ? 20 ሄሳ ገሾ፣ ያርሾ ቤሳን ጫቁያ ኡራይ፣ ሄ ያርሾ ቤሳኒኔ ኢያ ቦላ ዳዒያ ኡባባን ጫቁሰ። 21 ያሳ ከላን ጫቁያ ኡራይ፣ ሄ ያሳ ከላኒኔ ኢያን ዳዒያ ያሳን ጫቁሰ። 22 ሳሎን ጫቁያ ኡራይ ያሳ አራታኒኔ ሄ አራታ ቦላ ኡቲያ ያሳን ጫቁሰ።

23 «ሂንቴኖ፣ ጩቦቶ፣ ሂን አሰታማሬቶኔ ፋሪሳዊቶ፣ ሂንቴና አዬ። ሂንቴ ካሬላ ሳዎፔ፣ ናቲሮፔኔ ኦካሽፔ አሰራታ ኬሴታ። ሺን ሂጊያን ዳዒያ አዲ ኮሼይሳታ አገዴታ። ሄሲካ ሱሬ ፐርዳ፣ ቃዲቴሌኔ ኡባባን አማኔቴሌ። ሃራታካ አጎናሺን ሃይሳታ ሂንቴ ኦላናው ቤሴሰ። 24 ሂንቴው ቆቁዲ ሃራ አሲ ካሌሌይሳቶ፣ ሂንቴ ኡሻፊ ኡዲንጻ ኬሲዲ ገማሌ ማቲታ።

25 «ሂንቴኖ፣ ጩቦቶ፣ ሂን አሰታማሬቶኔ ፋሪሳዊቶ፣ ሂንቴና አዬ። ሂንቴ ሻቲያሲኔ ኬሪያሰ ቦላ ባጋ ጌሺታ። ሺን ኤንታው ጋርሳን ቦንቄይኔ ኡዜቴሌ ኩሚ ኡቲሰ። 26 ኔኖ ቆቁ ፋሪሳዊያው፣ ሻቲያሲኔ ኬሪያሰ ጋርሳ ካሴታዳ ጌሻ። ሃሳፊ ጉዬ፣ ቦላ ባጋይካ ጌሺ ገዳና።

27 «ሂንቴኖ፣ ጩቦቶ፣ ሂን አሰታማሬቶኔ ፋሪሳዊቶ፣ ሂንቴና አዬ። ካሬ ባጋራ ቃላማ ቲዬቲዲ ሎዒዲ፣ ገደን ማቄሌኔ ዋቂዳባይ ኩሚዳ ዲፎታ ዳኔታ። 28 ሃሳዳካ፣ ቦላ ባጋራ አሳሰ ሎፆ ዳኔታ። ሺን ሂንቴ ጋርሳን ጩቦቴሌኔ ኢታቴሌ ኩሚሰ።

29 «ሂንቴኖ፣ ጩቦቶ፣ ሂን አሰታማሬቶኔ ፋሪሳዊቶ፣ ሂንቴና አዬ። ሂንቴ ናቤታሰ ዲፎ ኬጻታ፣ ቃሲ ጻሎታ ዲፋዋካ ሎይሌታ። 30 ቃሲ ሂንቴ፣ ሐኒ ቤኒ ኑ አዋታ ዋዴ ዳዒዳባ ገዲያኮ፣ ኤንታራ ኢሲፊ ናቤታ ሱላ ጉሶኮሺን) ያጌታ። 31 ሄሳ ገሾ፣ ሂንቴ ናቤታ ዋዲዳ አሳ ናይታ ገዴይሳ ሂንቴ ሂንቴ ሁዔን ማርካቴታ። 32 ሂዛ፣ ሂንቴ አዋቲ ደሚዳይሳ ሂንቴ ፖሊቴ።

33 «ሃ ሾሻቶ፣ ሾሻ ናይቶ፣ ሂንቴ ጋናማ ፐርዳፊ ዋኒዲ አታኔ? 34 ሄሳ ገሾ፣ ታ ኦዴይሳ ሲዒቴ፤ ታኒ ናቤታ፣ ጩንጫ አሳታኔ አሰታማሬታ ሂንቴኮ ኪታና። ኤንታፊ ኢሶታ ኢሶታ ሂንቴ ዋዲና ማሰቃሊያ ቦላ ካቃና። ባጋታ አይሁዴ ዋሳ ኬላታን ሊሶን

23:22 አሳ 66:1፤ ማቶ 5:34 23:23 ለዌ 27:30 23:27 ሃ.ኦ 23:3
 23:33 ማቶ 3:7፤ 12:34፤ ሉቃ 3:7

ጋራፋናኔ ካታማፔ ካታማ ጎዳና። 35 ሄሳ ጊሾ፣ ዲሎዎ አቤላ ዎዲዳ ዎዲያፔ ደሚዲ፣ ያሳ ከላሲኔ ያርሾ ቤሳፌ ጊደን ሂንቴ ዎዲዳ ባራኪያ ናዓ ዛካሪያሳ ዎዴ ጋካናው ሃይቂዳ ዲሎ አሳ ኡባ ጊሾ ሂንቴ ሴሬታና። 36 ታኒ ሂንቴው ቱማ ኦዲይስ፤ ሂንቴኔ ሂንቴ አዎቲ ኦሊዳ ባላስ ሃ ፒርዳ ኡባይ ሃ ዩሌቴሳ ቦላ ጋካና።

ዩሱሲ ዩሩሳላሜስ ዩኪስ
(ሉቃ 13:34-35)

37 «ዩሩሳላሜ፣ ዩሩሳላሜ፣ ናቤታ ዎዲያሬ! ያሳይ ኔኮ ከቲዳይሳታ ሹቻን ጫዲያሬ! ኩቶይ ባ ናይታ ባ ቁፊን ሃጾይሳዳ ታኒ ኔ አሳ ታ ቁሲያን ጌቻናው አፑን ቶሆ ኮያዲና! ሸን ታና ዲጋዳሳ። 38 ሂዛ፣ ሂንቴ ያሳ ከላይ ካይሲ ጊዳና። 39 ታኒ ሂንቴው ኦዲይስ፤ ሳዳ ሱንላን ዩይሲ አንጃቲዳይሳ) ሂንቴ ጋና ጋካናው ናምዓንሎ ታና ቤዔኬታ» ያጊስ።

24

ዩሱሲ ያሳ ከላይ ላሌታናይሳ ካሴቲዲ ኦዲስ
(ማር 13:1-2፤ ሉቃ 21:5-6)

1 ዩሱሲ ያሳ ከላፌ ከዩዲ ቢሸን፣ ኢያ ታማሬቲ ኢያኮ ዩዲ፣ ማላሌቲዲ ያሳ ከላ ገምቢያ ቤሲደሶና። 2 ዩሱሲ ኤንታኮ ዛሪዲ፣ «ኤ! ሃይሳ ኡባ ቤዔቲ? ታኒ ሂንቴው ቱማ ኦዲይስ፤ ሹቹ ሹቻ ቦላ ገምቤቲዳ ሜላ ላሌቶና አቴና» ያጊስ።

ሲንላፌ ሃናናባታ
(ማር 13:3-13፤ ሉቃ 21:7-19)

3 ዩሱሲ ሻማሆ ዳሪያ ቦላ ኡቲዳሸን፣ ኢያ ታማሬቲ ባንታርካ ኢያኮ ዩዲ፣ «ሂሲ አዉዴ ሃናኔኮ ኑስ ኦዲ። ቃሲ ኔ ዩሳሲኔ ዎዲያ ወርሴላስ ማላታይ አይቤ?» ያጊዲ አይቹደሶና። 4 ዩሱሲ ዛሪዲ፣ «ሂንቴና ኦኒካ ባሌላና ሜላ ናጌቲቲ! 5 አይስ ጊኮ፣ ዳሮ አሳቲ ታ ሱንላን፣ <ታኒ ኪሪሰቶሳ፣ ያሳይ አሳ አሻናው ከቲዳይሳ) ያጊሼ ዩዲ ዳሮ አሳ ባሌላና። 6 ማታን ዴዲያ ኦላ ጊርሳ፣ ሃሆን ዴዲያ ኦላ ዎሬ ሲዓናው ዴዴታ። ሄሳ ሜላባይ ሃናናው ቤሲያ ጊሾ ሂርጎሬቲ። ሸን ወርሴላይ ቡርና። 7 ዳሬይ ዳሪያራ፣ ኢሲ ካዎቴላይ ሃራ ካዎቴላራ ኦሌታና። ኮሻይኔ

ቢታ ቃይይ ኡባ ቤሳን ሃናና። 8 ሄሲ ኡባይ ዬሎ ኢቁሳሰ ዘኬ ማላ።

9 «ሄ ዎዴ አሳይ ሂንቴና ዎዬሰ አሊ ኢማና፣ ቃቻናኔ ዎቆና። ታ ሱንላ ጊሾ አሳ ኡባይ ሂንቴና ኢፃና። 10 ሄ ዎዴ ዳርቲ አማኖ አጋና። ባንታ ጊዶን ኢሶይ ኢሱዎ አሊዲ ኢማና፣ ኢሶይ ኢሱዎ ኢፃና። 11 ቃሲ ዳሮ ዎርዶ ናቤቲ ዴንዲዲ ዳርታ ባሌላና። 12 ንላቴሊ ዳሪያ ጊሾ ዳሮ አሳ ሲቆይ ኢርፃና። 13 ሺን ዉርሴሊ ጋካናው ገንጨያ ኡራይ አታና። 14 አሳ ኡባሰ ማርካ ጊዳና ማላ ያሳ ካዎቴላ ዎንጌላይ ቢታ ኡባን ኦዴታና። ሄሳፌ ጉዬ፣ ዉርሴላይ ያና።

ቱና ባሻ
(ማር 13:14-23፤ ሉቃ 21:20-24)

15 «ሄሳ ጊሾ፣ ናቢያ ዳኔሊ ኦዲዳ ባሻ ቱናቴላይ ጌሻ ቤሳን ኤቁዳይሳ ሂንቴ ቤዓና። (አኬኪሶ፡ ሄሲ ዎይ ጉሴኮ ናባቤይሲ አኬኮ!) 16 ሄ ዎዴ ዪሁዳ ቢታን ዴዔይሳቲ ዴሪያኮ ባቃቶ። 17 ኬላ ሁዔን ዴዔያ ኡራይ ባ ሶን ዴዔያባ ኤካናው ሶ ጌሎና ባቃቶ። 18 ጋዴን ዴዔይሲ ባ ማዑዎ ኤካናው ጉዬ ሲሞፎ። 19 ሄ ዎዴ ቃንላ ማጨሳታሲኔ ቆንሊያ ማጨሳታሰ ዳሮ ኡንዓ ጊዳና። 20 ባልሳን ዎይኮ ሳምባታን ሂንቴ ባቃቶይ ጊዶና ማላ ያሳ ዎሲቴ። 21 አይሰ ጊኮ፣ ሳዒ ሜዴቶሳፔ ሃቺ ጋካናው ሃናናባይ፣ ቃሲ ሲንላፊካ ኡባራካ ሃናና ዎዬይ ሄ ዎዴ ሃናና። 22 ያሳይ ሄ ጋላሳታ ታይቡዎ ጉሉናኮ አሴ ጊዲዳ ኦኒካ አቴና። ሺን ኢ ባ ዳሪዳ አሳታ ጊሾ ሄ ጋላሳታ ታይቡዎ ጉላና።

23 «ሄ ዎዴ ኦኒካ ሂንቴና፣ ሂኮ፣ ኪሪሰቶሲ ሃይሳን) ዎይኮ ሂኒን ዴዔሰ) ያጊኮ አማኖፒቴ። 24 አይሰ ጊኮ፣ ዎርዶ ኪሪሰቶሳቲኔ ዎርዶ ናቤቲ ዴንዳና። ኢንታው ዳንዳዔቲኮ፣ ሃሪ አቶሺን ያሳይ ዳሪዳይሳታካ ባሌላናው ጊታ ማላታታኔ ማላሊሲያባታ ኦላና። 25 አኬኪቴ፣ ታኒ ሂንቴው ሃይሳ ካሴታዳ ኦዳሰ።

26 «ሄሳ ጊሾ፣ አሳይ ሂንቴኮ፣ ሂኮ፣ ኪሪሰቶሲ ባዘን ዴዔሰ) ጊኮ፣ ያ ቦፒቴ። ዎይኮ ሂንቴኮ፣ ሂኮ፣ ቆልዓን ዴዔሰ) ጊኮ፣ ኢንታባ አማኖፒቴ። 27 አይሰ ጊኮ፣ ዎልዓንላ ሳሎን ዎልዓሚዲ፣ ዶሎሃፔ ዉሎሃ ጋካናው ቤንቴይሳዳ፣ አሳ ናዓ ዩሳይ ሄሳዳ ሃናና።

28 «ባዉቲ ዴዔይሶን አንኮቲ ሺቃና።

24:9 ማቶ 10:22 24:13 ማቶ 10:22 24:15 ዛሬ 9:27፤ 11:31፤ 12:11 24:17 ሉቃ 17:31 24:21 ሜዴ 12:1፤ ዮ.ቆ 7:14 24:26 ሉቃ 17:23-24 24:28 ሉቃ 17:37

ኪሪስቶስ ናምዓንሉ ያና
(ማር 13:24-27፤ ሉቃ 21:25-28)

29 «ሄ ዎዴ ሄ ዋዬ ጋላሳታፔ ጉዬ፥
ሶሁዋራ ኣዋይ ቋማና፥
ኣጌናይ ባ ፖዑዋ ዲጋና።

ፆሊንቶቲ ሳሎፔ ዎቆና፥

ቃሲ ሳሎን ዳዒያ ዎልቃቲ ቡቄታና።

30 ሄ ዎዴ ኣሳ ናዓ ዩሳ ማላይ ሳሎዋ ቦላ ቤንታና። ሳዓን ዳዒያ
ኣሲ ኡባይ ዩካና። ቃሲ ኣሳ ናዓይ፥ ዎልቃራኔ ጌታ ቦንቹዋራ
ሳሎዋ ሻራ ጌዶራ ዩሺን ኤንቲ ቤዓና። 31 ኢ ባ ኪታንቸታ ጌታ
ፑኒያ ሞይዜራ ኪታና። ኤንቲ ሳዓ ኣይዱ ባጋ ቢዲ፥ ሃ ጋፃፔ ያ
ጋፃ ጋካናው ዳዒያ ኢያው ዶሬቲዳይሳታ ሺሻና።

ጎዳይ ያና ጋላሳ ማላታ
(ማር 13:28-31፤ ሉቃ 21:29-33)

32 «ባላሴ ሚላፌ ታማሪቲ። ኢ ኣጪዲ ሃይዒያ ዎዴ ቶርቹይ
ማታቲዳይሳ ሂንቲ ኤሬታ። 33 ሄሳዳካ፥ ሂንቲ ሃ ኡባባ ቤዒያ
ዎዴ ዩሱስ ማቲዲ ፔንጌን ዳዒይሳ ኤሬቲ። 34 ታኒ ሂንቲው
ቲማ ኦዳይስ፤ ሃ ኡባባይ ፖሌታና ጋካናው፥ ሃ ዩሌቲሳይ ኣዴና።
35 ሳሎይኔ ሳዓይ ኣቆና፥ ሺን ታ ቃላይ ኡባካ ኣዴና።

ጎዳይ ያና ጋላሳ ኦኒካ ኤሬና
(ማር 13:32-37፤ ሉቃ 17:26-30፥ 34-36)

36 «ሄ ጋላሳኔ ሄ ሳቲያ ሳሎን ዳዒያ ታ ኣዋፔ ኣቲን ሃሪ ሳሎ
ኪታንቸታ ጌዲን ዎይኮ ናዓ ጌዲን ኦኒካ ኤሬና። 37 ኣሳ ናዓ
ዩሳይ፥ ኖሄ ዎዴ ሃኒዳይሳ ሚላ ጌዳና። 38 ሄ ዎዴ ቆዮ ሃላይ
ያናፔ ሰንሐ ኖሄይ ማርካቢያን ጌሊዳ ጋላሳ ጋካናው፥ ኣሳይ
ሚሼኔ ኡዩሼ፥ ኤኪሼኔ ጌሊሼ ጋምዒስ። 39 ባሻ ሃላይ ዩዲ፥
ኤንታ ኡባ ቆይሳና ጋካናው ኣኬኪቦኮና። ኣሳ ናዓ ዩሳይካ ሄሳዳ
ሃናና።

40 «ሄ ዎዴ ናምዑ ኣሳቲ ጋዴን ኦላና። ኤንታፌ ኢሶይ ኤኬታና፥
ሃንኪይ ኣታና። 41 ናምዑ ማጫሳቲ ኢሲፌ ጋጫና። ኤንታፌ
ኢሲኒያ ኤኬታና ሃንኪያ ኣታና።

42 «ሂዛ፥ ሂንቲ ጎዳይ ኣይ ጋላስ ያኔኮ ሂንቲ ኤርና ጌሾ
ሚኒዲ ናጌቲ። 43 ሺን ካይሶይ ቃማፌ ኣይ ሳቲን ያኔኮ ኬላዋይ

ኤሪያኮ፣ ባ ከላይ ቦኬቶና ሜላ ባርኪዲ ናገናሺን። 44 ሄሳዳካ፣ አሳ ናዓይ ሂንቲ ቆፖና ሳቴን ያና ጊሾ ሂንቲካ ገጊዲ ዴዒቲ።

ኢታኔ ሎዖ አይሌታ ሌሚሶ (ሉቃ 12:41-48)

45 «ያቲን፣ ባ ሶ አሳሰ ካላ ኮሺያ ዎዲያን ኢማና ሜላ ኢያ ጎዳይ ዶሪዳ አማንጤይሲኔ ዎዛናማ አይሌይ ኦኔ? 46 ኢ ባ ጎዳይ ከቲዳይሳ ኦሊሺን ኢያ ጎዳይ ዩዲ ዴሚያ አይሌይ አንጃቲዳይሳ። 47 ታኒ ሂንቲው ቱማ ኦዳይሰ፤ ጎዳይ ሄ አይሌያ ባባ ኡባ ቦላ ሹማና። 48 ሺን ሄ አይሌይ ኢታ ገዲኮ፣ <ታ ጎዳይ ጋምዒዲ ያና> ያገዲ ባ ዎዛናን ቆፒዲ፣ 49 ባ ላጌ ኦሳንቸታ ዎጶ ዶሚኮ፣ ማላቲይሳታራ ሚኮኔ ኡዩኮ፣ 50 ሄ አይሌያ ጎዳይ ኢ ቆፖና ጋላሲኔ ኢ ኤርና ሳቴን፣ 51 ዩዲ ኢያ ቃንፃሬላና። ኢያ ቃዳ ጩቦታራ ኦላና። ሄ ቤሳን ኢያው ዩሆኔ አቼ ጋርጩሊ ገዳና።

25

ታሙ ጌላዖታ ሌሚሶ

1 «ሄ ዎዴ ሳሎ ካዎቲላይ ባንታ ኩራዚያ ኦይኪዲ፣ ማቾ ኤሃናው ቢዳ አዲያ ሞካናው ከዩዳ ታሙ ጌላዖታ ዳኔሰ። 2 ኤንታፊ ኢቻሻቲ ኤያ፣ ቃሲ ኢቻሻቲ ጨንጫ። 3 ኤያቲ ኩራዜ ኦይኪዳሶና፣ ሺን ሃራ ላምባ ኦይኪቦኮና። 4 ሺን ጨንጫቲ ባንታ ኩራዚያኔ ሃራ ጉዣ ላምባ ኦይኪዳሶና። 5 ማቸው ኤኬይሲ ጋምዒን፣ ሄ ጌላዖቲ ባንታና ጳሰኮይ ኦይኪን ጳሰኪዳሶና። 6 «ገዲ ቢላሄ ገዲያ ዎዴ <ሂኮ፣ ማቸው ኤሄይሲ ጋኪሰ፣ ኢያ ሞካናው ከዩቲ> ያገያ ገታ ጫቦይ ሲዔቲሰ። 7 «ሄ ዎዴ ሄ ጌላዖቲ ኡባይ ባርኪዲ፣ ባንታ ኩራዚያ ገገሲዳሶና። 8 ኤያቲ ጨንጫታኮ፣ ሱ ኩራዜይ ቶዓና ሃኒያ ጊሾ ሂንቲ ላምባፊ ኦሰ ኢሜርኬቲ> ያገዳሶና። 9 «ሺን ጨንጫቲ ኤንታኮ ዛሪዲ፣ ሳካይ፣ ኦሲኔ ሂንቲሰ ገዲያ ላምቢ ባዎ። ሄሳ ጊሾ፣ ሂንቲው ቢዲ ሻሚዲ ኤኪቲ> ያገዳሶና። 10 ኤያ ጌላዖቲ ላምባ ሻማናው ቢን፣ ማቸው ኤኬይሲ ዩቱ ገሰ። ገጌቲ ኡቲዳ ኢቻሹ ጌላዖቲ ኢያራ ኢሲፊ ያጋኖ ኬላ ጌሊዳሶና፣ ካሬይካ ጎርዴቲ አገሰ። 11 «ጉዩፔ ሃንኮ ጌላዖቲ ዩዲ፣ ሳዳው፣ ጎዳው፣ ኦሰ ዶያርኪ) ያገዳሶና።

24:43 ሉቃ 12:39-40 25:1 ሉቃ 12:35

12 «ሺን ኢ ኤንታኮ ዛሪዲ፡ <ታኒ ሂንቴው ቱማ ኦዲይሰ፤ ታ ሂንቴና ኤሪኬ!»

13 «ሂዛ፡ እሳ ናዓይ ያና ጋላሳ ዋይኮ ሳቴያ ሂንቴ ኤሮና ጊሾ ባርኪዲ ናጊቴ።

ሃቡ-አሳንቸታ ለሚሶ
(ሉቃ 19:11-27)

14 «ጾሳ ካዎቴላይ ባ አሳንቸታ ጭጊዲ ባው ዳዒያባ ኤንታው ሹዲዲ ኦጌ ባናው ኬዩዳ ኡራ ዳኔሰ። 15 ኤንታው ሁዔን ሁዔን ኤንታ ዎልቃ ሜላ ኢሱዋሰ ኢቻሹ ካርዒቴ ቢራ፡ ኢሱዋሰ ናምዑ ካርዒቴ ቢራ ቃሲ ኢሱዋሰ ኢሲ ካርዒቴ ቢራ ኢሚዲ ባ ኦጊያ ቢሰ። 16 ኢቻሹ ካርዒቴ ቢራ ኤኪዳ ኣይሌይ ሶሁዋራ ቢዲ ዛልዒዲ፡ ሃራ ኢቻሹ ካርዒቴ ቢራ ዎዲሲሰ። 17 ሄሳዳካ፡ ቃሲ ናምዑ ካርዒቴ ቢራ ኤኪዳ ኣይሌይ ሃራ ናምዑ ካርዒቴ ቢራ ዎዲሲሰ። 18 ሺን ኢሲ ካርዒቴ ቢራ ኤኪዳይሲ ቢዲ፡ ኦላ ቦኪዲ፡ ባ ጎዳ ሚሺያ ሞጊሰ።

19 «ዳር ዎዴፕ ፑዬ ሄ ኣይሌታ ጎዳይ ዩዲ፡ ባ ሚሺያ ኤንታራ ሳላዒሰ። 20 ኢቻሹ ካርዒቴ ቢራ ኤኪዳ ኣይሌይ ዩዲ፡ ሃራ ኢቻሹ ካርዒቴ ቢራ ኤሂዲ፡ <ታ ጎዳው፡ ኔኒ ታው ኢቻሹ ካርዒቴ ቢራ አማዳሳ፡ ሺን ታኒ ሃራ ኢቻሹ ካርዒቴ ቢራ ዎዲሳሰ» ያጊሰ። 21 ኢያ ጎዳይ፡ <ዛምቦይ! ኔኒ ሎዎኔ አማንሉያ ኣይሌ፤ ኔኒ ጉላባን አማኔታዳሳ፡ ታኒ ኔና ዳርባ ቦላ ሹማና፤ ሃ ጌላዳ ኔ ጎዳራ ኡፋይታ» ያጊሰ።

22 «ቃሲ ናምዑ ካርዒቴ ቢራ ኤኪዳይሲ ዩዲ፡ <ታ ጎዳው፡ ኔኒ ታው ናምዑ ካርዒቴ ቢራ አማዳሳ፡ ሺን ታኒ ሃራ ናምዑ ካርዒቴ ቢራ ዎዲሳሰ» ያጊሰ። 23 ኢያ ጎዳይ፡ <ዛምቦይ! ኔኒ ሎዎኔ አማንሉያ ኣይሌ፤ ኔኒ ጉላባን አማኔታዳሳ፡ ታኒ ኔና ዳርባ ቦላ ሹማና፤ ሃ ጌላዳ ኔ ጎዳራ ኡፋይታ» ያጊሰ።

24 «ቃሲ ኢሲ ካርዒቴ ቢራ ኤኪዳይሲ ዩዲ፡ <ታ ጎዳው፡ ኔኒ ዜሮና ቤሳፌ ጫኬይሳኔ ቆርጮና ቤሳፌ ማዒያ ኢታ ኣሲ ጊዳይሳ ታኒ ኡራይሰ። 25 ሄሳ ጊሾ፡ ያያዳ ኔ ቢራ ቢታን ሞጋሰ፡ ኔ ሚሹይ ሃይሲሽ» ያጊሰ።

26 «ኢያ ጎዳይ ዛሪዲ፡ <ሃ ኢታ ኣዛላ ኣይሊያው፡ ታኒ ዜሮና ቤሳፌ ጫኬይሳኔ ቆርጮና ቤሳፌ ማዒያ ኣሲ ጊዳይሳ ኡራዳሳ። 27 ያቴን፡ ኔኒ ታ ሚሺያ ባንኬን ዎሉዳባ ጊዲያኮ፡ ታኒ ሲሚያ ዎዴ ታ ሚሺያ ዎዴራ ኤካናይሳ ዲጋዳሳ። 28 ሄሳ ጊሾ፡

25:14 ሉቃ 19:11-27

ሚሺያ ኢያፔ ኤኪዲ፣ ታሙ ካርዲቲ ቢሪ ዴዔይሳስ ኢሚቴ።
 29 አይስ ጊኮ፣ ዴዔያ ኡባስ ጉዡታናኔ ዳራና። ሺን ባይናይሳፊ ሃሪ አቶሺን፣ ሄ ኢያው ዴዔያ ጉሊያካ ኤኬታና። 30 ሃ ማዶና አይሊያ ካሪ ቆማ ኬሲ ዩጊቴ። ያን ኢያው ዩሆኔ አቼ ጋርጩላ ጊዳና) ያገሰ።

ዎዲያ ወርሴላን ሃናና ፒርዳ

31 «አሳ ናዓይ፣ ኪታንቸ ኡባታራ፣ ባ ቦንቹዎራ ያ ዎዴ ኢ ባ ቦንቸ ካዎታ አራታ ቦላ ኡታና። 32 ቢታን ዴዔያ አሲ ኡባይ ኢያ ሲንሌ ሺቃና። ሄንላንቸይ ዶርሳታ ዴሻታፔ ሻኬይሳዳ ኢ ሄ አሳ ናሞዓን ሻካና። 33 ቃሲ ዶርሳታ ኡሻቻ ባጋራ ዴሻታ ሃዲርሳ ባጋራ ኤሳና።

34 «ሄሳፊ ጉዩ፣ ካዎይ ኡሻቻ ባጋራ ዴዔይሳታኮ ሃይሳዳ ያጋና፣ ታ አዎይ አንጂዳይሳቶ፣ ሃ ዩዲ ሳዓይ ሜዴቲያ ዎዴ ሂንቴው ጊጊዳ ካዎቴላ ላቲቴ። 35 አይስ ጊኮ፣ ታኒ ኮሻቲን ሙዚዴታ፣ ሳሞቲን ኡሺዴታ፣ ኤሬቶና ኢማላ አሲ ጊዳዳ ቢን ሞኪዴታ፣ 36 ካሎቲን ማይዚዴታ፣ ሃርጌቲን ሃርጊሲዴታ፣ ቃሺቲን ታና ኦይቸዴታ) ያጋና።

37 «ሄሳፊ ጉዩ፣ ዲሎቲ ዛሪዲ፣ ሳዳው፣ ኔኒ ኮሻቲን አወዴ ቤዒዲ ሙዚዴ? ዎይኮ ኔኒ ሳሞቲን አወዴ ቤዒዲ ኡሺዴ? 38 ኔኒ ኢማሌ ጊዳዳ ዩን አወዴ ቤዒዲ ሞኪዴ? ዎይኮ ኔኒ ካሎቲን አወዴ ማይዚዴ? 39 ኔኒ ሃርጊን ዎይኮ ቃሺቲን ኔኮ ቢዲ ኔና አወዴ ኦይቸዴ?) ያጋና። 40 ካዎይ ዛሪዲ፣ ታኒ ሂንቴው ቱማ ኦዲይሰ፤ ሂንቴ ታና ካሊያ ሃ ኡባፊ ጉዳይሳስ ኦሊዳይሳ ታው ኦሊዴታ) ያጋና።

41 «ሄ ዎዴ ሃዲርሳ ባጋራ ዴዔይሳታኮ፣ <ሃ ቃንጌቲዳይሳቶ፣ ታ ማታፔ ሃኪቴ። ፃላሃሲኔ ኢያ ኪታንቸታሰ ጊጊዳ ሜሪና ታማን ቢቴ። 42 አይስ ጊኮ፣ ኮሻቲን ታና ሙዚቤኬታ፤ ሳሞቲን ኡሺቤኬታ። 43 ታኒ ኢማሌ ጊዳዳ ቢን ታና ሞኪቤኬታ፣ ካሎቲን ማይዚቤኬታ፣ ሃርጊኔ ቃሺቲን ታና ኦይቸቤኬታ) ያጋና።

44 «ሄ ዎዴ ኤንቲ፣ <ሳዳው፣ ኔኒ ኮሻቲን ዎይኮ ሳሞቲን ዎይኮ ኢማሌ ጊዳዳ ቢን ዎይኮ ካሎቲን ዎይኮ ሃርጊን ዎይኮ ቃሺቲን ቤዒዲ ኔና አወዴ ማዶና ኢዲዴ?) ያገሊዲ ዛራና።

25:29 ማቶ 13:12፤ ማር 4:25፤ ሉቃ 8:18 25:30 ማቶ 8:12፤ 22:13፤ ሉቃ 13:28 25:31 ማቶ 16:27፤ ማቶ 19:28

45 «ሄ ዎዴ ካዎይ ዛሪዲ ኤንታኮ፡ ትኒ ሂንቴው ቱማ ኦዲይሰ፤ ሂንቴ ታና ካሊያ ሃ ኡባፌ ጉዳይሳ ማዶና ኢዲዲሰ፡ ታና ማዶና ኢዲዲሰ» ያጋና። 46 ሄሳ ጊሾ፡ ሄ ኣሳቲ ሜሪና ፒርዳሰ ቃሲ ዒሎቲ ሜሪና ዴዑዋሰ ባና» ያጊሰ።

26

ዩሱሳ ቦላ ማቄቲዶሶና

(ማር 14:1-2፤ ሉቃ 22:1-2፤ ዮሃ 11:45-53)

1 ዩሱሲ ሃ ቲሚርቲያ ኡባ ዉርሲዳ ዎዴ ባ ታማሪታኮ፡
2 «ናምዑ ጋላሳፔ ጉዬ፡ ፓሲካ ባሌ ቦንቺያ ጋላሰ ጊዴይሳ ኤሬታ። ሄ ጋላሰ ኣሳ ናዓይ ማሰቃሊያ ቦላ ካቄታናው ኣሳ ኩሼን ኣቋ ኢሜታና» ያጊሰ።

3 ሄ ዎዴ ካሂኔ ሃላቃቲኔ ጨማቲ፡ ቃያፋ ጊያ ካሂኔ ሃላቃ ኬፋን ሸቋዲ፡ 4 ኣሲ ኤርና ዩሱሳ ኦይኪዲ፡ ዎቋናው ማቄቲዶሶና።

5 ሺን ኤንቲ፡ «ኣሳይ ኦሺ ኬሶና ሜላ ጊዲ፡ ፓሲካ ቦንቺያ ጋላሰ ሄሳ ኦሎኮ» ያጊዶሶና።

ኢሲ ማጫሲያ ዩሱሳ ሺቶ ቲያሱ

(ማር 14:3-9፤ ዮሃ 12:1-8)

6 ዩሱሲ ቢታኒያ ካታማን ባር ሃርጊዳ ሲሞና ሶን ዴዔሰ።
7 ዩሱሲ ኢማቱዋ ቦላ ዴዒሺን ኢሲ ማጫሲያ ኣልባሰዒሮሴ ጲልቃዳ ኩሜላ ዳር ኣልዎ ሺቶ ኤካ ያዳ ዩሱሳ ሁዒን ቲጋሱ።

8 ሺን ዩሱሳ ታማሪቲ ሄሳ ቤዒዲ ሃንቄቲዲ፡ «ሃ ሺቶይ ጮ ኢቲይ ኣይቢሴ? 9 ሃ ሺቶይ ኣልዎ ጋቲን ባይዘቲዲ፡ ሚሼይ ማንቆታሰ ኢሜታናው ዳንዳዒቲሰ» ያጊዶሶና።

10 ዩሱሲ ኤንቲ ጌይሳ ኤሪዲ፡ ኤንታኮ፡ «ሃ ማጫሲው ኣይሰ ዋይሴቲ? ኢያ ታው ሎዎባ ኦላሱ። 11 ማንቆቲ ኡባ ዎዴ ሂንቴራ ዳና። ሺን ታኒ ሂንቴራ ኡባ ዎዴ ዴዒኬ። 12 ኢያ ሃ ሺቱዋ ታ ቦላ ቲጊዲይሲ ታና ሞጋናው ጊጊሳናሳ። 13 ታኒ ሂንቴው ቱማ ኦዲይሰ፤ ቢታ ኡባን ሃ ዎንጌላይ ሳባኬቲያ ቤሳን ኣዉንካ፡ ኣሳይ ኢዮ ሃሳያና ሜላ ኢያ ኦላዲይሲ ኦዴታና» ያጊሰ።

ዩሁዲ ዩሱሳ ኣሊዲ ኢማናው ጊጌቲሰ

(ማር 14:10-11፤ ሉቃ 22:3-6)

14 ሄ ዎዴ ታማኔ ናምዑ ዩሱሳ ታማሪታፔ ኢሶይ፡ ኣሰቆርታ ዩሁዲ ጌቲቲይሲ ካሂኔ ሃላቃታኮ፡ 15 ቢዲ፡ «ታኒ ሂንቴው ዩሱሳ

25:46 ዳኔ 12:2 26:2 ኪሳ 12:1 26:7 ሉቃ 7:37 26:11 ዛሬ 15:11

አላ ኢሚኮ፡ ሂንቲ ታው አይ ኢማኔ?» ያጊዲ ኤንታ ኦይቸሰ። ኤንቲ ዘራቴዲ ሃስታሙ ቢራ ሳንቲሜ *† ኢሚደሶና። 16 ሄሳፊ ጉዬ፡ ዪሁዲ ዬሱሳ አሊዲ ኢማናው ኢንጄቲያ ዋዴ ዋቸሰ።

ዬሱሲ ፓሲካ ካሁዋ ባ ሃዋሬታራ ሚሰ (ማር 14:12-21፤ ሉቃ 22:7-14፤ 21-23፤ ዮሃ 13:21-30)

17 ኡይላ ባሌ ቦንቹያ ኮይሮ ጋላሰ፡ ዬሱሳ ታማሬቲ ኢያኮ ዪዲ፡ «ፓሲካ ቦንቹያ ጋላሰ ኔኒ ማና ካሊ ኮኒ አውን ገጊሲኖ?» ያጊደሶና።

18 ዬሱሲ ኤንታኮ፡ «ካታማን ዴዲያ አዲያኮ ቢዲ፡ ላስታማሬይ፡ ታው ዋዴይ ጋኪዳ ገሾ ታ ታማሬታራ ፓሲካ ቦንቹያ ጋላሳ ኔ ሶን አላና ያጌሰ» ያጊሰ።

19 ኢያ ታማሬቲ ዬሱሲ ባንታና ከቲዳይሳዳ ኦሊዲ፡ ፓሲካ ባሌ ጋላሰ ማና ካላ ገጊሲደሶና።

20 ሳዓይ ኦማርሲያ ዋዴ ዬሱሲ ታማኔ ናሞው ሃዋሬታራ ካሊ ማናው ኡቲሰ። 21 ኤንቲ ሚሺን፡ ዬሱሲ ኤንታኮ፡ «ታኒ ሂንቲው ቱማ ኦዳይሰ፤ ሂንቲፊ ኢሲ ኡራይ ታና አሊዲ ኢማና» ያጊሰ።

22 ኤንቲ ዳሮ ዳጋሚዲ፡ ሁዔን ሁዔን፡ «ጎዳው፡ ቱማ ታኔሻ?» ጊዲ ኢያ ኦይቸደሶና።

23 ዬሱሲ ዛሪዲ፡ «ባ ኩሺያ ታራ ኢሲፊ ሻቲያን ዬዴይሲ ኢ ታና አሊዲ ኢማና። 24 አሳ ናዓይ፡ ያሳ ቃላን ኢያው ፃፊቲዳይሳዳ ሃይቃና። ሺን አሳ ናዓ አሊዲ ኢሚያ ኡራ አዬ፤ ሄ ኡራይ ዬሌቶና አቲዳኮ ኢያው ሎያሺን» ያጊሰ።

25 ኢያ አሊ ኢማናው ዴዲያ ዪሁዲ ዛሪዲ፡ «አስታማሪያው፡ ኔኒ ጌይ ታኔዬ?» ያጊሰ።

ዬሱሲ ዛሪዲ፡ «ኔኒ ኔ ሁዔን ጋዳሳ» ያጊሰ።

ጎዳ ካሁዋ

(ማር 14:22-26፤ ሉቃ 22:15-20፤ 1ቆር 11:23-25)

26 ኤንቲ ሚሺን፡ ዬሱሲ ኡይላ ኤኪዲ ያሳ ጋላቲሰ። ሄ ኡይላ ሚንሊዲ ባ ታማሬታሰ ኢሚዲ፡ «ሄዒቲ፡ ሚቲ፡ ሃይሲ ታ አሹዋ» ያጊሰ።

27 ፀዓ ኤኪዲ፡ ያሳ ጋላቲሰ። ኤንታው ኢሚዲ፡ «ኡባይ ሃይሳፊ ኡዩቲ። 28 ሃይሲ ዳሮ አሳ ናጋራይ አቶ ጌቲታና ሚላ

26:15 ዛካ 11:12 * 26:15 ቢራ ሳንቲሜ፡ አይኮይካ ገዡቲቦና ጌሻ ቢራ ጉሱ። † 26:15 ሃስታሙ ቢራ ሳንቲሜ፡ ሃስታሙ ቢራ ሳንቲሜይ ኢሰራዔሌ ቢታን አይሌይ ሻሜቲያኔ ባይዘቲያ ጋቲ። 26:23 ማዝ 41:9

ጉዲያ ታ ሱላ። ሃ ሱላይ ያሳይ ሂንቴራ ጌሊያ ጫቁዋ ሚንጤይሳ።
29 ሺን ታኒ ሂንቴው ኦዲይሰ፤ ታኒ ታ ኣዋ ካዎቴላን ኦራላ ዋይኔ ኡሻ ሂንቴራ ኡያና ጋላሳ ጋካናው ናምዓንሉ ሃ ዋይኔ ኡሻ ኡዩኬ» ያገሰ።

30 ጋላታ ማዝሙራ ዩዲይሳፊ ጉዩ ሻማሆ ዴሪያ ቢዶሶና።

ዩሱሲ ጳዊርሲ ካዳናይሳ ኮይርተዲ ኦዲሰ
(ማር 14:27-31፤ ሉቃ 22:31-34፤ ዮሃ 13:36-38)

31 ሄ ዋዴ ዩሱሲ ኤንታኮ፡

« ያሳይ ሄንላንቸዋ ሾጫና
ደርሳቲካ ላሌታና»

ጌቴተዲ ያሳ ቃላን ፃፊተዲይሳ ሚላ ሃቺ ቃማ ሂንቴ ኡባይ ታና ኣገዲ ባቃታና። 32 ሺን ታኒ ሃይቆፔ ዴንዲዳፔ ጉዩ ሂንቴፊ ሲንሳታዳ ጋሊላ ባና» ያገሰ።

33 ጳዊርሲ ዛሪዲ፡ «ኤንቴ ኡባይ ኔና ኣገዲ ባቃቲኮካ፡ ታኒ ኔና ኣገኬ» ያገሰ።

34 ዩሱሲ ጳዊርሳኮ፡ «ታኒ ኔው ቱማ ኦዲይሰ፤ ሃቺ ቃማ ኩቶይ ዋሳናፔ ሲንጤ ኔኒ ታና ሄቸ ቶሆ ካዳና» ያገሰ።

35 ጳዊርሲ ዛሪዲ፡ «ታኒ ኔራ ኢሲፊ ሃይቆፔ ኣቲን ኔና ኡባካ ካዲኬ» ያገሰ።

ሃንኮ ኢያ ታማሬቲ ኡባይካ ሄሳዳ ገደሶና።

ዩሱሲ ጌቴሴማኔን ዋሲሰ
(ማር 14:32-42፤ ሉቃ 22:39-46)

36 ያቲዲ፡ ዩሱሲ ባ ታማሬታራ ጌቴሴማኔ ገያ ቤሳ ቢዲ፡ ኤንታኮ፡ «ታኒ ሂኒ ባዳ ያሳ ዋሳሻና፡ ሂንቴ ሃይሳን ኡቲቲ» ያገሰ። 37 ጳዊርሳኔ ዛብዲዮሳ ናይታ ናምዓታ ባራ ኤኪ ቢዲ ዳር ኣዛኖኔ ኡንዔቴላ ደሚሰ። 38 ቃሲካ ኤንታኮ፡ «ታኒ ሃይቆሰ ጋሊያ ኡንዓ ኡንዔታሰ። ሃይሳን ታራ ጋምዒቴኔ ሚኒዲ ናገቴ» ያገሰ።

39 ጉላ ሲንጤ ቢዲ ቢታን ጉፋኒዲ፡ «ታ ኣዋው፡ ዳንዳዔቲያባ ገዲኮ ሃ ዋዩ ፀዓ ታፔ ዲጋ። ሺን ኔ ሼኔይ ሃኖፔ ኣቲን ታ ሼኔይ ሃኖፖ» ያገዲ ያሳ ዋሲሰ።

40 ዩሱሲ ባ ታማሬታኮ ሲሚ ዩዲ ኤንቴ ጲሰኪዳሺን ዴሚሰ። ጳዊርሳኮ፡ «ሂንቴ ኢሲ ሳቲኮኔ ጲሰኮና ታራ ሚናናው ዳንዳዒቤኬቲ?» 41 ፓጮን ሂንቴ ጌሎና ሚላ ባርኪዲ ናገቴኔ

ጾሳ ዋሲቴ። ሂንቴው ሎጾ ኣሞይ ዳዔሰ። ሺን ሂንቴ ዳቡራንቸ ኣሲ» ያጊሰ።

42 ዩሱሲ ቃሲ ናሞዓንሉ ቢዲ፣ «ታ ኣሞው፣ ታኒ ሃ ዋዬ ፀዓፔ ኡዮና ዳዒሼ ኣቆናው ዳንዳዔቶናባ ጊዲኮ ኔ ሼኔይ ሃና» ያጊዲ ጾሳ ዋሲሰ። 43 ቃሲካ ሲሚ ያ ዋዴ ኢያ ታማሬታ ኣይፊያ ቋሰኮይ ጎዚን፣ ዚንዒዳሺን ዳሚሰ።

44 ቃሲካ ኤንታ ኣጊ ቢዲ፣ ካሴ ቃላ ዛሬ ሄቫንሉ ዋሲሰ። 45 ሄሳፌ ጉዬ፣ ባ ታማሬታኮ ዩዲ፣ «ሃዒ ጋካናው ቋሰኮቴኔ ሸምፔቴ? ሄኮ፣ ኣሳ ናዓይ፣ ናጋራንቸታ ኩሼን ኣቋ ኢሜቲያ ሳቴይ ጋኪሰ። 46 ዳንዲዲ ዩቋቴ፣ ታና ኣሊዲ ኢሜይሲ ሃይሲሽ ጋኪሰ» ያጊሰ።

ዩሱሲ ባ ሞርኬታን ኦይኬቴሰ (ማር 14:43-50፤ ሉቃ 22:47-53፤ ዮሃ 18:3-12)

47 ዩሱሲ ቡሮ ሄሳ ሃሳዩሺን፣ ታማኔ ናሞው ታማሬታፔ ኢሶይ፣ ዩሁዲ ጋኪ ዋቋሰ። ካሂኔ ሃላቃቴኔ ዳሪያ ጨማቴ ኪቴዳ ዳሮ ኣሳቴ ማሼኔ ፃሞዓ ኦይኪዲ ኢያራ ኢሲፌ ዩደሶና። 48 ዩሱሳ ኣሊ ኢሚያ ዩሁዲ ሄ ዳሮ ኣሳኮ፣ «ታኒ ዩሬይሲ ሂንቴ ኮይይሲ ኢያ፣ ኢያ ኦይኪቴ» ያጊዲ ማላ ኢሚ ዋሊሰ።

49 ኢራካ ዩሱሳኮ ሸቂዲ፣ «ኣሰታማሪያው፣ ሳሮ ዳዓይ» ያጊዲ ኢያ ዩሪሰ።

50 ዩሱሲ ኢያኮ፣ «ታ ላጊያው፣ ኔኒ ኦላናባ ኦላ ኣጋ» † ያጊሰ። ሄሳፌ ጉዬ፣ ሸቂዲ፣ ዩሱሳ ኦይኪደሶና። 51 ዩሱሳራ ዳዔይሳታፔ ኢሶይ ባ ማሻ ሸዲዲ ካሂኔ ሃላቃ ኣይሊያ ሸጨዲ፣ ኢያ ሃይላ ቃንዲዲ ዩጊሰ። 52 ሺን ዩሱሲ፣ «ኔ ማሻ ጉዬ ሸሁዋን ዛሬ። ኣይሰ ጊኮ፣ ማሻ ሸዲያ ኡባይ ማሻን ሃይቃና። 53 ታ፣ ታ ኣሞ ዋሲያኮ ዳሮ ሙኩሉን ታይቤቲያ ኪታንቸታ ዩዳናው ዳንዳዓናባ ኔው ዳኒ? 54 ያቴን፣ ጾሳ ቃላን ሄሳዳ ሃናናው ቤሴሰ ጌቴቲዳይሲ ዋኒዲ ፖሌታኔ?» ያጊሰ።

55 ሄ ሳቴያን፣ ዩሱሲ ሄ ሸቂዳ ዳሮ ኣሳኮ፣ «ታና ፓንጋ ኦሊዲ ኦይካናው ማሼኔ ፃሞዓ ኦይኪዲ ዩዳቴ? ታኒ ጾሳ ኬላን ጋላሰ ጋላሰ ታማርሳሼ ሂንቴራ ዳዒያ ዋዴ ታና ኦይኪቤኬታ።

56 ሺን ሃይሲ ኡባይ ሃኒዳይሲ ናቤቴ ጾሳ ቃላን ፃፊዳይሲ ፖሌታና ሜላሳ» ያጊሰ።

† 26:50 ታ ላጊያው፣ ኔኒ ኦላናባ ኦላ ኣጋ፡ ዋይኮ ሃራ ቢርሹላይ ታ ላጊያው፣ ኔ ሃይሳን ኣይ ኦላይ? 26:55 ሉቃ 19:47፤ 21:37

ሄ ዎዴ ኢያ ታማሬቲ ኡባይ ኢያ ኣጊዲ ባቃቲዶሶና።

ዩሱሲ ፒርዳ ሻንጎ ሲንጼ ሸቁሰ

(ማር 14:53-65፤ ሉቃ 22:54-55፤ 63-71፤ ዮሃ 18:13-14፤ 19-24)

57 ዩሱሳ ኦይኪዳይሳቲ ካሂኔ ሃላቃ ቃያፋኮ ኢያ ኤፊዶሶና። ያን ሂጌ ኣስታማሬቲኔ ቢታ ጨማቲ ሸቁዲ ዴዎሶና። 58 ሺን ጳዳርሲ ካሂኔ ሃላቃ ዛባ ጋካናው ሃሆን ኢያ ካሊሰ። ኢያ ዉርሴላይ ሻኩታና ጋካናው ዛባ ጌሊዲ ናጌይሳታራ ኡቲሰ።

59 ካሂኔ ሃላቃቲኔ ሸቁዲ ኣሳ ኡባይ ዩሱሳ ዎፋናው ኢያ ቦላ ዎርዶ ማርካ ኮዩዶሶና። 60 ዳሮቲ ዩዲ ኢያ ቦላ ዎርዶ ማርካ ማርካቲዶሶና። ሺን ኣይኮካ ዴሚቦኮና። ጉዩፔ ናምቡ ኣሳቲ ዩዲ። 61 «ሃ ኡራይ፣ ታኒ ያሳ ኬላ ላላዳ ሄዙ ጋላሳን ዛራ ኬፃናው ዳንዳባይሰ» ያጊሰ» ያጊዶሶና።

62 ካሂኔታ ሃላቃይ ዴንዲ ኤቁዲ ዩሱሳኮ፣ «ሃይሳቲ ኔና ሞቲያ ሞቶዎስ ኔኒ ዛሪያባይ ባዌ?» ያጊሰ። 63 ሺን ዩሱሲ ሲዒ ጊሰ። ቃሲካ ካሂኔ ሃላቃይ፣ «ታኒ ኔና ዴዎ ያሳ ሱንፋን ኦይካይሰ፤ ኔኒ ያሳ ናባ ኪሪሰቶሳ ጊዲኮ ኑሰ ኦዳ» ያጊሰ።

64 ዩሱሲ ዛሪዲ፣ «ኔኒ ኔ ሁዒንካ ጋዳሳ። ሺን ታኒ ሂንቴው ኦዳይሰ፤ ሂዛፔ ጉዩ፣ ኣሳ ናባይ ዎልቃማ ያሳ ኡሻቻ ባጋን ኡቲዳሺን፣ ቃሲ ሳሎ ሻራራ ዩሺን ሂንቴ ቤባና» ያጊሰ።

65 ሄ ዎዴ ካሂኔ ሃላቃይ ዳሮ ዩሎቲዲ ባ ማዑዎ ፔጲዲ፣ «ሃይሳ ቤባቲ ያሳ ጨዩሰ! ኑና ሃራ ማርካ ኣይ ኮሺ? ኢ ሃዒ ጨዩዳይሳ ሂንቴ ሲዒይታ። 66 ሂንቴ ቆፋይ ኣይቤ?» ያጊሰ።

ኤንቲካ፣ «ኢያው ሃይቆ ቤሴሰ» ያጊዲ ዛሪዶሶና።

67 ያቲን፣ ኤንቲ ኢያ ሶምዎን ጨቲዲ ዴቸዶሶና። ሃራቲ ኢያ ባቁዲ፣ 68 «ኪሪሰቶሳ! ኔና ዴቸዳይ ኦኔ? ኣኔ ኑሰ ኦዳ» ያጊዶሶና።

ጳዳርሲ ዩሱሳ ካዲሰ

(ማር 14:66-72፤ ሉቃ 22:56-62፤ ዮሃ 18:15-18፤ 25-27)

69 ጳዳርሲ ዛባን ኡቲዳሺን፣ ኢሲ ኣይሊያ ኢያኮ ያዳ፣ «ኔኒካ ጋሊላ ዩሱሳራ ኢሲፌ ዴባሳ» ያጋሱ።

70 ሺን ኢ ኤንታ ኡባ ሲንፋን ሄ ኣይሌኮ፣ «ኔኒ ጊያባይ ኣይቤኮ ታኒ ኤሪኬ» ያጊዲ ካዲሰ።

71 ቃሲ ቢዲ ዲርሳ ፔንጌኮ ጋኪሺን ሃራ አይሊያ ኢያ ቤዓዳ፥ ያን ደዒያ አሳኩ፥ «ሃ ኡራይ ናዚሬቲ ዩሱሳራ ዳዔሰ» ያገሱ።

72 ጳጳርሲ ናምዓንፍ ጫቂዲ፥ «ታኒ ሄ ኡራ ኤሪኬ!» ያገሱ።

73 ጉሉ ጋምዒሺን፥ ያን ኤቂዳ አሳቲ ጳጳርሳኮ ዩዲ፥ «ኔካ ቱማ ኤንታራ ኢሲፌ ዳዓሳ፤ ኔኒ ኔ ሃሳያን ኤሬታሳ» ያገደሶና።

74 ሄሳፌ ጉዬ፥ ጳጳርሲ፥ «ታኒ ሄ ኡራ ኤሪኬ!» ያገዲ፥ ባና ቃንጌሊኔ ጫቆ ዶሚሰ።

ሄ ዎዴ ኢራካ ኩቶይ ዋሲ አገሰ። 75 ዩሱሲ ኢያኮ፥ «ኔኒ ኩቶይ ዋሳናፔ ሲንሌ ታና ሄዙ ቶሆ ካዳና» ገዳይሳ ጳጳርሲ አክኪዲ፥ ካሬ ኬዩዲ አታ ዩሆ ዩኪሰ።

27

ዩሁዲ ባና ሱሊሰ

(ማር 15:1፤ ሉቃ 23:1-3፤ ዮሃ 18:28-32)

1 ዋንታ ጉራ ካሂኔ ሃላቃቲኔ ቢታ ጨማቲ ኡባይ ዩሱሳ ዋዲሳናው ማቂቲደሶና። 2 ኤንቲ ዩሱሳ ቃቺ ኤፊዲ ዳሪያ ሃሪያ ጲላዖሳሰ አሊዲ አሚደሶና።

3 ሄ ዎዴ ዩሱሳ ኦይሊዳ ዩሁዲ፥ ጲላዖሰ ዩሱሳ ቦላ ፐርዲዳይሳ ቤዒዲ፥ ቂሮቲዲ፥ ሄ ሃሰታሙ ቢራ ሳንቲሚያ ካሂኔ ሃላቃታሰኔ ዳሪያ ጨማታሰ ጉዬ ዛሪሰ። 4 «ታኒ ዓሎ አሲ ሃይቆሰ አላ አማዳ ናገራ ኦሳሰ» ያገሰ።

ሺን ኤንቲ፥ «ሄሲ ኦ ሜቶ ገዴና ኔ ሜቶ» ያገደሶና።

5 ዩሁዲ ሚሺያ ዖሳ ኬላን ዩጊ አገዲ ኤንታ ማታፔ ቢዲ፥ ሱሌቲ ሃይቂሰ።

6 ካሂኔ ሃላቃቲ ሚሺያ ኤኪዲ፥ «ሃ ሚሺይ ሱላ ሚሺ ገዲያ ገሾ ኦኒ ዖሳ ኬላ ሚሺያራ ጋሌይሲ ዋጋ ገዴና» ያገደሶና።

7 ሄሳፌ ጉዬ፥ ኢሲፌ ዘሬቲዲ፥ ቤቲ አሲ ሞጋናው ማና ቢታ ሻሚደሶና። 8 ሄሳ ገሾ፥ ሄ ጋዴይ ሃቺ ጋካናው ሱላ ቢታ ጌቲቲ ዌጌቲሰ።

9 ናቢያ ኤርሚያሲ፥ «ኢሰራዔሌ አሳይ ኢያው ቃንፃናው ጋማቲዳ ሃሰታሙ ቢራ ሳንቲሜ ኤኪደሶና። 10 ኅዳይ ታና ከቲዳይሳዳ ማና ቢታ ሻማናው አሚደሶና» ገዳይሲ ሄ ዎዴ ፖሌቲሰ።

ዩሱሲ ጲላዖሳ ሲንላን

(ማር 15:2-5፤ ሉቃ 23:3-5፤ ዮሃ 18:33-38)

11 ዩሱሲ ዳሪያ ሃሪያ ጲላያሳ ሲንጩ ሸቁን፣ ጲላያሲ ኢያኮ፣ «ኔኒ አይሁዳ ካዎ?» ያገዱ ኦይቸሰ።

ዩሱሲ ዛሪዲ፣ «ኔ ጋዳሳ» ያገደ።

12 ካሂኔ ሃላቃቲኔ ቢታ ጨማቲ ኢያ ሞቲያ ዎዴ ኤንታው አይቢ ዛሮካ አሚቤና።

13 ሄ ዎዴ ጲላያሲ ዩሱሳኮ፣ «ሃይሳቲ ኔና ሞቲያ ሞቱዎ ኡባ ሲዒኪ?» ያገደ።

14 ዩሱሲ ሃሪ ኣቶሺን፣ ኢሲ ቃላካ ዛሮና ኢዲን፣ ዳሪያ ሃሪይሲ ዳሮ ማላሌቲስ።

ዩሱሳ ቦላ ሃይቆ ፐርዴቲስ

(ማር 15:6-15፤ ሉቃ 23:13-25፤ ዮሃ 18:39-40፤ 19:1-

16)

15 ዳሪያ ሃሪይሲ ላይላን ላይላን ፓሲካ ባሌ ቦንቸያ ጋላሳን፣ አሳይ ኮያ ኢሲ አሲ ቃሾፕ ቢርሺያ ዎጊ ዳዔስ። 16 ሄ ዎዴ ኢሲ ባርባና ዩሱሳ ገያ ዳሮ ኤሬቲዳ ኢታ አሲ ቃሾ ኬላን ዳዔስ።

17 ሄሳ ገሾ፣ ዳሮ አሳይ ሸቁዲ ዳዒሺን ጲላያሲ፣ «ታኒ ሂንቴው ባርባና ዩሱሳ ቢርሾዬ፣ ዎይኮ ዩሱሳ ገያ ኪሪስቶሳ ቢርሾ?» ያገዱ አሳ ኦይቸሰ። 18 ኢ ሄሳ ገዳይ ኤንቲ ቃናቲዲ ዩሱሳ ኦይሌዳይሳ ኤሪያ ገሾሳ።

19 ጲላያሲ ፐርዳ ኬላን ኡቲዳሺን፣ ኢያ ማቸያ፣ «ታኒ ሃቸ ቃማ አሙሆን ኢያባ ዳሮ ዎይታሼ አቁዳ ገሾ ሄ ደሎ ኡራ ቦላ አይቢባካ ኦሶፋ» ያጋዳ ኪታሱ።

20 ሺን ካሂኔ ሃላቃቲኔ ዳሪያ ጨማቲ ጲላያሲ ባርባና ቢርሺዲ፣ ዩሱሳ ዎቆና ሜላ፣ አሳይ ኢያ ዎሳና ሜላ፣ አሳ ጨሚዶሶና።

21 ጲላያሲ ዛሪዲ ኤንታኮ፣ «ታኒ ኤንታ ናምዓፌ ሂንቴው ኦና ቢላና ሜላ ኮይቲ?» ያገዱ ኦይቸሰ።

ኤንቲ፣ «ባርባና ቢላና ሜላ ኮዮስ» ያገደሶና።

22 ጲላያሲ፣ «ያቲን፣ ዩሱሳ ገያ ኪሪስቶሳ ዎቶ?» ያገዱ ኤንታ ኦይቸሰ።

ኡባይ ዛሪዲ፣ «ማስቃሊያ ቦላ ኢያ ካቃ» ያገደሶና።

23 ጲላያሲ አሳኮ፣ «አይስ? ኢ አይ ኢታባ ኦሌዴ?» ያገዱ ኦይቸሰ።

ሺን አሳይ ካሴይሳፌ ኣሊዲ፣ «ማስቃሊያ ቦላ ኢያ ካቃ» ገዲ ዎሲዶሶና።

24 ኦሺ ዴንጮሎ ሃራ አይቢባካ ኦላናው ዳንዳዔቶናይሳ ጲላጾሲ ቤዒዲ፣ ሃሌ ኤኪዲ፣ «ሃ ኡራ ሃይቁዋን ታኒ ዴዒኬ። ሄሳ ኦሌይ ሂንቴና» ያጊዲ አሳ ሲንላን ባ ኩሺያ ሜጩቴሰ።

25 አሳ ኡባይ ዛሪዲ፣ «ኢያ ሱላ ጎሜይ ኦናኔ ኦ ናይታ ጋኮ» ያጊደሶና።

26 ያቲን፣ ጲላጾሲ ባርባና ኤንታው ቢሊዲ፣ ዬሱሳ ሊሶን ጋራፊዲ፣ ማሰቃሊያ ቦላ ካቁቲዲ ሃይቃና ማላ ኤንታው አሊዲ ኢሚሰ።

ዎታዳሬቲ ዬሱሳ ቁልቂሲደሶና
(ማር 15:16-20፤ ዮሃ 19:2-3)

27 ሄሳፊ ጉዬ፣ ጲላጾሳ ዎታዳሬቲ ዬሱሳ ዴሪያ ሃሬይሳ ሶ ኤኪ ኤፊን፣ ዎታዳሬቲ ኡባይ ኢያ ዩሹዋን ኤቁደሶና። 28 ኢያ አፊላ ቃሪ ኤኪዲ ዘዎ አፊላ * ማይዚደሶና። 29 ቃሲ አጉንላ ካላቻ ገጊሲዲ፣ ኢያ ሁዔን ዎሊደሶና። ኢያ ኡሻቻ ኩሺያን ማይሬ ግምዓ ኦይሊዲ፣ ኢያ ሲንላን ጉልባቲዲ፣ «አይሁዴ ካዎው፣ ሙኩሉ ላይሊ ካዎታ!» ያጊዲ፣ ኢያ ቦላ ቁልቂሲደሶና። 30 ኢያ ቦላ ጩቲደሶና። ሄ ማይሬ ግምዓ ኤኪዲ፣ ኢያ ሁዔን ሸጪደሶና። 31 ኤንቲ ኢያ ቦላ ቁልቂሲደይሳፊ ጉዬ ዘዎ አፊላ ኢያፔ ቃሪ ኤኪዲ፣ ኢያ አፊላ ኢያ ማይዚደሶና። ማሰቃሊያ ቦላ ኢያ ካቃናው ኤኪ ኤፊደሶና።

ዬሱሳ ካቁቲላ
(ማር 15:21-32፤ ሉቃ 23:25-43፤ ዮሃ 19:17-27)

32 ኤንቲ ካሬ ኮዬዲ፣ ኢሲ ሲሞና ጊያ ቁሬና ቢታ አሲ ዴሚዲ፣ ዬሱሳ ማሰቃሊያ ዎልቃን ቶሲደሶና። 33 ጎልጎታ ጊያ ቤሲ ጋኪደሶና። «ጎልጎታ» ጉሳይ «ጉጌ ቤሲ» ጉሱ። 34 ሄሳን ኤንቲ ጨዬ ዎላኬቲዳ ዎይኔ ኡሻ ኡዮ ጊዲ ኢያው ኢሚደሶና። ሺን ኢ ሄሳ ጋንዒ ኤኪዲ፣ ኡዮና ኢዒሰ።

35 ኤንቲ ማሰቃሊያ ቦላ ኢያ ካቁዳይሳፊ ጉዬ ኢያ አፊላ ሻኪዲ፣ ሳማ ዬጊዲ ኤኪደሶና። 36 ሄሳፊ ጉዬ፣ ያን ኡቲዲ ኢያ ናጊደሶና። 37 ቃሲ፣ «ሃይሲ አይሁዴ ካጫዎ ዬሱሳ» ያጊያ ሞቶ ፀፊያ ኢያ ሁዔ ሶን ዎሊደሶና። 38 ዬሱሳራ ሄ ዎዴ ናምቡ ፓንጋታ ኢሱዎ ኢያፔ ኡሻቻ ባጋን፣ ሃንኩዎ ኢያፔ ሃዲርሳ ባጋራ፣ ማሰቃሊያ ቦላ ካቁደሶና።

27:24 ዛሬ 21:6 * 27:28 ዘዎ አፊላ፡ ቤኒ ዎዴ ካዎቲ ቦላራ ማዒያ አፊላ።
27:34 ማዝ 69:21 27:35 ማዝ 22:18

39 ኦጊደራ አዲያ አሳይ ዬሱሳ ሰራዲ፣ ኢያ ቦላ ጨተሹ፣
40 «የሳ ከላ ላላዳ ሃቡ ጋላሳ ገደን ከጸይሶ፣ ኔና አሻ። ኔኒ ያሳ ናሳ ገደኩ፣ እኔ ማስቃሊያ ቦላፌ ዋዳ» ያገደሶና።

41 ሄሳዳካ፣ ካሂኔ ሃላቃቲ፣ ሂጌ አስታማሬቲኔ ቢታ ጨማቲ ኢሲፌ ዬሱሳ ቦላ ቁልቁሲደሶና። ሃይሳዳ ያገደሶና። 42 «ሃራታ አሺሰ፣ ሺን ባና አሻናው ዳንዳቢና። ኢ ኢሰራዔል ካዋ ገደኩ፣ እኔ ማስቃሊያ ቦላፌ ሃቢ ዋዳ፣ ኑካ ኢያ አማናና። 43 ያሳን ኢ አማኔቲሰ፣ ያሳይ ኢያ አሻናው ኮይኮ እኔ አሾ። አይሰ ገኮ፣ ኢ ባና፣ ታኒ ያሳ ናሳ» ጌሰ» ያገደሶና።

44 ቃሲ ሃሪ አቶሺን፣ ኢያራ ማስቃሊያ ቦላ ካቁቲዳ ፓንጋቲካ ሄሳዳ ገደኢ ኢያ ቦላ ቁልቁሲደሶና።

ዬሱሳ ሃይቁዋ

(ማር 15:33-41፤ ሉቃ 23:44-49፤ ዮሃ 19:28-30)

45 ኡሱፑን ሳቲፔ ቢዲ፣ ኡዲፋን ሳቲ ጋካናው ቢታ ኡባይ ቋሚሰ። 46 ኡዲፋን ሳቲ ገደያ ዋዳ ዬሱሲ፣ «ኤሎሄ፣ ኤሎሄ፣ ላማ ሳባቁታኒ?» ገደኢ ገታ ዋሶ ዋሲሰ። «ኤሎሄ፣ ኤሎሄ፣ ላማ ሳባቁታኒ?» ጌይሳ ቢርሽላይ «ታ ያሳው፣ ታ ያሳው፣ ታና አይሰ አጋዲ?» ጉሱ።

47 ሄሳን ኤቁዳ አሳፔ ኢሶቲ ኢሶቲ ሄሳ ሲቢዲ፣ «ሃ ኡራይ ኤሊያሳ ጸጌሰ» ያገደሶና። 48 ኢራ ኤንታፌ ኢሶይ ዋዲ ቢዲ፣ ኢሰፖንጃ ኤኪዲ፣ ጫላ ዋይኔ ኡሻ ኩንላሰ። ሄሳ ማይሬ ፃዎዋ ጸራን ዋላዲ አሻናው ኢያ ደናኮ ሺሺሰ። 49 ሺን ሃንኮቲ፣ «ናጋ፣ ኤሊያሲ ኢያ አሻናው ያኔኮ እኔ ቤዖሰ» ያገደሶና። 50 ዬሱሲ ናዎዋንሳ ገታ ዋሶ ዋሲዲ፣ ሃይቁ አገሰ።

51 ሄ ሳቲን ያሳ ከላን ካቁቲዳ ማጋራጃይ ቆዎፌ ዲጌ ጋካናው ናዎዎ ከዬዲ፣ ፔዴቲ ዋዲሰ። ቢታይ ቃዲሰ፣ ዛላይካ ጳልቁቲሰ።

52 ዱፎቲ ደዬቲን ያሳ አሳታፔ ዳሮቲ ሃይቆፔ ዴንዲደሶና። 53 ኤንቲ ዱፎፔ ከዬዲ፣ ዬሱሲ ሃይቆፔ ዴንዲደይሳፌ ጉዬ ጌሻ ካታማ ቢደሶና፤ ያን ኤንቲ ዳሮ አሳሰ ቤንቲደሶና።

54 ማቶ ሃላቃይኔ ኢያራ ዬሱሳ ናጊያ ዋታዳሬቲ ቢታይ ቃዲደሳኔ ሄሳን ሃኒዳባ ቤቢዳ ዋዳ ዳሮ ያዬዲ «ቱማ ሃይሲ ያሳ ናሳ» ያገደሶና።

55 ሄሳን ዳሮ ማጫሳቲ፣ ጋሊላፔ ደሚዲ ዬሱሳ ሃጋዚሽ ካሊዳይሳቲ ሃሆን ኤቁዲ ጸሎሶና። 56 ኤንታ ገደን ማግዳላ

27:39 ማዝ 22:7፤ 109:25 27:40 ማቶ 26:61፤ ዮሃ 2:19 27:43 ማዝ 22:8 27:46 ማዝ 22:1 27:48 ማዝ 69:21 27:51 ኬሳ 26:31 27:55 ሉቃ 8:2-3

ማይራማ፣ † ያይቆባኔ ዮሴፋ ኣያ ማይራማኔ ዛብዲዮሳ ማቺያ ዴጎሶና።

ዬሱሳ ሞጌቲሳ

(ማር 15:42-47፤ ሉቃ 23:50-56፤ ዮሃ 19:38-42)

57 ሳዓይ ኦማርሲያ ዎዴ ዮሴፋ ጊያ ኢሲ ዱሬ ኡራይ፣ ኣርማቲያሳ ካታማፔ ዪሰ። ኢ ባ ሁዓንካ ዬሱሳ ካሊያ ኣሲ።

58 ዮሴፊ ጲላጎሳኩ ቢዲ፣ ዬሱሳ ኣሃ ኤካናው ዎሲሰ። ጲላጎሲ ኣሃይ ዮሴፋሰ ኢሜታና ሜላ ከቲሰ።

59 ዬሱሳ ኣሃ ኤኪዲ፣ ጌሻ ሞሳ ኣፊላን ፃዲሰ። 60 ባው ሞጌታናው ሹቻፊ ዎጨዳ ኦራፋ ጎንጎሎን ኢያ ኣሃ ዎሲሰ። ቃሲ ሄ ጎንጎሎዎ ዶናን ጊታ ሹቻ ጎንዶርሲ ዎሲዲ ኣጊ ቢሰ።

61 ማግዴላ ማይራማኔ ሃንኮ ማይራማ ሄ ጎንጎሎዎኮ ሲሚዲ ኡቲዶሶና።

62 ዎንቴሌ ሳምባታ ጋላሰ፣ ካሂኔ ሃላቃቲኔ ፋሪሳዌቲ ጲላጎሳኩ ዪዲ፣ ሃይሳዳ ያጊዶሶና።

63 «ጎዳው፣ ሃ ዎርዳንቾይ ፓፃ ዴዒሹ፣ ታኒ ሄቩ ጋላሳፔ ጉዬ ሃይቆፔ ዴንዳና፣ ያጊዳይሲ ኦስ ሃሳዬቲሰ።

64 ሄሳ ጊሹ፣ ኢ ሞጌቲዳ ጎንጎሎዎ ሄቩ ጋላሰ ጋካናው፣ ሚንሌ ናጋና ሜላ ከታርኪ። ሄሲ ሃኖና ኢዲኮ፣ ኢያ ታማሬቲ ቢዲ ኢያ ኣሃ ካይሲ ዳይሲዲ፣ <ሃይቆፔ ዴንዲሰ> ያጊዲ ኣሳሰ ኦዲኮ ናምዓንሉ ባሌሶይ ኮይርይሳፊ ኡባ ሃ ኢታና» ያጊዶሶና።

65 ጲላጎሲ ኤንታኮ፣ «ሂንቴው ናጌይሳቲ ዴጎሶና፤ ቢዲ ሂንቴው ዳንዳዔቲዳ ሜላ ናጊሲቲ» ያጊሰ።

66 ሄሳ ጊሹ፣ ኤንቲ ቢዲ ዲፎይ ቦሹቶና ሜላ ሹቻ ቦላ ማታሜ ዎሲዲ ዎታዳሬታን ናጊሲዶሶና።

28

ዬሱሳ ሃይቆፔ ዴንዲዎ

(ማር 16:1-10፤ ሉቃ 24:1-12፤ ዮሃ 20:1-10)

1 ሳምባቲ ኣጲን ዎጋ ዎዴ ዎንታ ጉራ፣ ማግዴላ ማይራማኔ ሃንኮ ማይራማ ዬሱሲ ሞጌቲዳ ጎንጎሎዎ ቤዓናው ቢዶሶና።

2 ቆፖና ዎልቃማ ቢታ ቃይይ ሃኒሰ። ጎዳ ከታንቾይ ሳሎፔ ዎዲዲ ዲፋዎ ዶናን ዴዒያ ሹቻ ጎንዶርሲዲ ኢያ ቦላ ኡቲሰ።

3 ኢያ ማላይ ዎልዓንሌ ዳኔሰ። ኢያ ማጎይካ ሻቻዳ ቦሊ። 4 ናጌይሳቲ ከታንቾዎ ቤዒዲ፣ ያሻን ኮኮሪዲ፣ ሃይቂዳ ኣሳዳ ሃኒዶሶና።

† 27:56 ማግዴላ ማይራሞ፡ ጉሳይ ማግዴላ ካታማፔ ዪዳ ማይራሞ ጉሱ።
27:63 ማቶ 16:21፤ 17:23፤ 20:19፤ ማር 8:31፤ 9:31፤ 10:33

5 ከታንቸይ ማጫሳታኮ፡ «ሂንቲ ማስቃሊያ ቦላ ካቂቲዳ ዩሱሳ ኮዩይሳ ታኒ ኤሪያ ጊሾ ያዮፊቴ። 6 ኢ ካሴ ኦዲዲይሳ ሜላ ሃይቆፔ ዴንዲሰ፤ ሃይሳን ዴና። ሃ ዩዲ ኢያ ዚንዲሰዲ ቤሳ ቤዒቴ። 7 ሂንቲ ሃዒ ኤሌሲ ቢዲ፥ ኢያ ታማሪታሰ፡ «ዩሱሲ ሃይቆፔ ዴንዲሰ። ቃሲ ኢ ሂንቲፊ ሲንላቲዲ ጋሊላ ባና፤ ሂንቲ ኢያ ያን ቤዓና) ያጊዲ ኦዲቴ። ታኒ ሂንቲው ሃይሳ ኦዳናው ያስ» ያጊሰ።

8 ኤንቲ ያዩሼኔ ዳር ኡፋይቲሼ፥ ዲፉዋ ማታፔ ኤሌሲዲ ቢዲ፥ ኢያ ታማሪታሰ ኦዳናው ዋዲዶሶና።

9 ቆፖና ዩሱሲ ኤንታራ ጋሄቲዲ ኤንታኮ፡ «ሳርይ ሂንቲው ጊዶ» ያጊሰ። ኤንቲ ኢያኮ ሸቂዲ፥ ኢያ ቶሁዋ ኦይኪዲ ኢያው ጎይኒዶሶና። 10 ሄ ዋዴ ዩሱሲ ኤንታኮ፡ «ያዮፊቴ፤ ቢዲ ታ ታማሪቲ ጋሊላ ባና ሜላ ኤንታው ኦዲቴ። ኤንቲ ያን ታና ቤዓና» ያጊሰ።

11 ሄ ማጫሳቲ ቢሺን፥ ዲፉዋ ናጊያ ዋታዳሪታፔ ባጋቲ ካታማ ቢዲ፥ ሃኒዳባ ኡባ ካሂኔ ሃላቃታሰ ኦዲዶሶና። 12 ካሂኔ ሃላቃቲኔ ጨማቲ ሸቂዲ ዙሪቲዲ፥ ዋታዳሪታሰ ዳር ሚሼ ኢሚዲ፥ 13 « ሉኒ ጳሰኪዳሺን ኢያ ታማሪቲ ቃማ ዩዲ፥ ኢያ ኣሃ ካይሲዶሶና) ያጊቴ። 14 ሃ ኦዳ ዴሪያ ሃሪይሲ ሲዒኮ፥ ሄሲ ሂንቲ ባላ ጊድናይሳ ኩኒ ኢያ ኦዲ ኣማንላና። ሂንቲና ኣይቢካ ሃርጊሶፖ» ያጊዶሶና።

15 ዋታዳሪቲ ሚሺያ ኤኪዲ፥ ኪቲቲዳይሳዳ ኦላዶሶና። ሃ ኦዳይ ኣይሁዴ ማታን ሃቺ ጋካናው ኦዴቲሼ ዴዔሲ።

ዩሱሲ ባ ታማሪታሰ ቆንጨሰ

(ማር 16:14-18፤ ሉቃ 24:36-49፤ ዮሃ 20:19-23፤ ሃ.ኦ 1:6-8፤ 1ቆር 15:3-8)

16 ታማኔ ኢሲ ኢያ ታማሪቲ ዩሱሲ ባንታና ቢቲ ጊዳ ጋሊላ ዴሪያ ቦላ ቢዶሶና። 17 ያን ኤንቲ ኢያ ቤዒዳ ዋዴ ኢያው ጎይኒዶሶና፥ ሺን ኤንታፊ ኢሶቲ ኢሶቲ ሲጳዶሶና።

18 ዩሱሲ ኤንታኮ ሸቂዲ፥ «ሳሎኒኔ ሳዓን ማቲ ኡባይ ታው ኢሜቲሰ። 19 ሃዛ፥ ሂንቲ ኡባ ቤሲ ቢዲ፥ ኣዋ፥ ናዓ፥ ጌሻ ኣያና ሱንላን ኣሴ ኡባ ፃማቂዲ ታና ካሌይሳታ ኦላቴ። 20 ታኒ ሂንቲና ከቲዳባ ኡባ ኤንቲ ናጋና ሜላ ኤንታ ታማርሲቲ። ታኒ ዋዲያ ወርሴላ ጋካናው ኡባ ዋዴ ሂንቲራ ዴዓይሰ» ያጊሰ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022

c35d6c73-3843-5482-b53e-7559d35deee5